

Kima Piwiha Gaaha Waniha

Maakiho Jipatipaisihaare

Kimandi Maakihomi Utipimandi Piwiha Nesipihaare

Maakiho so Jisaasihoai niwipinjohiyihiya 12 kaiwihyaamihomaahere. Owe. Iyataahandi kandi Aposerihiya Porihoi naisoho Banapaasihomi mwaahore. Aihi Banapaasiho so Maakihomi sapihoeti ami saanihoetihore. Iyati ko jihi nehi masihonji Poriyi Banapaasiyaisati daayainjamapi ami ipoti kuri numwasi notaise. Ko saihiyataati ami Poriho koai maariho biyati windi wimaawise. Aihihandi kandi ipoti Maakiho Porihoi wonya taahonyonya kawisataise. Aihi ami Kiraisihomi isihyaami jihimatohiyihiya jihiya Maakihopi (Joni Maakihopi) saiwi gwinyaawaayopo. Ipoti wura Maakiho Romihandaahapi notaise. Noti kapihi Pitaahoaisa bindataise. Siyati bindataati ami Pitaaho koai piwiha sitorihandi kaundihi ami Maakiho atisati neti kima komi piwima jipatipiyataise.

Iyataati Maakiho Jisaasihopi jipatipiyati kataunjisiha satati kandaase. Jisaasiho Awaisiho Autaahaatihomi piwiha iwisi maapi yapimbataapihi noaatipati nasati ami isihyaamihatihi noti nasayati daayataise ndaase.

Maakihomi Piwiha Napimasihaare

Awaisihomi piwiha iwisiho napindihandapiha (1:1-13)

Autahaatihomi piwiha iwisi napisiho otipipati kaindihandapiha (2:14–13:37)

Autahaatihomi piwiha iwisi napisiho napwindihandapiha (14:4-47)

Autahaatihomi piwiha iwisi napisiho napotati asoheematati nepatihandapiha (16:1-20)

Kima Piwiha Joniho Isihiyai Baawusisiho Piwiha Ausaasitihandapihaare

(*Matiyuhu 3:1-12; Rukiho 3:1-9, 3:15-17; Joniho 1:19-28*)

1 ¹ Kima Piwima Gaaha Waniha Autahaatihomi Mwaaho Jisasi Kiraisiho katati kataunjati kaiwaiwaapihaare. ² Iyataati Autahaatihomi piwiha atisati neti ausaasiho Piropetiho Aisaiyaaho sata katati ahairihireti namasati noaipataise:

“Atime utaaho woaisi Nini Nisi piwiha nunyati ami neti nandusaasito. Nandusaasisanihi piwiha ausaati daihira titihehima daahuwitaise.” *Marakaiho 3:1*

³ “Isihiya iwiwiriho owehapihi utaaho wo bindata isihiyai gaata numwaati piwiha ausaati sata kaunditaise. ‘Awaisiho napitandihira daihira titihapumapi daawupise,’ unditaise,” *Aisaiyaaho 40:3*
tati Autaahaatiho Aisaiyaahomihetapi katati ahaisihaare.

⁴ Aihi ipotihura utaaho wo komi ambipati Joniho isihiya iwiwiriho owehapihi noaipati bindataise. Noaipati bindata isihiyai gaata numwaati piwiha ausaati kaundati waapohora baawusataise. So Jono Autaahaatiho Aisaiyaahomihetapi katisihore. Isi ko Joniho isihiyai piwiha ausaati sata kaundataase. “Sami maipihaiwa kiyohiwaiwa namamapi sahi Au taahaatihomihyaatimatitaatiwi namihaniwi waapoho nepise. Aiwi baiwi akitinihi nepemaitiwi waapoho nesaihi ami Autaahaatiho sahi maipihaiwa kiyohiwaiwa nesamaitaise,” undataase. ⁵ Aihi sura isihiya yapipati Judiyaahandami aunahipihaiwa nahatewaarahapihyauni ami Jerusaremihanda bimohiyihya nahatiyauni Jonihoapipi komi piwiha atitaatiwi niyawaayopo. Naiwi Jonihomi piwiha atisawaawi kiyaami maipihaiwa ausaahauhi Joniho waapihaati Joritanihaata baawusataise.

⁶ Joniho sura maasapiho kamerihandami atitati nausohaati niyohore. Iyati tapaatipihouni apipaami mwaahouni nanataise. Iyati Joniho yamepati autaahi komi bwandipataapihi wisasanahore. ⁷⁻⁸ Iyati isihiyai piwiha ausaati satati kaundataase. “Utaaho wo ningi nanitipihaati apipaahi awaisiho nisi ipoti napitaise. Iyataati nini awaisihoninindaahandi kandi ko ningi nanitipihaati apipaahi awaisihore. Iyataati nini komi otipipatihoninindaahandi kandi otipipatihyaami kiyohipati kaindi nambititi komi asuipati nausohaumaamaito. Ami ninihi nehi waapohora sangi baasusataayoni ami Jisaasihohi sangisi Autaahaatihomi Itipihora baasusonihahi sahi noaipapi ko Autaahaatihomihahi yaatimatitaapo,” undataase.

Kima Piwima Joniho Jisaasihohi Baawusindihandapihaare
(Matiyuhohi 3:13-17; Rukiho 3:21-22)

⁹ Aihi suraanihi Jisaasihohi yapipati Garirihandami aunahipati Nasaretihanda namasi nasati Jonihoapipi noaipasihi Joniho waapihaati Joritanihaata baawusataise. ¹⁰ Siyati Joniho Jisaasihohi baawusihi Jisaasihohi nehihaati notataaheti jata yamihapati tiwatawamasihahi jataise. Aihi Autaahaatihomi Itipihohi koho dipihomatiyati autaahapi piriruti nasati Jisaasihomiheti bindataise. ¹¹ Aihi piwiha wa yamihapataatihapi Autaahaatiho Jisaasihohi saundataase. “Kinyi nisi Maasihohonitinihi maariho nahinyati ami gi maariho wihiwataati kinyapi nini maaritataayo,” undataase.

**Kima Piwima Bwaasirihiri Ko Napitaise Tati
Jisaasihoai Nunjesitihandapihaare
(Matiyuho 4:1-11; Rukiho 4:1-13)**

¹² Aihi sura ketinihi Autaahaatihomi Itipiho Jisaasihoai numwaasi yapipati isihiya iwiwiriho owehata notaise. ¹³ Siyati noti isihiya iwiwiriho owehapihi bimihhi waatiho wo sanawihhi wo nusaipataise. Siyati asisiha utaarihandeti bimihhi Bwaasirihiri Jisaasiho Autaahaatihomi piwiha nemaso ami napitaise tati nunjenataise. Siyati Jisaasiho kohasipihohaisataahihhi bimihhi Autaahaatihomi otipipatihhiya yamihapataatihapihiya napiwi koai anditiwipi iwitatamanawaayopo.

**Kima Piwima Jisaasiho Otipipati Namasati Garirihanda
Autaahaatihomi Piwiha Ausaasitihandapihaare
(Matiyuho 4:12-17; Rukiho 4:14-15)**

¹⁴ Joniho isihiyai waapohora baawusisiho aimi napwinjihhi Jisaasiho Garirihanda niyataise. Niyati Autaahaatihomi piwiha isihiyai iwitatamanitandihhi ausaati kaundataase. ¹⁵ Ausaati Isihiya usihiya asihiyai saundataase. “Autaahaatihohi isihiyai iwinjaati bimindihandi ausaimaninati waati noaipaitandi wani kimura akururandaati aimi nasati detindaise. Isi sahi maipihaiwa kiyohiwaiwa namasi japihi nepemaitiwi Autaahaatihomi piwiha gaaha waniha baiwi giwunyaapise,” undataase.

**Kima Piwima Isihiya Murimurapi Jisaasiho Gaatihhi Kiya Koai
Nuwipinjai Niyohitihandapihaare
(Matiyuho 4:18-22; Rukiho 5:1-11)**

¹⁶ Jisaasiho sata kaundamapi durihiri Garirihandainapi niyataise. Niyati utaahuri wuri saingihohi saaho ikihi araiho kipwinihonihhi noaitaatiwihihhi durihiraatihhi taami timasihhi kuri usonataise. Saahomi ambipati Saimonihore. O saingihohi ambipati Endiruhore. Kurami otipipati kaimi bimipati araiho noaitaatiwihati kaimi bindamaahure. ¹⁷ Aihi Jisaasiho kuri saundataase. “Isihiya nisihiyaimatitaatiwihiyai numwaitaatimihandapi nini sahuraasangi kaindisasitaani ningi nanipinjai namise,” undataase. ¹⁸ Uta kuri kaundihi keti kuraanihi kuri atimi ikihi araiho nosihihhi kapihhi ahotihhi namasi Jisaasihoai nuwipinjai niyamaise.

¹⁹ Aihi Jisaasiho wonji niyatosati jata Jemisihotihhi saingihohi Jonihotihhi kuri kopuhoti bindama taami ikihi gwinimi titihemasihhi winjataise. Suri utaasuri Sepetihohi mwaahure. ²⁰ Aihi Jisaasiho kuri iwinjatosa gaatihhi kuri kurami sapihohaisuni otipipatihhiyaisuni namasi Jisaasihoai nuwipinjai niyamaise.

**Kima Piwima Utaaho Womi Omañititihitipiho Maipihomi Bimihi
Jisaasiho Nemwasitihandapihaare
(Rukiho 4:31-37)**

²¹ Jisaasihotitihitipiho kingwaasititihitipiho naiwi aunahitipiho witi katami ambipatihitipiho Kapaniyamihanda bimauhi asisiha waiwa sanausotaise. Sanawitihitipiho Judaahiyaanami Sapaatihandeti^a Jisaasiho añañitihitipiho piwihitipiho (Autaahaatihitipiho giwunyaapi) isihitipiho ahoyanohañañitihitipiho nandaatihitipiho isihitipiho piwihitipiho ausaatihitipiho kataunjataise. ²² Kataunjitihitipiho piwihitipiho atiwisohiyihitipiho komi kataunjindihandapi waatihitipiho yaiwimawaapo. Isihitipiho amitihitipiho gaahaiwaisahitipiho Judaahiya sawanaami winihitipiho katiwunjuhoyihitipiho amatiyatihitipiho kataunjataamaise. Owetise. Kohi Autaahaatihitipiho watipihandisahosihitipiho kandi watipihandaatihitipiho kataunjataise. ²³ Sura utaaho wo komihatitihitipiho itipihitipiho maipihitipiho bindata ami iwinjatitihitipiho sandi anindaatihitipiho bindataise. Bindata sata gandaase. ²⁴ “Nasaretihandaahtipihitipiho Jisaasihitipiho kinyitihitipiho nehi Autaahaatihitipiho maaritimbipaahitipiho kaimbihonjititihitipiho nyahitipiho aimitihitipiho gisonaahitipiho aane. Isi kinyitihitipiho nyangitihitipiho nanyopisasititihitipiho napaatihitipiho napitihitipiho? Nehitihitipiho nyainjase?” undawaatopohitipiho. ²⁵ Saundauhitipihitipiho Jisaasihitipiho itipihitipiho maipihitipiho waapihitihitipiho saundataise. “Sahitihitipiho utaamoaitihitipiho namasitihitipiho kaahaamaatihitipiho nehitihitipiho bipitihitipiho noaipasihitipiho nuwite,” undataise. ²⁶ Sata kaunditihitipiho itipihitipiho maipihitipiho utaahitipiho nepitihitipiho waatihitipiho ahowitihitipiho kisihitipiho isiwitihitipiho waatihitipiho kaahaatitihitipiho noaipasihitipiho nowaayopohitipiho. ²⁷ Itipihitipiho maipihitipiho Jisaasihitipiho komi piwihitipiho atiwitihitipiho bipitihitipiho noaipasihitipiho niyauhitihitipiho isihitipiho sandi mmonawitihitipiho nahatitihitipiho yaiwimapi maaritihitipiho owesuetitihitipiho sawana sanawaatopohitipiho. “Kimanditihitipiho wanitihitipiho napitihitipiho noaipasihitipiho? Kimomitihitipiho kanyatindimanditihitipiho wanihanditihitipiho wipetahanditihitipiho watipihandehitipiho. Iyatitihitipiho ami itipihitipiho maipihitipiho waapihitihitipiho kaunditihitipiho bipitihitipiho atiwitihitipiho utaahomihetapitihitipiho noaipasihitipiho nowaayopohitipiho,” tiwitihitipiho kanawaatopohitipiho. ²⁸ Siyatitihitipiho Jisaasihitipiho kaihanditihitipiho piwihitipiho yapitihitipiho Garirihandamitihitipiho aunahitipiho nahatewaara nesitihitipiho kaniwitihitipiho gaamawaayopohitipiho.

**Kima Piwima Pitaahomihitipiho Sanohaamaatamitihitipiho Timbipa Jisaasihitipiho
Nemwatihitipiho Titihitipiho wisitihandapihaare
(Matiyuhohitipiho 8:14-15; Rukiho 4:38-39)**

²⁹ Siyatitihitipiho Jisaasihitipiho itipihitipiho maipihitipiho waapihitihitipiho nemwasitihitipiho ami kandi añitihitipiho namasitihitipiho noaipasihitipiho titihitipiho Saimonitihitipiho Endiruyaamitihitipiho añañitihitipiho nandaawaayopohitipiho. Aihitihitipiho ami Jemisiyitihitipiho Joniyaisangitihitipiho maasitihitipiho nomaisitihitipiho. ³⁰ Sura Saimonitihitipiho komi sanohaamaatihitipiho sisiha nusoaitihitipiho patitihitipiho yaawitihitipiho nanototihitipiho huraasitihitipiho kaatitihitipiho ketitihitipiho apaatihitipiho Jisaasihitipiho waapihitihitipiho kaundawaayopohitipiho. ³¹ Kaundauhitipihitipiho Jisaasihitipiho kaatihitipiho nanototimbipitihitipiho niyitihitipiho ikwitihitipiho iwiwatitihitipiho titihitipiho wisitihitipiho kaatihitipiho sisiha nusoaitihitipiho patitihitipiho busoatihitipiho owesuendaisitihitipiho. Aihitihitipiho kaatihitipiho Saimonitihitipiho komi sanohaamaatihitipiho kiyaatihitipiho nandapitihitipiho turihatitihitipiho turimanataise.

^a 1:21 Sapaatihanditihitipiho sanditihitipiho asisiha saararehura Judaahiya ikinohururaare.

**Kima Piwima Isihiya Timbipaisahiyai Kiyaami Timbipa Jisaasiho
Nemwati Titihemwasitihandapihaare
(Matiyuho 8:16-17; Rukiho 4:40-41)**

³² Aihi kura asahataahura ipiho aimi namaatipati asisiha napandosihi isihiya timbipaisahiyaisuni ami isihiya itipihoma maipihapa neti daahi ipihatisa bimisawihiyaisuni numwaasi Jisaasihoapipi nasawaayopo. ³³ Aunahipa sataahapihiya nahatiya aŋaŋami maasometeti masapipihoma ahoyanawaayopo. ³⁴ Isihiya timbipa kahapa kahapaisawihiyai nemwa titihiwiwa itipihoma maipihapai neti natausaasataise. Iyataati itipihoma maipihapa Jisaasihopi Autaahaatihomi Mwaahoso tiwi usoniwi gwinyaaahauhi Jisaasiho, “itipihonji maipihonji kaahaamaatime,” undati maahomwaaŋi neti nuwisapuwataise.

**Kima Piwima Jisaasiho Yapipati Garirihandami Aunahipihaiwaara
Daayati Piwiha Ausaati Kaundindihandapihaare
(Rukiho 4:42-44)**

³⁵ Asisihaatihu bowitandi asisepasihi Jisaasiho nanosipipihoma namasi niyati isihiya oweta watimihapihi Autaahaatihoi piwaundati gaapundataase. ³⁶ Siyati gaapundati bimihoma Saimonihouni komi naisihyauni Jisaasihopi daapi naiwi Jisaasihoi usonawaayopo. ³⁷ Usoniwi Jisaasihoi saundawaatopo, “Isihiya nahatiya kinyapi maahapihe?” tiwi daawaayopo undawaatopo. ³⁸ Undauhi Jisaasihomihoma piwiha wihoaŋiha kiyai saundataase. “Nini piwiha ausaitandi napitihoninisi ami aunahipihaiwa deti ahetiwaiwaraahapi nutihaawo nini piwiha ausaati isihiyai kaunditaano,” undataase. ³⁹ Sata Jisaasiho kaundamapaahi yapipati Garirihandami aunahipi nahatewaara gaamati daayati kiyaami aŋihaiwa kaiwaapihi piwihaapi^b ahoyanohipipihoma Autaahaatihomi piwiha ausaati kaundataase. Ausaati kaundati isihyaamiheti itipihoma maipihapa bimimbipai neti tahamanausoasati nemwataise.

**Kima Piwima Utaaho Womi Asaaha Pisapipa
Jisaasiho Nemwasitihandapihaare
(Matiyuho 8:1-4; Rukiho 5:12-16)**

⁴⁰ Utaaho wo asaaha pisapipaisaho nasati Jisaasihomi utatototi atotipiwesati bindataati Jisaasihoi sata nunjenataise. “Kinyi nisi asaaha pisapimba nepinimaitaapaahi kinyihandisi nepinimape?” undati nunjenataise.

⁴¹ Siyati nunjesihi Jisaasiho kopi maariho asipiwihoma namati ikwiri komiheti ahewisataati saundataase. “Kinyi asaaha pisapimba

^b 1:39 Ami aniwa saiwa Autaahaatihopi giwunyaapi gaapundohiwaiwaare.

nehimaitandi gaare. Isi kinyi noaipapi yaumbwimaninipi gaahonjimate,” undataase. ⁴²Jisaasiho sata kaundihi keti kuraanihi komi asaaha pisapipa owetihi noipati gaahondaise. ⁴³Aihi Jisaasiho koai piwiha watipiha sata kaunda natausaasataise. ⁴⁴“Kinyi baimbi atime. Isihiya usaisi kinyi asaaha pisapipa nehimahohitihandapi aho nenimasihe tipi usaisi apipaahi windi kamundime. Nehi titihi konjinihi numbwi utaaho pirisiho isihiyaami maipihaiwaapi Autaahaatihoi dipumanitandi nandapa tihisihoapipi noaipape. Koaapihi noaipapi kinyi ambipati nunjapi nandapa wapa nunye. Nunyamihhi Autaahaatihoi dipumanitandi ko tahane Mosesiho katati ahaisiheti japepihirato. Saimbi kaisamihhi isihiya gi gisonawa komi pisapipa aimi owesuendaise tiwi gisondaatiwo,” undati natausaasataise. ⁴⁵Sata Jisaasiho kaundihihandi kandi kahi noti isihiya nahatiyai ausaati nahataapipihi kaundati gaamataise. Aihi Jisaasiho sandapi namati aunahipihaiwaara isihiyaami ndiheti namoaipase. Owe. Nehihapihi isihiya owehapihi bimihhi isihiyaahihhi mihopi mihinapihiya koaapihi nasawaayopo.

**Kima Piwima Utaaho Wo Ikwauhiri Biwateti Namihatati Napohoi
Jisaasiho Titihemwasitihandapihaare
(Matiyuhō 9:1-8; Rukiho 5:17-26)**

2 ¹Asisiha aimi waiwa sanaihi Jisaasiho japihi Kapaniyamihandaahapi nasataise. Japihi napihhi isihiya Jisaasihopi aimi japihi nasataise tiwi kaniwi gaamatawayopo. ²Saiwi Jisaasiho aimi yamore tiwi atisawaawi isihiya taahiyihhiya napiwi ahoyanawaayopo. Isihiya anaanami deti maasomwaanjisangi tisaitiwi sisipa yondaise isihiya nandaitihira daihira apipaahi owetato. Aihi Jisaasiho Autaahaatihomi piwiha kiyai ausaati kaundataase. ³Aihi isihiya murimuri utaaho wo komi ikwauhiri namihata biwatehoai gwitihoti ahiyawwi tipwinji Jisaasihoapipi nasawaayopo. ⁴Tipwinji napiwi Jisaasihoapipi nandaito tiwi mmonawa isihiya tisaitataati nandaitihira daihira apipaahi owetihi namapi anihandami anitaupwataatihi koai nesi yamwaawaayopo. Nesi yamwaapi mihasini anitaupwataatihi bitotawa titihi Jisaasiho bitosisisini anitaupwa nawatawayopo. Nawataposawi utaaho gwitihoti kiyati nanototihhi wirihireti mihatihhi Jisaasiho bitosipipihhi nusoasawaayopo. ⁵Isihiya siya Jisaasihopi utaaho watipihosi nga utaamo kimoai titihemwaitaise tiwi giwunyaahohitihandi Jisaasiho usonataise. Usonataati utaaho ikwauhiri namihatisihoi Jisaasiho saundataase. “Nisi maasiho kinyi maipihaiwa nahatewa nini aimi nehimataayo,” undataase. ⁶Sata Jisaasiho kaundihi isihiya usa Judaahiyaami winihapipa katiwunjuhoyihhiya sa piwa atisawaawi kiyaami maarihoatihapi saiwi gwinyaawaayopo. ⁷“Kimo satindimandi, ‘Maasiho kinyi maipihandi nini aimi nehimataayo,’ tindimandi napaapise? Autaahaatihohihhi nga

maipihaiwa nemwaitaise. Isi kimo utaamo nini Autaahaatihoniniso tati Autaahaatihopi sisipihindaase,” tiwi kiyaami maarihoaatih omanjititihapi gwinyapenawaayopo. ⁸Saiwi kiya mimaipaiwi gwinyapenihauhi Jisaasiho keti usonataise. Usonatosa kiyai saundataase. “Sahi sami omanjititihapi napaapi saiwi gwinyapenihopo? ⁹Piwaamairi kimairami maahiwa nga napaisihaatitaise? Nini utaahoai saunditi, ‘Kinyi maipihaiwa nehimataayo,’ unditandiharo e ‘Kinyi yutihiri gwaumbwi nanopotingirihiri dopi nawopi isisi numwe,’ unditandiharo? ¹⁰Isihiya Autaahaatihomihiyaimatitaatiwihyaami saaho Awaisiho jiho isihiya nahatiyaami maipihaiwa nemaitandihoe tiwi mmoniwi gwinyaitaatiwi nini nasisitaani jasawise,” undataase. Saundatosati Jisaasiho ikwauhiri biwateti namihatisihoai saundataase. ¹¹“Nini gisi kinyi yutihiri gwaumbwi nanopotingipipa dopi bitotapa nawopi isisi numwe hitataato,” undataase. ¹²Aihi isihiya ikwauhiri biwateti namihatisihoai baiwi iwinjasauhi ko doti nga itipiwati bitonda komi yutihiri nawoti isisi kiyaami ndiheti aimi keti naihi usonawaayopo. Aihi isihiya sandi mmonawaawi aungwohandi waati yaiwimawaayopo. Yaiwimapi Autaahaatihomi ambipati mepi autaahepumwawaayopo.

**Kima Piwima Utaaho Wo Komi Ambipati Ripaihoai Jisaasiho Gaata
Numwaati Ningi Nanipinje Undindihandapihare
(Matiyuhō 9:9-13; Rukiho 5:27-32)**

¹³Jisaasiho jihara durihiri Garirihandaini taati naihi isihiya taahiyihya iwinjaposawi napiwi Jisaasihoapihi ahoyanihauhi Jisaasiho Autaahaatihomi piwiha kataunjataise. ¹⁴Siyati piwiha kataunjamapi noti anj windaapihi mmonata utaaho wo komi ambipati Ripaiho Aripiaasihomi mwaaho bimihī usonataise. So Ripaiso Romihanda Gamanihomi otipipati kaitandihō nawihō taakisihandi nesihore. Isi koai Jisaasiho saundataase, “Kinyi dosisi ningi nanipinje,” undataase. Undihi Ripaiho Jisaasihomi piwiha atiwisati keti dosi Jisaasihoai nuwipinjataise.

¹⁵Aihi Jisaasiho Ripaihomi anjan nandaati maasi Ripaihoaisati nandapa nanataise. Romihanda Gamanihomi otipipati kaitandihō nawihō nehohiyihyaatihi ami isihiya maipihatima isihiya usoniwi namahohitimatimaatihi Jisaasihoai nuwipinjai taahiyihya niyohiyihyaatihi Jisaasihotihī ami komi otipipatihyaatihi bindawa nandapa nanawaayopo. ¹⁶Saiwi Jisaasihoaisawi maasi nandapa taawi nanihauhi Judaahyaami winihapipa katiwunjohiyihya Parisihya usonawaayopo. Usonawa Jisaasihomi otipipatihyai saundawaatopo. “Kimo Jisaasimo isihiya maipihya gamanihomi otipipati kaitandihō nawihō nehohiyihyauni ami isihiya maipihatima isihiya mmoniwi mahohitimatimaisa nandapa napaapi nainje?” undawaatopo. ¹⁷Aihi Jisaasiho piwiha sa atisataati namati wihoanjiha sata kaundataase. “Isihiya timbipa owehiya ainahiyihya

dokitaahoapihi nowaamaayopo. Iyataati isihya satiwi, ‘Nyahi maipihaiwa kamaayaati gaahiyaanine,’ tiwi genanihohiyihyai japihi gandi numwaitandi napitihoninimahe. Sikatima maipihatima isihya mimaipaiwi usonimahohitimatimaami maipihaiwa nemwati japihi gandi numwaitandi napitihonine,” undati Jisaasiho kaundataase.

Kima Piwima Nandapa Onaayohitihandapihaare
(*Matiyuhu 9:14-17; Rukiho 5:33-39*)

¹⁸ Aihi asisiha waara Joniho^c Isihyai Baawusisihoai nuwipinjawi ko kaiwaiwa mmoniwi nepi kaiwi nuwipinjohiyihyaatihi ami isihya Parisihyaatihi Autaahaatihopi gaapunditaatiwi nandapa onaayawaayopo. Aihi isihya usa Jisaasihoapihi naiwi noaipapi koai satiwi nunjenawaayopo. “Isihya Jonihomi otipipati mmoniwi nepi kaiwi koai nuwipinjohiyihyaatihi ami Parisihyaami otipipati mmoniwi nepi kaiwi nuwipinjohiyihyaatihi Autaahaatihopi gaapunditaatiwi nandapa onaayawaayopo. Onaayauhiani kandi ami gi nangipinjawi kinyi otipipati mmoniwi nehohiyimiya napaapi onaamaayopo?” undiwi Jisaasihoai nunjenawaayopo.^d ¹⁹ Aihi Jisaasiho kiyai wihoanjiha piwiha sata kaundataase. “Utaaho apopaati neti wiraitandi timetisiho komihiyaisati maasi bimonih komihya nandapa windi onaamaitaapo. Owetitaise. ²⁰ Ami ko apopaati neti wiraitandi timetisihoai isihya numwaasi naisaihi ami ko komi naisihiyaisati windi bimimonih sura komi naisihya nandapa onaitaapo.

²¹ “Utaaho wo yutihiri napwirinihonihura gwindandi asirihiri ahiyati namihawati windi gimwindaise. O siyati jahirihirisati namihawati gwinihonaahi asirihiri watipindaati jahirihiri jihi napwirinjonyonji nusatipihati waahiwati awaindi napwirindaise. ²² Utaaho wo waapoho niwitandihura wipati pusa napuwahata waapoho asoho niwataamaise. Owetise. O ami wipati siyati pusa aimi napuwahati maipihata nihonaahi windi biyati jimaitaise. O utaaho wo wipati asipata waapoho asoho niwataataahi windi ajumaawati biyati jipiyonih nga maariho witati nandaise,” undati Jisaasiho kiyai kaundataase.

Jisaasiho Asisiha Sapaatihandami Awaisihore
(*Matiyuhu 12:1-8; Rukiho 6:1-5*)

²³ Asisiha wa Sapaatihandeti Jisaasihotih komi otipipatihyaatihi osaataati maasi daiwi bitopi nowaawi komi otipipatihya nandapa wapa

^c **2:18** Joniho Isihyai Baawusisiho so Judaahiyai Jisaasiho (Mesaiyaaho) napitaise undati piwiha ausaati kaundataase (Maakiho 1:4-8). ^d **2:18** Judaahiya Autaahaatihoai piwaundiwi nahowiwi gaapunditaatiwihura asisiha wiweti nandapa namaaniwi onaiwihyaare. Aiji ami kiyaaami maariho wapaapi asipaitaatiwihura nandapa namaaniwi namapi nehi bimaawihyaare.

witihandi kipowaayopo. ²⁴Saiwi kipwauhi isihiya Parisihiya usonawa Jisaasihoai saundawaatopo. “Kima asisiha ikindihaaha Sapaatihandeti kimiya isimiya gi nangipinjawi kinyi kaingiwaiwa mmoniwi nehohiyimiya nyami winihapipa Sapaatihandeti otipipati isihiya windi kamaiwise timbipa nepi nopisasiwi nandapa napaapi kipwopo?” undiwi Jisaasihoai kaundawaatopo.

²⁵Aihi Jisaasiho wihoaangaha kiyai sata kaundataase. “Jihura Daawitihon nandapa nandandihapa owetihi komihiyaisa jaumasih kaindihandapi sahi piwiha awitiwi mmoniwi gwinyaapihiyaato? ²⁶Siyati Daawitihouni komihyauni jihura jaumasih niyati Abaiyataahoai biretihanedi nepo undihi ami Abaiyataaho nandaati nandapa biretihanedi Autaahaatihomi ndiheti ahotitandi ahoyohitihandi neti numwihi ko nanataise. Sura pirisiho Abaiyataaho bimihihuraare. Sapa nandapa biretihanedi isihiya nehiiya nepi nandaatiwihapaamaahe. Owe. Nehi Pirisihiyaahih nandaatiwihapaare. Saitaatiwihapaatihandi kandi Daawitihon neti nanati ami komi isihiya koaisawitohohiyihiyai numwihi nanihopo,” undataase.

²⁷Saundatosati ami wa saundataase. “Asisiha Sapaatihandi isihiya nepi itatamanitaatiwi Autaahaatihon kiyati ahoyataamaise. Owetise. Asisiha Sapaatihandi isihiyai neti iwitatamanitandi Autaahaatihon kiyati ahoyataise. ²⁸Isi Nini Autaahaatihomi Isihyaami Saahonini Awaisihonini Jihonini asisiha sa Sapaatihandi kaindi ahoyohihoninisi ami nini niwahonini asisiha sa Sapaatihandami awaisihonine,” undataase.

**Kima Piwima Asisiha Sapaatihandeti Jisaasiho Utaaho Wo Ikwiri
Namihatati Biwatesihoai Titihemwasitihandapihaare
(Matiyuhon 12:9-14; Rukiho 6:6-11)**

3 ¹Aihi Jisaasiho japihi angaangi piwihaapi isihiya ahoyaniwi ami Autaahaatihonpi gwinyaapi gaapundohipihapi niyataise. Niyati nandaati mmonata utaaho wo komi ikwiri namihatati biwateho sapihi bimihon usonataise. ²Aihi isihiya usa Jisaasihoai iwinjatawayopo ami uta ikwi biwatesoai Jisaasiho asisiha Sapaatihandeti titihemwaso tiwo. Ami Jisaasiho koai titihemwahonaahi kinyi sandi asisiha ikinaati Autaahaatihonpi giwunyaitihaaha Sapaatihandi nepi nopisasiwi kiyapaise undiwi kaundito tiwo. ³Aihi Jisaasiho ikwiri namihatati biwatesihoai saundataase. “Kinyi dopi kimbihon isihyaami ndiheti nambi bitose,” undataase. ⁴Saundatosati isihiya nahatiyai ko sata nunjenataise. “Asisiha Sapaatihandeti gaahati kaitihaawo e maipihati kaitihaawo? Isihiya yaawati naangihaiwa nehohiyihon itatamaniniwi nga bimitaatiwi nyahi kiyai iwitatamanitahaawo e daahi yaawihaiwa nunyaati siyihiyai tiwaamaitihaawo?” undataase. Aihi kiya wihoaangaha wa kamundiwi kaunditihon owetihi nehon jatawayopo. ⁵Aihi Jisaasiho nahatiyai iwinjataati

apousataise. Apowindimandi kiya Sapaatihandapi waati gwinyaawaawi utaaahopi windi maariho asipimaawisauhi usonataate. Aihi Jisaasiho ikwiri biwateti namihatati maipitisihoai saundataase. “Kinyi kinyi ikwiri titihihi mbape,” undataase. Undihi ko atisati komi ikwiri titihiwati mbasihi keti kuraanihi noaipati gaatati sawanyinjapihirindaise. ⁶ Siyati Jisaasiho kaihi isihiya Parisihiya usoniwimapi nuwi keti awaisiho Erotihomihiyaisawi Jisaasihoai tiwataatiwhandapi piwiha kanawaayopo.

**Kima Piwima Isihiya Taahiyihiya Durihiri
Garirihandaini Ahoyanotihandapihaare
(Rukiho 6:17-19)**

⁷ Aihi Jisaasihotihini komi otipipatihya komi otipipati mmoniwi nepi kaiwi niwipinjohiyihiyaatihini durihiri Garirihandainapi kapihi namasi nowaayopo. Niyauhi ami isihiya taahiyihiya wirisandihandi Garirihandaahapihiya Jisaasihoai niwipinjai nowaayopo. ⁸ Isihiya Jisaasiho kaiwaiwaapi piwiha atiwi newaawi yapipati Judiyahandaahapihiyaatihini ami aunahipati awaipati Jerusaremihandaahapihiyaatihini ami yapipati Itumeyaahandaahapihiyaatihini ami yapihaiwa waapihaati Joritaanihaataihoani ahetiwaiwaraahapihiyaatihini ami yapipati Taiyaahandaahapihiyaatihini ami yapipati Saitonihandaahapihiyaatihini taahiyihiya wirisandihandi Jisaasihoapihi nasawaayopo. ⁹ Nasauhi Jisaasiho usonata isihiya taahiyihiya wirisandihandi ahoyanihauhi namati komi otipipatihyai saundataase. “Isihiya taahiyihiya waati ahoyanawaayowu nisihini waati nasawaawi nepi nihipi nihawitaawi kopuhoti yandihini durihiraatihini bindata piwiha ausaati kaunditaani kopuho wo nepi nimanewise ami isihiya ningi windi nepi nihipi maanihiwito,” undataase. ¹⁰ Jihini isihiya usai kiyaami timbipa nemwati titihemwasihini usopihyaasi kandapi ami usa timbipaisahiya koai numwihatiwi uwiwitaatiwi komihini deti deti nasawaayopo. ¹¹ Aihi itipihini maipihapaisawihiyaisangi nuwi deti Jisaasihomihini timahiyawi ahosauhi itipihini maipihini isihiyai timbipa nunya bimisiho kiyaamihetapi waati kaahaata Jisaasihoai saundataase. “Kinyi Autaahaatihomi Mwaahone,” undati kaundataase. ¹² Sata itipihini maipihini kaundihi Jisaasiho itipihini maipihapai, saundataase. “Itipihonini maipihapaarani nisi ambipati isihiya nahatiyaami ndiheti ausaapi kamaatime,” undati watipipati niwisapuwati kaundataase.

**Kima Piwima Jisaasiho Komi Otipipati Kaiwaiwa Mmoniwi Nepi
Kaiwi Niwipinjohiyihiya Sawana Otipipati Namihaniwi Kaitaatiwi
Natausaasitandi Neti Ahoyati Namihainjitihandapihaare
(Matiyuho 10:1-4; Rukiho 6:12-16)**

¹³ Jisaasiho niyati nasaamana sisihoaasini bindata komi gwinyaati maaritatu numwasawihyaapi gandaase. Gaatihini kiya nuwi Koai

winjawaayopo. ¹⁴Jisaasiho isihiya koaisawi maasititaatiwuni ami Autaahaatihomi piwiha awusaitaatiwi gaata numwaasawihya 12 kaiwi ikwimaindimwitihi auhirami yahuritahiyaare. Isi kiyai Jisaasiho ambipati witi asipati satati, “aposerihiyaate,” unda ambihundataase.^e ¹⁵Ami ko kiyai itipihoma maipihapa isihiyaamihetapi nemaitaatiwi watipihandi numwitandi gaataati numwaataise. ¹⁶Iyataati Jisaasiho komi otipipatihya ikwiri maindimwitihi ami auhirami yahuritahiya 12 kaiwihyai namihainjawihyaami ambipati kimate: Wo Saimonihoe. Ami koai Jisaasiho ambipati witi Pita unda nusoasataise. ¹⁷Aihi ami wuri Jemisiyi Joniye. Suri Sepetihomi mwaahure. Ami kuri Jisaasiho ambipati witi Boanesesihurahe undati ambihundataase. Sati ambitami tanyaaha “asoahaamataimihurahe,” undataase. ¹⁸Aihi ami usa kimiyaare: Endiruhoma Piripihoma Batiromiyuhoma Matiyuhoma Tomaasiho Aripiyaasihomi mwaaho Jemisihoma Taatiyaasihoma Saimonihoma isihiya Jerotihyaamihotihoma, ¹⁹ami Judaasihoma aunahipati Kariyotihandaahapihotihoma siyaare. Judaasihoma so Jisaasihoma ipotihura komi tiworisaami ikwiraatimasihore.

**Kima Piwima Isihiya Jisaasihopi Berisepurihomi Watipihanda
Otipipati Kiyataise Tohitihandapihaare
(Matiyuhoma 12:24-32; Rukiho 11:14-23, 12:10)**

²⁰Aihi Jisaasiho kaundati kiyamapi anaanji nandaasihoma ami isihiya taahiyihya waati ahoyanihauhi Jisaasihomoni komi otipipatihyauni nandapa nandaatiwhandi owe. ²¹Aihi Jisaasihopi isihiya satiwi, “Ko nandapa windi nandandihandi owetauhi,” ami komi saingoya sanaapwisa ami sanaati atisawaayopo. Saiwi atisawaawi, “Ko naharisataise,” tiwi gwinyaaapi koai numwaitaatiwi nowaayopo.

²²Aihi isihiya Judaahiyaami winihapipa katiwunjohiyihya Jerusaremhandaahapi napiwi Jisaasihopi satawaatopo. “Kimo utaamo Berisepurihoma Bwaasirihirisahore. Iyati Berisepurihoma itipihoma maipihapaami mitihomi watipihanda Jisaasiho itipihoma maipihapai nemataise,” tawaatopo. ²³Satauhi ami Jisaasiho isihyai numwaati neti ahoyati piwiha neti siwipati sitorihandi nepemaahiwati kataunjataise. Iyati saundataase, “Bwaasirihiri ami Bwaasirihiri napitiyati nemaitaise?” ²⁴Iyataati ami isihiya yapipati naasaipitaahapihya tunnawaawaahi baiwi windi bimimitaapo. ²⁵Iyataati ami wusasi nusulasi sawusasi tunnawaawaahi tunniwi natapaatiwi windi nga bimimitaapo. ²⁶Iyataati Bwaasirihiri wihiwihooanji natapaatatesi sawandiri tunnataataahi windi anditimitaitaise. Anditimitati neti nopisasinati owetitaise.

^e 3:14 Sati ambiti aposerihyaate undindimandami tanyaaha siyate, “Nini otipipati kiyonihoma nisoniwi nepi kiyohipati sawanaati kaitaatiwi nandisoasataayo,” undati ambihundataase.

²⁷“Iyataati utaahe wo watipihomi aŋaŋi ami utaahe wo topitaata nandaati ikipipa ikona namaitaise. Owetitaise. Nehi jhi aŋaŋami satihoai anitisa wirihira wisasati ahiyatosataahi nga komihapa ikona naitaise.

²⁸“Nini kimandi akitinihi sangi kasatitaano maipihaiwa nahatewa isihya katiwi kiyohiwaiwa Autaahaatiho nga nemwaitaise. ²⁹O ami isihya Autaahaatihomi Itipihohi Gaahopi maipihaiwa katiwi sisipitawaawaahi sandi kiya sisipitotihandi Autaahaatiho windi nemaamahonihi kandinihi ahotitaise,” undataase. ³⁰Jisaasiho sata kaundindimandi isihya usa kopi itipihohi maipihohaisahore tauhi kandapunje.

Kima Piwima Jisaasihomi Sanaati Saingoya Akiyihyaapihaare
(*Matiyuhu 12:46-50; Rukiho 8:19-21*)

³¹Aihi Jisaasihomi sanaatuni ami saingoya sanaapwisauni napiwi ipaahaapi bitotawa Jisaasihopi noaipasi nasane tiwi piwiha nusoasawaayopo. ³²Iyauhi isihya taahiyihya Jisaasihoaisawi maasi mihatihhi aŋititihhi koai otaatemapi bindawa saundawaatopo. “Kinyi kinaati kwinyihoya kinaapwisa kimiya ipaahaapi bitotawa kinyapi taawi gaatawaayopo,” undawaatopo.

³³Saundauhi Jisaasiho komiha wihoanjiha kiyai saundataase. “Nisi naati nisi nihoarisa naapwirisa diye?” undataase. ³⁴Saundatosa kaŋi aŋaŋi maasi Jisaasiho sawihoaisawi bimohiyihiyai winjataise. Iwinjatataati saundataase. “Kimiya nisi niya nisi nihoarisa ami nisi naapwirise. ³⁵Isihya Autaahaatiho maaritahi gwinyaaasihireti japepihrohiihiya siyaahihhi titihhi nisihiya akiyihya nisi nihoarisa ami nisi naapwirisa ami nisi naati siyaare,” undataase.

Kima Piwima Utaaho Wo Nandapaami Kwitaaho Osaataati
Tiwihaasihopi Siwipati Namihanahaare
(*Matiyuhu 13:1-9; Rukiho 8:4-8*)

4 ¹Jisaasiho jahira namasati durihiri Garirihandaini isihiyai Autaahaatihomi piwiha kataunjataise. Aihhi isihya apipaahi wirisandihandi komihini ahoyanihauhi ami ko wo kopuhoasini yamwaati durihiraatihhi deti aripataamihini bindataise. Aihhi isihya durihiraini deti aripataatihhi bindawaayopo. ²Jisaasiho kiyai piwiha siwipati nepemaahiwa taahiwaiwa kataunjataise. Iyati ko saundataase. ³“Atiwise. Utaaho wo komi osaataati nandapaami kwitaaho tiwihaitandi neti isisi notaise. ⁴Isisi noti kwitaaho osaataati tiwihaataise. Tiwihaasihhi nandapaami kwitaaho wapa daihira timahiyataise. Timihaihi koho nasati neti nanataise. ⁵Aihhi ami wapa kwitaaho nawiheti autaaahi yapihonya yahonyaahi ahotihihapihi timahiyataise. Siyati yapihonya

tiwatihaati yahonyaahihi ahotihihapihi timahiyataati ami yapipati nehi yaataatindaati keti kuraanihi nutataise. ⁶Nutati taati sanaihi ipiho ipindaati nawihetisi tihih tambatihiri baahi namotaati awaipindaase. ⁷Aihi ami wapa kwitaaho anipiho kaariha mwitoaipataatihi timahiyataise. Aihi anipiho kaariha mwitoaipati waati nawataati nandapaami kwitaaho nutisihoihi neti namaasati itaatihi gipwipwitati nehaayataise. Siyataati kapa nandapa biyati nga nawati ami nandapa yandipiho windi namingose. Owetise. ⁸Aihi ami isapipa kwitaaho wapa yapipati gaahata timihaimbipa nga nutati nga saniyati gwinyanati yandipiho akoho ningotaise. Siyati nga nawasipipaami wapa pihitati 30 kiyati nandapa yandipiho ningotaise. Aihi ami yandipiho wapa nandapa pihitati 60 kiyati ningotaise. Aihi ami wapa pihitati 100 kiyati ningotaise.” ⁹Aihi ami Jisaasiho satatosati isihiya koai atiwinjatohiyihiyai saundataase. “Sahi nisi piwiha atinisoihiyihiyaati piwiha sa sahi baiwi atiwi nepise,” undataase.

**Kima Piwima Jisaasiho Piwiha Siwipati Namihanati Katisihaapi
Sandapi Kato Undindahandapihaare
(Matiyuhu 13:10-17; Rukiho 8:9-10)**

¹⁰Ipoti wura Jisaasiho nehi sawahohihi bimih komi aposerihiya 12 kaiwihiyaatihi ami isihiya usa deti komihinitohiyihiyaatihi nuwi Jisaasihoai satiwi nunjenawaayopo. “Kinyi siwipati nepemaipi kanyatingihaami tanyaaha ausaapi kanyate?” undiwi nunjenawaayopo. ¹¹Aihi Jisaasiho wihoanjiha sata kaundataase. “Sangisaahi Autaahaatiho komi isihiyai iwinjatindahandapi noasandimbipa aimi neti nasisa gisunyaasihahi sahi aimi mmoniwi nehopo. Ami isihiya ipaahaapihiyaahi piwiha nahatewa nehi siwipati nepemaipihaiwaahihi atisawaayopo. ¹²Ami sandi tanyaaha siyate:

‘Kiya nisapi pihitiwi jambiwi windi akipipa mmoniwi namaitaatiwo. Aiwi kiya atiwi pihitiwi atimbiwi ami akipipa windi gimaawunyaata namusesapatitando. Ami kiya nga mmoniwi nepi ami giwunyaatati nusesipatonihahi nisenda japihi nepemaitiwi napisaihi nini kiyaami maipihaiwa nemwatipane,’ ndi piwiha siwipati namihandi kandaato,” *Aisaiyaaho 6:9-10*

undataase.

**Kima Piwima Jisaasiho Utaaho Wo Isapipa Kwitaaho Tiwihaasihopi
Siwipati Namihanati Katisiha Nesipati Katindahandapihaare
(Matiyuhu 13:18-23; Rukiho 8:11-15)**

¹³Aihi Jisaasiho komi otipipatihiyai saundataase. “Piwiha nepemaiti siwipati namihandi kasatohimaapi sangi gimaasunyainjo? Gimaasunyaatonaahi ami nini piwiha siwipati namihandi kasatohiwaiwa

nahatewa napitiyati gisunyaatitaise? ¹⁴Utaaso isapipa kwitaaho tiwihaaso so siyati utaaho Autaahaatihomi piwiha isihyaami omanjititih isapipa kwitaahomatiyati tiwihaati yamasihore. ¹⁵Isapipa kwitaaho daihira timihaihi koho neti nainjitimandi sandi isihya Autaahaatihomi piwiha atiwi nepi kiyaami omanjititih ahiyauhi Bwaasirihiri keti kuraanihi nasati Autaahaatiho komi piwiha kiyaami omanjititih yamatosisiha nemasitihandapi namihanahaare. ¹⁶Ami isihya usa isapipa kwitaaho nawiheti yapihonya nehi yaataati yahonya ahotihihapihi timihaisihomataiwihye. Kiya Autaahaatihomi piwiha kiyai katiwunjohiha keti maaritiwi atiwi nepi isiwatawaayopo. ¹⁷Nepi isiwatawaahandi kandi ka piwiha kiya atiwi nehотиha kiyaami omanjititih piwiha dahopeti gaamati baahi kiyai windi namusese. Aihhi kiya piwiha ka nehi masihonjapi isiwatawaayopo. Aihhi isihya usa Autaahaatihomi piwihaapi pohipaiwihya kiyai nepi uripatitaatiwi itihundiwi tiwauhi yaiwi keti kuraanihi piwiha namawaayopo. ¹⁸Ami isihya usa isapipa kwitaaho anipiho kaariha mwitaipataatihi timihaihi anipiho kaariha neti itaatihhi windi nga gimunyana gipwipwatati nehaisihomataiwihye. Siya Autaahaatihomi piwiha isihya kiyai katiwunjohiha atiwi newaayopo. ¹⁹Siya atiwi newaahandi kandi kiya mambihaiwa kiya baiwi nga bimitaatiwihaiwaapi pihitiwi gwinyapenihotihandi ami nawiho ikipipa nepi ahoyotihandi ami wiwa wiwa nehi maipihaiwaapaahihhi maariho nusoasawimahohitihandi tsaitati Autaahaatihomi piwhaihi neti itaatisataise. Aihhi ka piwiha kiyaami piwiha dahopa bimohirihiretapi isapipa kwitaahomatiyati gwinyanati akipipa yandipihhi nandapa windi nimaatati namingose. ²⁰Iyataati ami isihya usa isapipa yandipihhi yapipati gaahata timahiyati biya nga nuta saniya akipipa ahotati ningosipatamataiwihye. Siya isiya Autaahaatihomi piwiha kiyai katiwunjohiha atiwi nepi anitiwi isiwatohiyihye. Isi kiya piwiha atisohihaami nandapa akipipa kiyaamihetapi noaipataise. Usaamihetapi nandapa akipipa pihitati 30 kiyati ningotaise. Aihhi ami usaamihetapi pihitati 60 kiyati ningotaise. Aihhi ami usaamihetapi pihitati 100 kiyati ningotaise,” undati Jisaasiho kiyai tanyaaha nesipa ausaati kaundataase.^f

**Kima Piwima Norihiri Asatipati (Ramihandi) Tipopi
Yutihiraatihi Noasotihandapihaare
(Rukiho 8:16-18)**

²¹Aihhi ami Jisaasiho kiyai saundataase. “Utaaho wo norihiri asatipati (ramihandi) tipoti yutihiraatihi napapihati noasati ahaitaiso?

^f 4:20 Piwiha kimaami tanyaaha siyate: Isihya Jisaasihoai nunyaniwi komihiyaimatohiyihya isihya usa Jisaasihomihiyaimatitaatiwihiyai kiyaami piwiha dahopa bimohirihiretapi numwaawaawaahi sandi nandapa akipipa yandipihhi ningopi namoyaawaayopo.

Owetitaise. Ko windi siyati kamaitaise. Ko tipoti autaahiwati aupwipihi ahaitaise. ²²Siyati tipoti autaahihonihi wapa nahataapa asihatinditihini noaasandimbipa ausaimanitaise. Iyonihi ami wapa noaasandimbipa ausaimaninihonihi isihiya mmondaapo. ²³Sahi isihiyaati ningi nga atinisohiyihyaati baiwi atiwi nepise,” undataase.

²⁴Saundatosa ami Jisaasiho piwiha wa kiyai saundataase. “Piwiha wani nini kasatonihini atisohimaapi sahi baiwi gwinyaapise. Sahi isihiya usaisi wapa nunyohirihiri kireti japepihirati Autaahaatiho ami sangi nasamitaise. Nasanyati ami waati pihitahi tisaahiwati nasamitaise. ²⁵Iyataati ami isihiya usa Autaahaatihomihaiwa waati nga mmoniwi nehohiyihiyai Autaahaatiho ami waati pihitahi kiyai numwitaise. Ami usa Autaahaatihomihaiwa windi waati nga mmoniwi namehohiyihiyai ami nehi masihonya kiya mmoniwi nepi gwinyaahonyonya kiyaamihetapi ko nemaitaise,” undataase.

**Kima Piwima Isapipa Kwitaaho Nawasitihandapi
Jisaasiho Namihanati Katindihandapihaare**

²⁶Jisaasiho sata kaunda owematosa ami piwiha wa namihanaha kiyai saundataase. “Autaahaatiho komi isihiyai iwinjatindihandi siyate. Utaaho wo isapipa kwitaaho yapipataatihi niyaamati tiwihaasihomatiyahande. ²⁷Tiwihaatosati apatihini ami otapihaati nanihiyati utaaho nanoti nepati daaya bindataati isapipa kwitaaho ko tiwihaasihopi napitiya nutati gwinyanati nandapa akipipa ningoti ahotise tati windi mmonati gimunyaase. ²⁸Yapipatamihandisi yapipati sawandipi waapoho atipati numwihi isapipa nutati nawataise. Iyati yanisa saniyati kwitaaya nandawisa nandapa akipipa yandipihoni ningoti ahondaise. ²⁹Iyati nandapa akipipa akuraahaihi kapa kipwitaatiwi timetihihura mba niyaamati tiwihaasiho namatanaati neti kanaata tifatati kipotaise,” undati kiyai kaundataase.

**Kima Piwima Nandapaami Kwitaaho Maasitetihandapi Jisaasiho
Namihanati Katindihandapihaare
(Matiyuho 13:31-32; Rukiho 13:18-19)**

³⁰Jisaasiho sata kaundatosa ami wa saundataase. “Autaahaatiho isihiyai iwinjaati bindata komi kaindihandapi napitiya namihanaati katitihawe? Nyahi Autaahaatiho komi isihiyai winjatindihandapi siwipati maahiwiti namihana nepemahiwa katitihawe? ³¹Autaahaatiho komi isihiyai iwinjatindihandi nandapa isapipaami kwitaaho apipaahi turikaarehonji maasitetihandamatiyahande. Iyataati maasitetihandami kwitaaho apipaahi turikaarehonji osaataati yamapi tiwihaawaayopo. ³²Tiwihaahauhi ko kwitaaho nutati nawati ami osaataatami wapa ipi yandipihoni kwitaaho yamahohipipai nusatipihati keti gwinyana saniya apipaahi awaipatitahi ami kati isititi

saatitipiyataise. Ami katami isititi saatitihoei koho ainjihipipa nasati nga katih
sihwihatih itiha itaayati bimitaise,” undati Jisaasiho kiyai kaundataase.

Kima Piwima Jisaasiho Piwiha Namihana Nepemaahiwihaiwaahihi
Kataunjindihandapihaare
(Matiyuhu 13:34-35)

³³Jisaasiho piwiha saiwaamatiyahaiwa pihitahi siwipati namihana nepemaahiwa isi wirisandihiyai kiya nga mmoniwi nepi gwinyaitiwihamwaanji kataunjataise. ³⁴Ko siyati nasisoari piwiha siwipati nepemahiwa namihana kataunjataise. Iyataahandi kandi ami kouni komi otipipatihya koai niwipinjohiyihyauni nehi sawanaahi bindawaahura kaiwa piwiha nepemaahiwa namihana katiwaiwaami tanyaaha nesipati iwinjapwaati kiyai kaundataase.

Kima Piwima Durihiraatih Itinambitihiri Awaindi Waati Tiwayaasihi
Jisaasiho Kiri Yatihite Undindihandapihaare
(Matiyuhu 8:23-27; Rukiho 8:22-25)

³⁵Jisaasiho saiwa piwiha kataunjamapi sura asisih napandosura koai niwipinjohiyihya otipipatihyai saundataase. “Durihirami mihihinapi kopuhoti nutihaawo,” undataase. ³⁶Sata nutihaawo undih kiya atiwi kopuhu Jisaasiho aimi bimisihoti naapwaatawaayopo. Naapwaatiwi kapih isihya wirisandihiyai namasi Jisaasihoaisawi nowaayopo. Niyauhi ami kopuhu wiwaisangi maasi kiyaisa notaise. ³⁷Saiwi taawi niyauhi mbipa watipihapa durihiraatih dotaise. Iyati durihiri neti ahoyati tiwayaasihi ami nausih kopuhomi bopinini tiwayaati naweta ami mihatih kopuhoaatih waapihaati nandaati tsaitataise. ³⁸Aihi sura Jisaasiho kopuhomi ahosihopi dawaapipih yutihiri (kusinihandi) mitaapaitaatiwihiri mitaapa nanotondaise. Siyati nanototih komi otipipatihya owetitihahati kendaisi waapoho nanaati nawatisaanipani kinyi nyangi nyasonipi ginyunyaapaino?” undawaatopo. ³⁹Saiwi Jisaasihoai ahowimihauhi ko nepati mbipaisuni durihirisuni itihunda saundataase. “Mbiparaŋe mbimwaapi bipi namihaape. Ami durihirangisangi waati timipiyaapi bipi yatihitipi ahomaimbi nimande,” undataase. Sata Jisaasiho kaundihi mbipauni durihiruni yatihitati owendaise. ⁴⁰Aihi ko koai niwipinjohiyihya otipipatihyai saundataase. “Sahi napindapi yayopo. Nisapi sahi windi gimaanunyaahowo?” undataase. ⁴¹Aihi kiya sandi mmonawaawi apipaahi aungwohandi yaiwi sawana sanawaatopo. “Utaamo kimo napitetahondaatitindiho ami mbipa itipih itipinjitihanduni durihiri tiwayaasitihanduni komi piwiha atiwisati bipi keti owendaiso?” nnawaatopo.

Kima Piwima Itipih Maipihapa Utaaho Womiheti Bimihihapai
Jisaasiho Nemasitihandapihaare
(Matiyuhu 8:28-34; Rukiho 8:26-39)

5 ¹Aihi kiya Jisaasihotih komi otipipatihyaatih saiwi durihiri Garirihandi nahaitiwi mihihini nuwi yapipati ami aunahipati

taunihandi Geraasahiyaamihata noaipawaayopo. ²Notiwi Jisaasiho kopuho aimi namasi taati naihi keti utaaho wo itipihohi maipihohi bimohohi Jisaasihoai iwinjatosati napihohi nutanamaise. So utaaso itapipahohi ahiyohipihohi jomaahipati nawihaatihohi nanoti bimainjahohi katihohi nasisoaari bisotimbipihohi jomaahipataatihohi noaipasi nasataise.

³So utaaso itipihohi maipihohi nahateweti itapipahohi ahiyohipihohi jomaahipataatihohi nanoti bisondaahore. Iyataati isihiyaisangi ipipati gwihohi watipihohi aarahisangi windi andititihohi wimisasawihore. ⁴Isihiyahohi ipipati gwihohi anitihohi wisasawihohi ahiyauhisangi nehohi bipihohi nainjaatihohi ahiyami nahateweti konihohi notoaatihohi isihiyahohi anditititaatihohi owetihohi kaimbihohi namihaahauhohi. ⁵Iyataati apatihohi otapihohi jomaahipati itapipahohi ahiyohiwaiwaatihohi nanda noaipahohi sisiho sihoarihirihohi gaamati konyahata nawihaara sawahohi tunna namaudahore.

⁶Isi ko jata Jisaasiho kaanihohi wonjihohi taati napihohi keti ruhohi niyati Jisaasihohi utatototihohi timahiyatihohi komihohi atotipatihohi Jisaasihohi auhiraapihohi detihohi atotipihohi bindataise. ⁷Atotipihohi bindataatihohi Jisaasihohi waatihohi kaahaata saundataise. “Jisaasihohi, Autaahaatihohi nahatewai ipatisamatihohi autaahihohi yamihapataatihohi bimisihohi Mwaahohi, kinyihohi ningihohi napitinitaape? Nini Autaahaatihohi ambipataahihohi watipihohi waatihohi kahitataatonihohi kinyihohi ningisihohi yaasihohi windi namaaninyehohi,” undataise. ⁸Itipihohi maipihohi sata kaundindimandihohi Jisaasihohi amihohi aimi saundatihohi, “Kinyihohi itipihohi maipihohi, utaamohi kimoaihohi namasihohi noaipasihohi numwehohi,” undatihohi kaundihohi kandapise. ⁹Aihohi Jisaasihohi koaihohi saundatihohi, “Kinyihohi ambipatihohi napimahohi?” undatihohi nunjenataise. Nunjesihohi ko saundataise. “Nisihohi ambipatihohi Taahihonine. Sandihohi Taahihonine hitohitimandihohi amihohi itipihohi maipihohi taahiyihohi yanini bindihaawihohi hitohi,” undataise. ¹⁰Iyatihohi itipihohi maipihohi Jisaasihohi saundiwhohi, “Nyahihohi kimbihohi bimitihaawiyonihohi nepihohi natipinyoaasitainihohi, owehohi,” undiwhohi kaundawaatohi.

¹¹Aihohi kapihohi maasapihohi taahihohi sisihonjamihohi detihohi bitotawaayohi. ¹²Aihohi itipihohi maipihohi Jisaasihohi waatihohi kaahaatihohi saundawaatohi. “Jisaasihohi, nyahihohi nowahohi kimaiwahohi maasapimaiwaamihohi nandaitaani nepihohi natipinyoaasehohi,” undawaatohi. ¹³Satihohi itipihohi maipihohi kaundauhohi amihohi Jisaasihohi, “gaasihohi nuwhohi maasapihohi soetihohi nandaapisehohi,” undataise. Satatihohi kaundihohi itipihohi maipihohi utaahomihohi tapihohi noaipasihohi nuwhohi maasapihohi nandaawaayohi. Nandaahauhohi maasapihohi so taahihohi ambipatihohi owehandisihohi 2,000 kiyahohi nahatohi mihohi tapihohi ruhohi notihohi mihohi durihohi aatihohi nahandihohi witamataise. Siyatihohi nahatohi 2,000 kiyahohi durihohi aatihohi witatihohi waapohohi nanatihohi nahatohi konihohi napomataise.

¹⁴Aihohi isihiyahohi maasapihohi yamanihohi jaawihohi bitohohiyihohi sandihohi mmonihohi wimapi ruhohi nuwhohi isihiyahohi osaataatihohi bitohohiyihohi yaisunihohi amihohi aunahipata bimohiyihohi yaisunihohi kaundiwhohi gaamawaayohi. Aihohi isihiyahohi kiyahohi amihohi piwhohi atiwhohi mmonihohi wimapi ruhohi nasawaayohi. ¹⁵Kiyahohi

juhiti napiwi mmonawa utaaho itipiho maipihapa komiheti bimihiki konyahita naharisa daayatoatisiho naharindihandi owetati komi amitihia biyati iwinjapwaatihi nanihiyati uti apotina nanihiya bimihiki napiwi usonawaayopo. Kiya koai saiwi usonawaawi aungwohandi waati yayawaayopo. ¹⁶Aihi kiya utaaho itipiho maipihapaisaho Jisaasiho titihemwasihaoisuni ami maasapiho nahato durihiraatihi witati waapoho nanati napwindihanduni mmoniwi piwiha nesi nuwi isihiya nahatiyai kaundiwi gaamawaayopo. ¹⁷Aihi kiya saiwa atiwi mmonawaawi Jisaasihoai kiya namasawi saundawaatopo. “Kinyi nyami yapipati kimati namasi wapihapi keti kimikuraanihi dosisi numwe,” undawaatopo.

¹⁸Jisaasiho aimi japihi nutandi kopuhoti nasaamasihiki ami utaaho itipiho maipihaiwa komiheti bimihiki titihemwasihao Jisaasihoai nunjenati saundataase. “Nini gisati maasi nutaani kinyi gaare nde?” undati nunjenataise. ¹⁹Sata ko nunjesihi Jisaasihomiha wihoanjiha sata kaundataase. “Kinyi ningisapi windi namutaise. Owe. Isi nehi kinyi anjipihapi numwe. Numbwi ami kinyi kiwahonyihiya nahatiyai Awaisiho gisi gitatamanitandi maariho wihiwati ami gaahati kahisati ami itipiho maipihapa kinyihetapi nemasitihandapi piwiha ausaapi kaunde,” undataase. ²⁰Sata Jisaasiho kaundihi ko keti kuraanihi kapihi namasi noti aunahipa witi katami ambipati aunahipa awaipati taunihandi Dekaporisihandi Ikwimaitimohata noaipataise. Sapihi noaipati ko satati, “Jisaasiho itipiho maipihapa nisiheti bimimbipa nenimasihiki nini noaipati wani gaahonine,” undati komihiyai piwiha ausaati kaundataase. Kaundihi isihiya komi piwiha atisawaawi ese tiwi maariho owetihiki yayiwimapi aatimawaayopo.

**Kima Piwima Jairaasihomi Metihaati Aimi Napomasihaati Jisaasiho
Japihi Ahowimati Ami Apopaati Waati Komi Apotihiri Iwisihiki Kaatami
Timbipa Owetindihandapihaare
(Matiyuhu 9:18-26; Rukiho 8:40-56)**

²¹Aihi Jisaasiho japihi kopuho nesi Garirihiri durihiraatihi nahaita mihihini notataise. Notati durihiraini aripataatihi bitosihiki isihiya koai iwinjaposawi taahiyihiya koaapihi napiwi koai otaatemapi ahoyanawaayopo. ²²Aihi sura utaaho wo Judaahiyaami anjani piwihaapi ahoyanohaanaani jatisiho komi ambipati Jairaasiho Jisaasihoai usonatosati noti komi utatototi timahiya ahondaise. Timahiyati Jisaasihomi auhiraapihi ko atotipiwesataise. ²³Timahiya atotipiwesati ahondaati Jisaasihoai gouseti saundati nunjenataise. “Nisi maasihaama metihaati aimi napwitandi detisi ami kinyi kinyi ikwiri kaati ahiwitaapi namme. Ahiwisamihiki kaati japihi nepati nga bimitando,” undataase. ²⁴Sata Jairaasiho kaundati nunjesihiki ami Jisaasiho komi nunjesiha atiwisati koaisati maasi komi anjipihapi notaise. Siyati koaisati

maasi naihi isihya taahiyihya wirisandiwi komihini numwihatiwi nowaayopo. ²⁵Aihi kiyaami otihatihapi apopaati waati kinaungwiha pihitati 12 kiyahaiweti jitimainjihaati kiyaisati maasi notaise. ²⁶Saati apopaati dokitaahiya taahiyihyai iwinjasihi kiya kaati yaawihandi pihitiwi nunyauhi nenjihaate. Iyati kaatami nawiho aungwohandi kiyai nunyainjihaate. Iyataahandi kandi windi gaamausetati daahi maipitati jitimainjihaate. ²⁷Siyati jitimati ketinjihaatisi Jisaasiho kaiwaiwaapi atisataati koenda nasataise. Nasati Jisaasihomi ipoti dawaataati notaati Jisaasiho apotihiri nipata niyosirihiri isiwataise. ²⁸Kaati Jisaasihomi apotihiri isiwati numwihatindimandi kaati siyati gwinyaataate. “Nini Jisaasiho apotihiri niyoti nipaatihiri numwihatiti ami iwisanihisangi nisi timbipa jitimatoaasohitihandi nga owetitaise,” tati andititati giwunyaasitihandahe. ²⁹Siyati kaati Jisaasihoai numwihatiti kaatami jitimatoaatindihandi keti kuraanihi owetati jitipa dihiwati niyaipasihii mmotinataati aimi noaipati gaahaanine tati gwinyapenataise. ³⁰Siyati apopaati Jisaasihomi apotihiri isiwihii komi watipihandi windi aimi apopaatamiheti naihi mmotinata keti kuraanihi nepemaitati kapihi isi wirisandihyai saundataase. “Utaatindi ndi nisi apotihiri nise,” tati nasenataise. ³¹Aihi komi otipipatihya Jisaasihoai saundawaatopo. “Isimiya metati kinyihini napiwi nangimatiwi mipanindisaatimaati nasenipi ndi nanimihatati nise tipi namaasenime,” undawaatopo. ³²Satiwi komi otipipatihya kaundauhiani kandi wiwati numwihatindihandi nde tati usondandi nepemainana mihini mihini jataise. ³³Aihi kaati apopaati kaatami jitimasitihandi owetihii mmotinata aungwohandi yayati itipi nasati Jisaasihomi utatototi timahiyataise. Siyati kaati komi auhiraapihi atotipiwesati bindata kaatami timbipa jitimatoaatindihandi Jisaasihomi apotihiri iwisura dihiwati nipiyaipasitihandapi titihii ausaati koai kaundataase. ³⁴Aihi Jisaasihomiha kaati saundataase. “Maasihaamo nisapi kinyi satipi, ‘Koai nini numwihatiti wisanaahi nisi jitimahohitihandi nga owenetitaise,’ tipi kinyi ginunyaahingitihanda kinyi jitimapoatingitihandi owesendaise. Isi kinyi jitimahingitihandi owendaisi kinyi maariho wihita napaisatitonihii numwe,” undataase.

³⁵Siyati Jisaasiho kaati taati kaundihi Jairaasihomi anjipihapihiya piwiha isisi noaipapi Jairaasihoai saundawaatopo. “Kinyi kimaamaati aimi napwisi napaapi nehiani kataunjisihoai pohirundipi kaundise?” undawaatopo. ³⁶Ami Jisaasihohi kiya Jairaasihoai kaundohiha windi atihomaawise. Nehi metihaatami sapihoai saundataase. “Kinyi windi yamaime. Owe. Nisapi ko nga nisi metihaati titihiiwitaise tipi nehii ginunyaape,” undataase. ³⁷Aihi taahiyihya niwipinjai niyohiyihyai saundataase. “Sahi nahatiyaati nanipinjai namaapiwise,” undataase. Saundatosati nehii Pitaahoaisuni Jemisihoisuni ami Jemisihomi

saingiho Jonihoaisuni numwaasi nehi kingwaasisataahihi Jairaasihomi anjipipihi notaise. ³⁸Jisaasihotihiki kiyaatihiki nuwi Jairaasihomi anjipipihi noaipawaayopo. Noaipapi Jisaasiho mmonata isihiya pihitiwi nuna tiwi gwiwi nehotauihi usonataise. ³⁹Aihi Jisaasiho nandaati kaanji taawi gwiwi nehotohihihiyai saundataase. “Kimaati metimaati napotaamaise. Owe. Nehi nanotondaise. Isi sahi napaapi taawi gwopo?” undataase. ⁴⁰Sata Jisaasiho kaundihi kiya ko kaundisihaapi etitaatindaase tiwi sisawaayopo. Aihi kiya nahatiyai neti ipaahaapi natausaasatosati metihaati kaatami saniyi sapiyaisuni komi otipipatihingwaasisuni numwaasi maasi metihaati napoti ahotimbipihi nandaataise. ⁴¹Nandaapi bitotawa Jisaasiho metihaati napomasaamaatami ikwiri neti iwiwatata piwiha sawanaamihaara saundataase, “**Tarita Kumwi,**” undataase. Sandi **Tarita Kumwi,** undindimandi saundataase. “Metihaanje, Nini gi kahitataatoni kinyi nepapi dopi bitose,” undataase. ⁴²Sata Jisaasiho kaundihi kaati keti kuraanihi Komi piwiheti nepasi daayataise. Saati metaatami kinaungwiha 12 kiyahaate. Aihi isihiya anaanji Jisaasihoaisawi nandaahohiyihiya sandi mmonawaawi apipaahi aungwohandi waati yaiwimawaayopo. ⁴³Yaiwimihauihi Jisaasiho kiyai saundataase. “Kimaati metimaati titihiwihonihi nepasitimandapi isihiyai ausaapi apipaahi windi kamundimapise,” undati watipititi kaundataase. Iyatosati ami saundataase, “Metihaati nandapa wapa nanda nunyawise,” undataase.

Kima Piwima Jisaasihoai Sawahomi Isihiya Nasaretihandaahiya
Ahosumwahotihandapihaare
(Matiyuhu 13:53-58; Rukiho 4:16-30)

6 ¹Sati aunahipita Jisaasiho metihaati titihwiwa kiyamapi kapihi namasi titihi komi aunahipataahapi notaise. Naihi ami komi otipipatihiya maasi Jisaasihoaisawi nowaayopo. ²Nuwi noaipapi asisiha Sapaatihandeti Judaahiyaami anaanji piwihaapi ahoyanotihandaatihiki Jisaasiho nandaati namasati Autaahaatihomi piwiha kataunjataise. Kataunjihi isihiya nahatiya Jisaasihomi piwiha atisawaawi aungwohandi yaiwimaposawi satawaatopo. “Kimo utaamo amitiha gaahandi gwinyaasitihandi maahapihapi nehende? Iyati ko piwiha maahapihapi atisa nehe? Iyati ami watipihandi napitiya mmonati neti giwunyainjihi watipihaiwa kaindihohi? ³Kimo utaamo Maariyaahaatami mwaahoro? Komi saingoya Jemisiho Josesiho (komi ambipati witi Josepiho) Judaasiho Saimoniho ami sanasihiya kimbihini nyangisawi maasi bimohiyimiyaami saahoro? Iyati ko jihini otipipati anaanji anjimatitaatiwihati kiyati bimisihoro?” tiwi katiwi mimaipaiwi usonawaawi kopi windi maarimitiwi Jisaasihoai ahosumwawaayopo. ⁴Kiya saiwi kiyauhi Jisaasiho kiyai saundataase. “Autaahaatihomi piwiha

atisati neti ausaasiho aunahipati titihi nehi ko sawahomihataahuni ami ko nehi sawahomihyaamihatihihuni ami ko nehi sawahomi anjipipihini saniya sapiya saingosaahoya sanaanisa sanaapwisaamihatihuni ko ambipati awaipati owehore. O ami ko komi aunahipati namasi noti aunahipa wita ami isihya nehi kiyai usaapihi Autaahaatihomi piwiha ausaataataahi ami kapihi ko ambipati awaipati netaise,” undataase. ⁵Saiwi kiya Jisaasihoaisuni komi piwihaisuni ahosumwahauhi ko watipihaiwa komi aunahipata kiyaami ndiheti windi kamaise. Owe. Nehi ninaasiyaisaahihi ikwiri ahiwisati kiyaami timbipa nemwataise. ⁶Komihya Autaahaatihomi piwihaapi baiwi windi gimunyaahauhi sandapi Jisaasiho waati aungwohandi gwinyaataise.

Kima Piwima Jisaasiho Komi Otipipatihya 12 Kaiwihiyai Otipipati Kaitaatiwi Numwindihandapahaare

Aihi Jisaasiho kapihi namasi aunahipati kahati kahataahima noti daayati Autaahaatihomi piwiha isihiyai kataunjataise. ⁷Jisaasihomi otipipatihya 12 kaiwihyaasi kiyai ko numwaati detematosati itipihoma maipihapa isihyaamiheti bimonihapai nepumwaitaatiwi ko kiyai komi watipihandi nunyataise. Komi watipihandi nunyati neti tipitapaati yahuri yahuri wapihi wapihapi natausaasataise. ⁸Siyati natausaasataati piwiha wa watipihana sata nunyataise. “Nini sangi nandisoasisanihi sahi nowaawi kahapaamapipa wapa mipi nehi taanahiyaati nuwise. Nehi sami ngirihirihihini mwitipisawi daayohirihirihihini isisi nuwise. Ikihi ami nandapa biretihandi ami nawiho ikiha kipiwi windi mipi nehi taanahiyaati nuwise. ⁹Iyataati ami sahi asuipatihini gaasi nipaatiwise. Aiwi ami apotihiri nehi sami ambipateti niyopi nipaatohipipaahitane. Iyawaahandi kandi ami apotihiri wapa isipipa windi mipise. Owetane. ¹⁰Sahi nuwi aunahipati wita noaipapi ami ajaanji wangaapihi nandaawaawaahi sapihi kapihi bimambiwi aunahipati namasi nowaahura ajaanji saanji namasi kapihi noaipasi nuwise. ¹¹O ami sahi nuwi aunahipati wita noaipasahi isihya windi sapi maaritiwi namaasamaapi piwaamaasatiwi ami sami piwiha atihomaasisaihaahi kandi kiyaami maipihandapi, ‘nyamihandimahe samihande. Isi kandapi Autaahaatihoma wihoaanjihandi nasamitaise,’ undiwi nunjitaatiwi sami auhirami atasahaapihi ikwaatipihoma namaasandimbipa kapihi tiwihaapi nemapi nuwise,” undati piwiha itatamanati winihundati kaundati natausaasataise.^g ¹²Siyati Jisaasiho natausaasihi nuwi isihiyai saundiwi, “Sahi sami maipihaiwa kiyohiwaiwa namapi nepemaitiwi ami Autaahaatihoma napewise,” undiwi Autaahaatihomi piwiha

^g 6:11 Ami saiwi kiyohitmandi isihiyai saundiwi nyahi sangisenda windi japihi namaapito kiyaatangisinihi nasamihaayo undiwi siwipati nunjawaayopo.

ausaawaayopo. ¹³ Aiwi kiya Jisaasiho watipihandi numwindihanda itipihoma maipihapa taahiwaiwa isihiyai timbipa nunyati bimiwaiwai nepi tahamaniwusoasawi nemawaayopo. Aiwi ami atipati oripihati noaapi isihiya taahiyihiya timbipaisahiyai iwinjaahauhi kiyai gausoendaise.

Kima Piwima Joniho Isihiyai Baawusisiho Napwindihandapihaare
(*Matiyuhu 14:1-12; Rukiho 3:19-20, 9:7-9*)

¹⁴ Jisaasiho komi otipipatihyaisati otipipati kaindahandi nga auta noaipasihia ami isihiya nahatiya mmonawa gaatihia kandapi aunahipati nahatewara kaniwi gaamatawayopo. Aihia ami sandapi isihiya piwihana nesi kaniwi daayohiyihiyaaami usa satawaatopo. “Jonihohi Isihiyai Baawusisiho so animwaahipatombi saiwana kaitandihia watipihandisa nepasi isihiyana kamaitaahetahaiwana watipihaiwana kiyataise,” tiwina katawaatopo. Satauhina ami awaisihohi Kijihohi Erotihohi piwihana sa atisati netaise. ¹⁵ Aihia ami usa satawaatopo. “Kimo utaaamo Eraijaahohi,” tawaatopo.^h Aihia ami usa satawaatopo. “Autahaatihohi piwihana atiwi nepi jihurana ausaapi isihiyana kaundohiyihiyaaamatihyaho wo noaipana watipihaiwana aungwohaiwana kiyataise,” tiwina Jisaasihohi katawaatopo. ¹⁶ Satiwina isihiyana katauhina awaisihohi Erotihohi piwihana sa kaahihina atisana netaise. Siyati kaahihina atisataati ko awaisihohi Erotihohi sandaase. “So Jonihohi nini naahutarihirina nisatonihina aimina napwisihohi ami ko japihina animwaahipatombi nepatete,” tati kandaase.

¹⁷⁻¹⁸ Apopaati waati kaatami ambipati Erotiyaasihahaate. Ami saati Erotihohi saingihohi Piripihohi apwaataate. Piripihohi apwaataatitihandihandi kandi awaisihohi Erotihohi kaati aunihiwisati neti wirataise. Siyati neti wirasihina kandapi Jonihohi Isihiyana Baawusisiho konihina jinjihaati awaisihohi Erotihohi saundataase. “Kunuyihohi Piripihohi apwaataati nepi wirahingitimandihana winihapipana nepi nopisasipina kiyapainina sandina titihimaahe maipihandihana kiyapaise,” undati itihundataase. Siyati Jonihohi Isihiyana Baawusisiho Erotihohi kaundihi kandapi awaisihohi Erotihohi apowihina namati tingaatihaisahiyana natausaasihina nuwina Jonihohi Isihiyana Baawusisiho isipina numwaasi nuwina isihiyana napwitohipipihina ipipati watipihana wisasawina napuwawaayopo. ¹⁹ Erotiyaasihahaati Jonihohi Isihiyana Baawusisihohi apipaahina aungwohandihana apowihina Jonihohi sohoai timapise unditihati kati Erotihohi awaisihopimainjihina windihana kaundati kamaise. Owe. ²⁰ Ami Erotihohi Jonihohi yayati ami koai Erotihohi biyati iwinjatihohi. Iyati ami Jonihohi Autahaatihohi ndihetihana utahohi apipaahina gaahohi titihotihina Erotihohi yayati gwinyaataato. Iyati ami Jonihohi piwihana ausaasiwaiwana Erotihohi omanjititihina neti nusopiasinjihandihandi kandi ami Erotihohi Jonihohi maaritahina komi piwihana atiwisataise.

^h 6:15 Eraijaahohi so Kirasihohi sangina noaipasihina kinaungwihana taahiwaiwana gimunyaatahaiwana jihina aimina bimainjati napwihohipitopo.

**Kima Piwima Jisaasiho Isihiya Taahiyihiya 5,000 Handi
Nusatipihaapihiyai Nandapa Numwindihandapihaare
(Matiyuhu 14:13-21; Rukiho 9:10-17; Joniho 6:1-13)**

³⁰ Isihiya Autaahaathihomi piwiha ausaapi kaunditaatiwi Jisaasiho natausaasisawihya aposerihya japihi napiwi kiya kiyohiwaiwaapuni ami katiwunjohiwaiwaapi Jisaasihoai kaundawaatopo. ³¹ Aihi isihiya wirisandihandi Jisaasihoapihi nuwi napiwiyawaasauhi ami Jisaasihouni komi otipipatihyauni ikiniwi nandapa nandaatiwihura apipaahi owendaise. Saimainjihi namati Jisaasiho komi otipipatihyai saundataase. “Isihiya owehapihi apipaahi watiminhapihapi nehi titihi yawanaani nutihaawo ami sahi mbipa baiwi nepi maariho witiwi ikindaatiwo,” undataase. ³² Sata Jisaasiho kaundihi kiya atiwi nehi sawanaahi kopuhu woti Jisaasihoaisawi wapihi isihiya owetati apipaahi watiminhapihapi nowaayopo.

³³ Saiwi kopuhoti niyauhi ami isihiya taahiyihiya kiyai iwinjawaayopo. Saiwi iwinjaposawi isihiya taahiyihiya aunahipihaiwa nahatewaraahapihiya Jisaasihoaisawihya niyohipihapi auhiraapihi durihiraini wihoanji nowaayopo. Numbiwi Jisaasihoaisawihya mehiyauhi kiya jihi nuwi noaipapi timaniniwi bindawaayopo. ³⁴ Aihi Jisaasiho komi otipipatihyaisati kopuhoti ipoti noti timahiyataise. Timahiyati kopuhu namasi ko isihiya wirisandihandi usonata kiyaapi maariho aungwohandi tundataise ami kiya sipisipihandi satiho owehandamataiwihyaatiho. Aihi ami ko namasati piwiha taahiwaiwa kiyai kataunjataise. ³⁵ Siyati Jisaasiho kataunjihi aimi ipiho tipateti namaatipaitandaihi komi otipipatihya napiwi koai saundawaatopo. “Kimbihis isihiya windi bimimaawi owehapihisi aimi ipiho noti napwihataise. ³⁶ Isimiya kimiyai nepi natipusoaase kiya nuwi sawana osaataati nandapa niyamahohipihuni ami aunahipihaiwaara yahapihi deti nandapa mmoniwi nawiho nunyawu nepi nando,” undawaatopo. ³⁷ Aihi Jisaasiho wihoanjihi komi otipipatihyai saundataase. “Sahi sawanaati isimiya kimiyai nandaatiwihapa nunyawu,” undataase. Ko saundihi ami kiyaamiha koai saundawaatopo. “O ami nyahi kiyai napindi numwitihaawe? Kinyi nyangi natipinyoasisamihis nyahi nowa nawiho ikihuri yahura nandapa biretihandi nga newa kimiyai isimiya nga nunya gaamaitaano?” undiwi nunjenawaayopo.

³⁸ Aihi Jisaasiho kiyai saundati nunjenataise. “Nandapa biretihandi sahi napitaiwi isipihyaate? Nuwi mmoniwise,” undataase. Aihi komi otipipatihya nuwi kiyaami nandapa biretihandi awitiwi mmonawaayopo. Mmonawa biretihandi 5 kiyati ikwiri naasairitihis ami araiho 2 kiyati yahuritihis kipwindihis mmoniwiwimapi Jisaasihoai saundawaatopo. “Biretihandi 5 kiyati ikwiri wihitihiritihis ami araihuri 2 kiyati yahuritihis kipwindataise,” undawaatopo.

³⁹Saundauhi ami Jisaasiho komi otipipatihiyai saundataase. “Sahi isimiyai nepi tipitapaapi kitarihiraatihi yatihim bimita kihonji kihonjaapihi ahoaiwi ahiwisai nuwise,” undataase. ⁴⁰Saiwi nepi kihonji kihonjaapihi ahoyauhi ami isihya 50 kaiwisangi ami 100 kaiwisangi kihonji kihonjaapihi bimai nowaayopo. ⁴¹Saiwi bimauhi Jisaasiho nandapa biretihandi 5 kiyati ikwi wihitihiritihi ami araihuri 2 kiyati yahuritihim netaise. Neti isiwatata autaahi yamihapataatihi jatata sapa nandapaapi Autaahaatihoai, “Kinyi gaahone gaare,” undataase. Sata gaare undatosati Jisaasiho biretihandi neti naumboti araihoaisati ahoyati komi otipipatihiyai nunyataise ami kiya nepi isihiyai nunyawim gaamaitaatiwo. ⁴²⁻⁴³Nunyawim gaamihauhi isihya siyati ahoyainjitihandi kiyaami maaritohirihireti nanimbiwi gaata gwisihim yaawihim nawipipa biretihandi araiho kanaahipa ahotimbipa otipipatihya asiwi nepi ikihaiwa 12 kiyahaiwa tisaipi kipowaayopo. ⁴⁴Sandi nandapa biretihanduni ami araihouni isihya nanihohiyihyaami nehi usihyaahihim awitauhi 5,000 kaiwihyaare. Ami asihyauni ami manyinyauni windi awimitopo, owetise.

**Kima Piwima Jisaasiho Durihiraatihi Autaahi
Itipa Daimi Naindihandapihaare
(Matiyuhu 14:22-23; Joniho 6:16-21)**

⁴⁵Saiwi nandapa naniwi owetihim keti kuraanihim Jisaasiho komi otipipatihiyai tariwundati kopuhoti yamwaasim durihiraatihi wihim nahaitiwim aunahipati Betisaitaahandaahapim jihim taawim nutaatiwim kaundataase. Iyati ko isihiyam kiyaami aunahipataahapim neti natausaasitandim kapihim daahim bindataise. ⁴⁶Siyati isihya nahatiyam natausaasamapim Jisaasiho nehi sawahohihim Autaahaatihoaim piwaundati gaapunditandim sisihoaasim nasaamanataise. ⁴⁷Aihim aaim asihananaataatihi Jisaasiho ko taati gaapundimbipihim ikatihaati bitonda jata komi otipipatihya aaim durihiramim otihaati kopuhoti taawim niyauhim iwinjataise. ⁴⁸Iyati Jisaasiho komi otipipatihiyam iwinjatab mipa waatim mbwaatim kiyaisunim amim kiyaami kopuhohim neti kwitiwam ikipindam tiwandihim kiyam bipim ahiyawim nepi taawim sailhiram kopuhohim aisim niyauhim iwinjataise. Siyati ko kiyam iwinjatosa kapihim ikatihaati bitonjatim aaim bowitandim detitihim 3 kirokihendamunim amim 6 kirokihendamunim otihamwaanj Jisaasiho durihiraatihi itipati daimim autaahim nasataise. Iyati ko kiyam bipim nusatipaito tati taati nasataise. ⁴⁹Siyati kiyam nusatipaito tati durihiraatihi autaahim daimim napihim komi otipipatihya koaim keti iwinjawaayopo. Saiwi iwinjaposawim kiya kopim naahirisam panaahaisim tiwim gwinyawaawim kiya yayiwim kaahaatawaatopo. ⁵⁰Kiyam koaim iwinjawaawim yayawaayopo. Yayauhihandim kandim amim keti kiyam Jisaasiho piwaundati saundataase. “Sahi windi yamawise. Nini Jisaasihoninisi sahi nepi

andititiwise,” undataase. ⁵¹ Saundamapi Jisaasiho kopuhoti yamwaati komi otipipatihiaisati maasi bindataise. Aihi ami mbipa waati mbwaati itipinjitihandi yatihitati owendaise. Aihi komi otipipatihia apipaahi awaindihandi maaroamapi yaiwimawaayopo. ⁵² Saiwi kiya aungwohandi maaroamapi yaiwimahohitimandi ami kiyai Jisaasihopi windi namausesipainjihe. Iyati ami ko watipihandi kiyati biretihandi 5 kiyahandi isihia taahiyihiai naumboti numwindihandapi kiya windi gimunyaawaawe ami Jisaasiho wapa wapa nga kaitaiso tiwi kopi windi gimaawunyaatati namausesipainjitimandi kiyaami maariho daahi nimbiputawaawe.

**Kima Piwima Jisaasiho Isihia Taahiyihia Timbipaisahiai
Titihemwasitihandapihaare
(Matiyuhu 14:34-36)**

⁵³ Aihi kiya durihiraatiji napiwi yapipati Genesaretihanda durihirami wihini notawaayopo. Notiwi kapihi kiyaami kopuho yamepata wiraposawaayopo. ⁵⁴ Saiwi Jisaasihotiji komi otipipatihiaatihi kopuhotapi noaatipihauhi isihia taahiyihia aimi keti kuraanihi Jisaasihoai usowi iwinjawaayopo. ⁵⁵ Saiwi iwinjamapi yapipati Genesaretihandami aunahipati nahatewara gaamapi njihiti nuwi isihia timbipa kahatamatipetahapaisahiai gwitihoaatihi ahiyawisi wapihi wapihi Jisaasiho sapihi sore tauhihapihi kapihi numwaasi nasawaayopo. ⁵⁶ Aihi nahataapipihiji Jisaasiho daimi naimbipihiji aunahipati awaipati taunihandaatihi ami gwiharaahonyaara ami osaataati isihia kiyaami naisihia timbipaisawihiyai aunahipa isihia ahoyaniwi nandapa ami wapa nunyawisi nehohipihiji maaketihandaatihi numwaasi nasawaayopo. Numwaasi napiwi ahiwisawosawi Jisaasihoai saundawaatopo. “Jisaasihone, isihia timbipaisahia kinyi apotihiri giwita nehi winjase,” undawaatopo. Aihi isihia timbipaisahia saiwi Jisaasihomi apotihiri numwihatiwi iwihohiyihia kiyaami timbipa owetihia noaipapi gaahyaataawaayopo.

**Kima Piwiha Judaahiya Kiyaami Ikwauhiri
Sasisoari Bausohitihandapihaare
(Matiyuhu 15:1-9)**

7 ¹ Isihia usa Parisihiauni ami usa Judaahiyaami winihapipa katiwunjuhohiyihiauni Jerusaremihandahapi napiwi Jisaasihoai otaatemapi ahoyanawaayopo. ² Bindawa Jisaasihomi otipipatihia usa kiyaami ikwiri jihiji waapohora bahomusawi nehi nandapa nanihauhi kiya usonawaayopo. Saiwi kiya kiyaami satoya kiyohirihireti japepihiriwi ikwiri nehi niwipihaiwaimaawi bausawihyaare. Isi Parisihia kireti japepihiriwi katawaatopo. ³ Parisihiauni ami isihia nahatiya

Judaahiyaisangi satoyaami winihapipa katiwunjauhi nehohipipa namaamapi anitiwi isiwatawaayopo. Saiwi anitiwi winihapipa isiwatawaahiyaasi nandapa nandaatiwihura jihi ikwiri bausawosawi ipoti nandapa isipi nanawaayopo. ⁴Iyataati ami wiwa saiwi kaiwihyaare isihya ahoyaniwi nandapa nunyawu nawihu nehohipihapi wapa nawihu nunyawu newaawaahi ami ikwiri nandapa ahoyawi bausawihyaare. Ikwiri jihi bausawosawi nandapa nanawaayopo. Iyataati winihapipa kimbaahimahe. Kiya satoyaami winihapipa nehohipipa taahipipaare. Saiwi kiya kiyohiwimaiwa saiwa nyaihandi oniha maasanahiri kopuho gwaasiha nawopi itatamaniwi tiwihaapi bausohipatamataiwi napaitiwi niwipihaiwaimaawi bausawihyaare. ⁵Saiwi kaiwihyaasi kaiwaapi giwunyainjihi kandapi namapi Jisaasihoai Parisihyauni ami Judaahiyaami winihapipa katiwunjohiyihyauni satiwi nunjenawaayopo. “Kinyi otipipatimiya asoyaami winihapipa katiwinyasauhi atisa newa japepihihipipa napaapi minjapepihiropo? Kiya napaapi ikwiri bahomusawi kipatisawi nandapa nanihopo?” undiwi nunjenawaayopo. ⁶Aihi Jisaasiho wihoanjiha kiyai sata kaundataase. “Sahi apipaahi jaipimundati otaatapihyaatapi Aisaiyaaho titihi katise. Iyati ko sapi satati jipatipaise:

‘Isimiya kimiya ningi nehi maahomwaaŋapaahihuni nehi piwihaaraahuni nanimaapi mepi autaahepinimawaayopo.

O ami kiyaami maarihohi nisihoaisati nasati windi maasi timaamaamaitise. Owe. Nehi kaanihi nisapi nawisati koai yandihii ahondaise. Nehi isihyaami gwinyaahohiwaiwa nisi winihapipa piwihaamataiwi isihiyai katiwunjawaayopo.

- 7 Kiya nehi sawanaami winihapipaapi kimba Autaahaatihomi winihapipa tiwi isihiyai katiwunjawaayopo.

Saiwi kaiwihyaasi kiya nisapi nehi jaiwaiwi otaatapihaiwa gaapundiwi mepi autaahepinimawaayopo,’ *Aisaiyaaho 29:13*

tati Autaahaatiho Aisaiyaahoi neti giwunyaasihii ami Aisaiyaaho satati katati jipatipiyati ahiyataise. ⁸Sahi Autaahaatihomi winihapipa nepi nawisapipi nehihinemaposawi nehi isihya gwinyaapi katiwunjohiwaiwa kaiwi ami kaiwaahihii japepihiriwihyaate. Aiwi ami sahi isihiyai saundiwhiyaate: Kimba Autaahaatihomi winihapipa undiwhiyaate,” undataase.

⁹Sata kaundatosati ami wa saundataase. “Sahi nawihaiwi Autaahaatihomi winihapipa nepi nehiaatemaposawi sahi isihiyai sawanaatami katiwunjohiwaiwaahihii isiwatiwi kaiwaahihii japepihiriwihyaate. ¹⁰Autaahaatihomi winihapipa Mosesiho jipatipiyati ahaimbipaisangi sahi nepi asireti ahiyawihyaate. Mosesiho winihapipa siyahapa jipatipiyati ahaimbipaapito. ‘Kiniya gapiyaami ambipati niwimape.’ Aimi ami, ‘Kiniyi gapiyai

wiretundipi maipihaiwa kaundapaapaahi tihiwisaihi napwitaape,⁷ tati ahaihihandi kandi sahi satiwi ahiyawu katiwunjawihiyaate.

¹¹ Utaaho wo ikipipa ami nawiho wapa saniyi sapiyai numwito tati ahaimbipaapi, ‘Autaahaatihoai aimi nunyoni gaasi sainjaahi namapi owetane,’ undane tiwi katiwunjawihiyaate. ¹² Sahi saiwi winihapipa asireti ahiyawu katiwunjauhi ami utaaho saniyi sapiyai nawiho wapa iwitatamanati anditiwiwitandi numwitotahandi kandi sami piwihaara namumwise. Owe. ¹³ Sahi nehi sawanaatami winihapipa isihiyai katiwunjavaawi kandaahi Autaahaatiho piwiha winihapipa watipitatu katimbipa nemawaayopo. Aiwi ami sahi wiwa taahiwaiwa sikiyahaiwa kaiwihiyaate,” undataase.

**Kima Piwima Isihyaami Omaniititih
Wapa Neti Maipitindihandapihaare
(Matiyuhu 15:10-20)**

¹⁴ Aih i Jisaasiho isihiyai japihi neti ahoyati piwiha saundataase. “Isihyaati kimiyaati nisi piwiha baiwi atiwi nepi gwinyapise.

¹⁵ Nandapa nehahaatapi kumbwi nepi nanihingipipaara kinyi omaniititih neti nangopisatatu ainjotatu maipindaamase. Owetise. Nehi isihya kiyaami omaniititih mimaipaiwi maipihaiwa gwinyapeniwi kiyohiwaiwaahi kiyaami omaniititihapi ainjotatu maipihaiwa noaipataise,” undataase. ¹⁶ “Isi sahi atihirisahiyaatisi piwiha sa baiwi atiwi nepise” undataase.^j

¹⁷ Aih i Jisaasiho isihiyai namasi niyati añaani nandaasihi ami komi otipipatihya komi piwiha siwipatu katisaapi kaami tanyaahaapi nunjenawaayopo. ¹⁸ Nunjenihauhi Jisaasiho wihoanihi kiya saundataase. “Sahi isimiya kimiyaamatawi winti gimunyaahowo? Sahi winti moniwihyaato? Nehi nandapa nanihingipipa kinyi maariho omaniititih neti maipitatu ainjimotitaise. ¹⁹ Sandi kasatotimandi apaapiimasato ami nandapaahi nainjamih notu witataatih kipwindisa ahorimaitaise. Nandapa kinyi nanihingipipa kinyi maarihoatih neti maipitandihandi owe.” Ami Jisaasiho sandaati, nandapa nahataapa neh gaahapaare wapa isihya winti namandaatiwihapa winti ahimotise. Owe, tati kandaase.

²⁰ Iyati Jisaasiho piwiha onihiwatu jahaati kiya saundataase. “Isihyaami omaniititih maarihoatih ainjotatu maipihaiwa gwinyapenhohiwaiwa nehahaati ausaimanihauhi kaiwa isihyaamiheti ainjotatu maipindaise. ²¹⁻²³ Isihyaami maarihoatih maipitatu maipihaiwa ahotiwaiwa siyahaiwaapito: Woho ami apopaati usihya ami asihya kihya kihyaisawi ambipatu timaamaitiwi ami usaamihapa

^j 7:16 Utipiho yeyetiwi jipatipiyohiwaiwaatih winti ahimotise.

**Kima Piwima Utaaho Wo Atihomaahipiho Ami
Piwaamaatisohoai Jisaasiho Titihemwasitihandapihaare**

³¹ Aihi Jisaasiho kapihi Taiyaahanda namasi aunahipati Saitonihandaahihooani notaise. Noti aunahipati Ikwi Maindimohata (Dekaporisihanda) noaipasi durihiri Garirihandainihira notaise. ³² Aihi isihiya utaaho wo komi atihiri naputati ami biyati piwaamaatati mehitati piwaatahoai numwasi nasawaayopo. Numwaasi napiwi Jisaasiho utaasoai ikwiri ahiwisati atihiri ami maahomwaaani titihemwaitandi giwusoepi nunjenawaayopo. ³³ Aihi Jisaasiho koai numwasi isihiya taahiyihyaapi yandihini nawisati wapihi noti bitotama atihomaahipihomi atihatimuropi isundipiho ahiwisati ami komi isundipiho maahoirisatesi komi omasiheti iwiwataise. ³⁴ Siyati utaamopi maariho asipiyataati awaindahandi maarisati komi omasihai numwihatati iwiwatataati yamihapataatihini jatata awaaindi mbipa neti maarisati sandaase, “**Epaata,**” ndaase. Sandi tanyaaha satatise, “nawatahatipi nutipi nausaate,” ndaase. ³⁵ Sata Jisaasiho kaundihi keti kuraanihi utaasomi atihiri nuriwatatati ami komi omasiha usaayati gaatihini nga atisati ami piwiha nga biyati piwandaase.

³⁶ Aihi kapihi isihiya ahoyanihohiyihiyai Jisaasiho saundataase. “Kimandi nini kiyonihini sahi mmonihohitimandapi isihiya usaisi sahi windi apipaahi kamundimapise. Apipaahi owetane,” undati kiyai kaundataase. Sata mitaahi bapiya kaundihihandi kandi ami kiya mwitetiwi piwiha ka nesi mitaahi kaniwi gaamawaayopo. ³⁷ Isihiya kapihi Jisaasiho kaiwaiwa mmonihohiyihiyai satawaatopo. “Kamaitaahetahaiwaisangi Jisaasiho nahataapa nga kiyataise. Kiyati isihiya atihomaahipihiyaami atihiri nuriwatasihini nga atiwi ami piwaamaatisohiyai maahomwaaani niwusoasihini nga piwaataawaayopo,” tiwi apipaahi awaindahandi aatiwimawaayopo.

**Kima Piwima Jisaasiho Isihiya 4,000 kaiwihiyai
Nandapa Numwindihandapihaare
(Matiyuho 15:32-39)**

8 ¹ Aihi ami sura isihiya wirisandihandi napiwi Jisaasihoaisawi maasitawaawi ami kiya nandapa nandaatiwihapa owehiyaare. Saimainjihini namati Jisaasiho komi otipipatihiyai gaatati numwaati saundataase. ² “Kimiya isimiyaapi nini maariho asipiyataayo ami kiya ningisawi maasi kimbihini asisihini 3 kiyati mairi manyeti bimauho. Aiwi ami kiya nandapa nandaatiwihapa wapa mipi owehiya nehi taanahiyihiyai napiwihiyaaso. ³ Ami nini kiya japarihiyai kiyaami anipipihapi nandusoasianaahi ami daihira itipi woniwoniwinihonihini timihaitaapo. Ami kiyaami usa apipaahi kaanihapi napiwihiyaaso,” undataase.

⁴ Aihi komi otipipatihya Jisaasihoai saundawaatopo. “Nyahi aunahipa awaiwaiwa taunihandami apipaahi kaanihi bindihaayoni isimiya kimiya taahiyimiyai nandapa biretihandi napitiyaati maahapihapi newaati numwitihaawe?” undawaatopo. ⁵ Aihi Jisaasiho komi otipipatihyai saundati nunjenataise. “Sahi nandapa biretihandi napitaiwihandi isipihyaate?” undataase. Siyati nunjesihi ami kiya koai saundawaatopo. “Biretihandi 7 kiyahandi isiwaahiyaane,” undawaatopo.

⁶ Aihi Jisaasiho isihya nahatiya woyihaatihi yatihi yapipateti bimitaatiwi kaundataase. Siyati kaundosati ko biretihandi 7 kiyahandi neti isiwatata Autaahaatihoai, “Kinyi gaahonji iparihonje gaare,” undati biretihandi naumbwoti tipitapaataise. Siyati naumbwisonyonya komi otipipatihyai nunyataise ami kiya nepawi isihyai nunyawwi gaamaitaatiwo. Aihi ami kiya nesi isihya nahatiyai gaamapi nunyawaayopo. ⁷ Aiwi ami Jisaasihomi otipipatihya araiho wonya isipihyaare. Aihi Jisaasiho araihonyapi Autaahaatihoai, “kinyi gaahonji iparihonjisi gaare,” undatosati komi otipipatihyai numwihi ami kiya nepawi isihyai nunyawwi gaamawaayopo. ⁸ Kaihi isihya nahatiya nandapa sapa naniwi gwisimwiwi gandaise. Saiwi naniwi gaatihi nawipipa ahotimbipa otipipatihya koai niwipinjawi ko kaiwaiwa mmoniwi nepi kiyohiyihya asiwi nepi ikihaiwa 7 kiyahaiwaara kipiwi tisaahiwawaayopo. ⁹ Isihya nandapa sapa nanihohiyihya nahatiya 4,000 kaiwihyaare. Aihi kiya nandapa naniwi owetihihura Jisaasiho kiyai kiyaami anjipihapi neti natausaasataise. ¹⁰ Natausaasamapi keti kuraanihi Jisaasiho komi otipipatihyaisati kopuhoti yamwaasi aunahipati Darimanutaahandaahapi notaise.

**Kima Piwima Parisihiya Jisaasihoai Kinyi Watipihaiwa Wiwa Kaime
Nyahi Mmondaano Undohitihandapihaare
(Matiyuhu 16:1-4)**

¹¹ Noti noaipasihi Parisihiya usa napiwi Jisaasihoaisawi piwihaara pwisipataahamataiwi nepi tunniwi kaniwi piwanawaatopo. Piwaniwi kiya koai saundawaatopo. “Nyahi kinyapi koai akitinihi Autaahaatiho natausaasihi nasahoe taati mmonaati gwinyaitaani kinyi watipihandi windi nyami ndiheti kaime,” undiwi nunjenawaayopo. Sandi titihi akitinihi kiya nunjenawaamaayopo. Owetise. Nehi jaiwaiwi ami ko wipiyonaahi ami kiya koai wapa kawitaatiwi jatawa jaiwaiwi nunjenawaayopo. ¹² Saiwi nunjenihauhi Jisaasiho komi maariho apipaahi naanjawihii maariho ditihiri aungwohandi maarisati noaamati sandaase. “Sahi napaapi watipitiwimapi ningi sandiwi, ‘Kinyi watipihandi kaime, nyahi mmondaano,’ ndiwi nanisenihopo? Nini sangisi apipaahi akitinihi sandi kasatataato. Sahi mmondaatiwi watipihandi nini windi kamaito owetitaise,” undataase. ¹³ Sata kaundamapi Jisaasiho komi otipipatihyai numwasi kopuhoti yamwasi durihiri nahaitati wihinapi notaise.

**Kima Piwima Jisaasiho Komi Otipipatihiyai Parisihiyaamuni
 Erotihomuni Piwiha Katiwunjawi Kiyohiwaiwaapi
 Yisihandapi Jaawo Undindahandapihaare
 (Matiyuho 16:5-12)**

¹⁴ Jisaasihomi otipipatihya nandapa wapa mmoniwi nepi isipi namuwi kiya nanipimatiwi nehi taanahiya nowaayopo. Aiwi biretihandi nehi naasaindihisi isisi nuwihandisi kopuhoti kandihisi ahotihisi mmonawaayopo. ¹⁵ Aihisi Jisaasiho komi otipipatihiyai piwiha watipihisa sata kaundataase. “Sahi baiwi jaawo. Parisihiyaamuni Erotihomuni kiyohiwaiwaapi jaawo ami kaiwa yisihandamatihaiwaaso. Kiya kiyohiwaiwa nandapa biretihandi nipitandihandihisi ahiyauhi nandapa biretihandi kaitaatiwi dohandi waati neti nipindahandamatihaiwaaso kaiwa samiheti nasati osamati nasamanitaisi sahi baiwi jaawo,” undataase. ¹⁶ Aihisi Jisaasihomi otipipatihya sawana sanawaatopo. “Nyahi biretihandi owetihi kandapi sandi Jisaasiho nyangi kanyatataase,” nnawaatopo. ¹⁷ Aihisi Jisaasiho kiya kaniwi gwinyaaahohitihandihisi usonataati kiyai saundataase. “Nyahi biretihandi owetihinyase tiwi sahi saiwa napaapi gwinyapenihopo? Sahi sangi windi mmoniwi gimaasunyainjo? Sami amitiha maasinjapwaatati nisaputamaso? ¹⁸ Sahi ndihaisahiyaatindaahandihisi kandi baiwi windi mohopo. Sahi atihirisahiyaatitawaahandihisi kandi sahi windi atiwi namehopo. Sahi baiwi gwinyaapise, nini kiyohipipaapo. ¹⁹ Nini isihiya 5,000 kaiwihiyai nandapa biretihandihisi 5 kiyahandihisi naumbwiti nunyohuraapi sangi windi gimaasunyainjo e owo? Nawipipa isihiya naniwi ahotimbipa ikihisi napitaiwihihisi nepi kipopo?” undati nunjenataise. Aihisi ami kiya koai saundawaatopo. “Ikihi 12 kiyawaahihisi nyahi asawa newaati kipohaayo,” undawaatopo. ²⁰ Saundauhi ami Jisaasiho jihaati kiyai saundataase. “Isihiya 4,000 kaiwihiyai kaatiha biretihandihisi 7 kaihandihisi naumbwiti nunyonihisi naniwi gaatihisi nawipipa ahotimbipa sahi asiwi nepi ikihisi napitaiwihihisi nepi kipopo?” undati nunjenataise. Aihisi ami kiya koai saundawaatopo. “Ikihi 7 kiyahiha asawa newa kipohaayo,” undawaatopo. ²¹ Saundauhi ami Jisaasiho kiyai saundataase. “O ami sangi sangi gisunyaatati ami sangi nasesipainjo?” undataase.

**Kima Piwima Jisaasiho Utaaho Ndiha Niyotahoai
 Betisaitaahanda Nusorahaasitihandapihaare**

²² Aihisi Jisaasihouni komi otipipatihyauni napiwi aunahipati Betisaitaahanda noaipawaayopo. Napiwi noaipahauhi utaaho wo komi ndiha niyotahoai komihiya numwaasi nasawaayopo. Numwaasi napiwi Jisaasiho komi ndihaatihisi ikwiri ahawisati nusorihaitandihisi giwusoepi nunjenawaayopo. ²³ Aihisi Jisaasiho utaaho ndiha niyotisihoai ikwira iwisi aunahipatami ipaahaapi noipapi mangiraini akirepepi noti bitondaise.

Noti bitondaati Jisaasiho utaaahomi ndiha niyotisihoti maahoapati maahoaipuriwati ikwiri ahiwisati saundataase. “Kinyi wani wapai nga usonapaino?” undataase. ²⁴ Aihi ko ndiha niyotisihoni naingaati jati Jisaasihoai saundataase. “Ye, nini isihiyai iwinjataayo. Iwinjataahandi kandi kiya ipati nesiwesiwa daayataahatamataiwi daayauhi nini iwinjataayo,” undataase. ²⁵ Aihi Jisaasiho jihaati komi ikwiri uta ndi niyotisihomi ndihaati ahiwisataise. Aihi ko komi ndiha waati nusorihataati gaatihi nahataapai nga biyati mmonataise. ²⁶ Jisaasiho koai saundataase. “Kinyi aunahipataahapi windi namumbwi kinyi kinyi anjipipihapi titihi numwe,” undati neti natausaasataise.

Kima Piwima Pitaaho Jisaasihopi Kiraisihore
Tati Ausaati Katindihandapihaare
(Matiyuhu 16:13-20; Rukiho 9:18-21)

²⁷ Jisaasihouni ami komi otipipatihyauni aunahipati gwiharaahonya aunahipati awaipati taunihandi Sisariya Piripaihanda ahetiwaiwaraahapi daimi nowaayopo. Saiwi kiya taawi daimi nowaawi Jisaasiho kiya komi otipipatihyai sata nunjenataise. “Nisapi isihiya diyaamahoe tawaatopo?” undati kiyai nunjenataise. ²⁸ Aihi komi otipipatihya wihoanjiha koai saundawaatopo. “Kinyapi isihiya usa Joniho Isihiyai Baawusisihoe tawaatopo. Aiwi ami usa Eraijaahopi japihi nasatete tawaatopo.^k Aiwi ami usa satawaatopo. Autaahaatihomi piwiha atiwi nepi ausaahohiyihya piropetihyaami wore tawaatopo,” undiwi kaundawaatopo. ²⁹ Saundauhi Jisaasiho kiyai sata nunjenataise. “O ami sahi nisapi diyaamahoe tiwi gwinyapenawaayopo?” undati nunjenataise. Aihi Pitaaho koai saundataase. “Kinyi Kiraisihone,” undataase. ³⁰ Aihi Jisaasiho kiyai saundataase. “Sahi nisapi isihiyai Mesaiyaahoe undiwi windi kamundiwise,” undataase.^l

Kima Piwima Jisaasiho Yaawihandi Neti Napoti Japihi
Nepaitandihandapi Katindihandapihaare
(Matiyuhu 16:21-28; Rukiho 9:22-27)

³¹ Aihi Jisaasiho namasati komi otipipatihyai sata kataunjataise. “Autaahaatihomi Isihiyaami Saahonini Awaisihonini Jihonihoni ambipati yaasihandi awaindihandi nanimitaapo. Aiwi Judaahiyaami aunihiya gwinyaaahiya jihiyauni ami Pisisihyaami awaisawihya jihiyauni ami

^k **8:28** Eraijaaho so jiji aimehura Autaahaatihomi piwiha atiwiisa neti Komi piwiha awusaati bimainjati Jisaasiho sangi napihihura Autaahaatihoni asohoi aimi numwaasi yamihapataatihapi naihi kinaungwiha aimi pihitani sanaihipitopo. ¹ **Kinj 17** nihandaapihoni mmome. ^l **8:30** Mesaiyaahoe tohitimandi sandi satiwi “Komi Isihiyai Japihi Numwaitandi Autaahaatihoni Namihanati Ahiwisihore,” tawaatopo.

winihapipa katiwunjohiyihya ningisi ahosinimaitaapo. Aiwi nisapi poundonih i sohonih niwisaihi napwito. Napotati asisiha mairimanya saniyonih nini asohoninimandi japihi animwaahipatombi nepaito,” undataase. ³²Koai nusoaipaitandihapaapi Jisaasiho komi otipipatihyai titih ausaati kaundataase. Aih Pitaaho Jisaasihoai nawisati numwaasi noti yandih bitotama koai nuwisapuwati saundataase. “Awaisihonje, kinyi satipi windi kamaatime. Owetane,” undataase. ³³Ami Jisaasiho nepemaitati komi otipipatihyai iwinjataise. Winjataata Pitaahoai sireti ko katirihireti sata kamaatitandi kaundataase. Iyati koai Jisaasiho piwiha watipih sata kaundataase. “Bwaasirihirane,^m kinyi ningisi nanimasi nawisapitipi kirajinihi numbwimape. Kinyi Autaahaatiho maaritati gwinyaasipipaapi windi gimunyaahise. Kinyi nehi isihya maaritawi gwinyaahohirihireti gwinyaapaise,” undataase.

³⁴Saundatosati isihya wirisandihyaisati komi otipipatihyai gaatasi numwaati neti naasaimbipih ahojataise. Ahoyatosati kiyai saundataase. “Ami isihya ningisi nanipinjitaatiwaahi kiya sawanaami maaritohiwaiwai ahosumapi kaiwaanihi namamapise. Kiya ningi nanipinjitaatiwi kiya sawana nga itatatamaniniwi bimitaatiwihandi kandinihi namamapise. Namamapi ipi titi atawihati nepi isiw nanipinjawise. ³⁵Ami utaaho wo sawaho wani biyati nga bimitandihandapaahihi anditati napamataataahi ko ipotihura konih ningisati maasi bimitandihandi nihirati namaitaise. O ami utaaho wo nisapimatonihuni ami nisi piwiha gaaha wanihaapimatonih ko sawaho biyati nga bimitandihandi nihirati namati ami napotaataahi ko ipotihura nga ningisati konih jinjapihi asohoematati bimitandihandi naitaise. ³⁶Iyataati ami utaaho wo maapi yapipatambihaiwa nahatewa kohesayanati netaati kandaahi ko ipotihura asitimatati konih jinjapihi bimitandihandi nihirataataahi ami akitindi napindi nunyati ko asitimatati bimitandihandi naitaise? Apipaahi owetitaise. ³⁷Siyati ko asohoematati bimitandihandi nihirati owetanihi ko nawiho nga nunya komi maariho asitimatati bimitandihandi windi japihi namaitaise. Apipaahi owetitaise. ³⁸Isihya wani kimura bimohiyimiya maipihandi apipaahi tisaitati ami apipaahi maipihura bindawaayopo. Isi ami isihya nisapi mawonaahi ami Nini Isihyaami Saahonini Awaisihonini Jihonini nisi Apihomi watipihandi nausainjitihandaatihi yamihapataatihapi Autaahaatihomi enjerihya otipipatihyaisati nasataahura kiyaapi ningisi manyonih kiyai ahosumwaito,” undati kiyai kaundataase.

9 ¹Jisaasiho kiyai sata kaundatosati ami wa saundataase. “Nini sangisi akitinihi sandi kasatataato. Isihya kimiya wani kimbihi

^m 8:33 Autaahaatihomuni Kiraisihomuni ami komi isihyaami tiworihomi sati ambipate. Iyati ami Pitaaho Kiraisihomi tiworih Bwaasirihiramatiyati gwinyaasih kandapi itihundataase.

bitohohiyimiya usa sangi napwisaihi Autaahaatiho isihiyai iwinja bimindihandi watipihandisa noaipahonihi mmondaapo,” undataase.

Kima Piwima Jisaasiho Noaipati Wipetahoemainjitihandapihaare
(*Matiyuho 17:1-13; Rukiho 9:28-36*)

²Asisiha aimi 6 kiyati sanaihihura Jisaasiho Pitaahoaisuni Jemisihohaisuni Jonihoaisuni numwaasi sisiho utarihoaisini nasaamanataise. Aihi kasini sisihoaisini nehi sawanaahihi bitotawaayopo. Aihi kingwaasami ndiheti keti Jisaasihomi ambipati wipetahati noaipataise. ³Iyati ami komi uti apotihiri noaipati nehi kihoepe taanahitindaise. Iyati utaaho wo maapi yapipatambiho wapaara bausanati bausonihi siyati windi kihoepeimetitaise. ⁴Aihi kingwaasi jawa Eraijaayi Mosesiya^a kiyaami ndiheti noaipapi Jisaasihohaisami maasi taami piwaatinjihi otipipatihingwaasi winjawaayopo.

⁵Aihi Pitaaho Jisaasihohai saundataase. “Katipinyasingihone, nyahi gaanihi kimbihini bindihaayoni anihaiwa gohaparihaiwa nausarisaati maurimandi animatitaano. Waani kinyapitanihini, waani Mosesihopitanihini ami waani Eraijaahopitanihini nyahi animatitaano,” undataase. ⁶Pitaahouni Jemisiyi Joniyauni apipaahi aungwohandi waati yayawaawi ami piwiha wa Jisaasihohai kaunditihia owetihi namati sandi Pitaaho kandaase. ⁷Aihi tiwipati witi nasati kingwaasi neti napapihati namaasamataise. Aihi kati tiwipataatihapi piwiha wa Autaahaatiho Jisaasihopi katihini sataha noaipataise. “Kimo Nisi Maasihoho Akohotihini Nini Koai Maariho nunyati wiwitihihosi ko piwiha kasatonihini baiwi atiwiwise,” taha noaipataise. ⁸Aihi kingwaasi piwiha sa atiwosawi keti keti nepemainaniwi jawaahandi kandi isihiya usaisi maawinjahopo, nehi Jisaasiho sawahohihi bitosihini iwinjawaayopo.

⁹Sandi siyati noaipasihini mmoniwi atiwimapi japihi sisiho koasini namasi noaatipawaawi Jisaasiho kingwaasi saundataase. “Sahi sisimoaisini kimandi noaipasihini mmonihohitimandapi isihiyai saimainje undiwi apipaahi windi kamundiwise. Kamundiwi bimambiwi Nini Autaahaatihomi Isihiyaami Saahonini Jihonini Awaisihonini napomatati japihi nepasanihura sandapi isihiyai sahi ausaapi kaunditaatiwe,” undataase. ¹⁰Aihi kingwaasi komi otipipatihingwaasi Jisaasiho kaundisihi atiwini nepi kaundirihireti japepihirawaayopo. Saiwi kiyawaahandi kandi Jisaasiho, “Nini japihi animwaahipatombi nepaito,” undisihaapi windi namausesipainjihi kaami tanyaaha ko napindapinyatindiho? Niwi kanawaatopo.

^a 9:4 Eraijaayi Mosesiya sura jihura Judaahiyaami awaisururapitopo. Mosesiho winihapipa numwisihore. Aihi ami Eraijaaho so awaisiho jihu Autaahaatihomi piwiha atisati neti kopi awusaasihore.

¹¹ Aihi kingwaasi Jisaasihoai satiwi nunjenawaayopo.

“Judaahiyaami winihapipa katiwunjohiyihiya Eraijaahopi ko jihi
napitaise tiwi napindapi katopo?”

Marakaiho 4:5

undiwi nunjenawaayopo.

¹² Aihi Jisaasiho wihoangaia kiyai sata kaundataase. “Ye, mandihi akite. Kiya akiti titihi katawaatopo. Eraijaaho kahapaamapipa neti japihi titihemaitandi ko jihi napitaise. Iyataahandi kandi Autaahaatihomi Isihiyaami Saaho Jiho Awaisiho yaawihandi awaindahandi pihitai naitaise. Iyati ami isihiya koai nehi wapaamataiwi, ‘mmopi niwisapi nemapi ahosumwapi pohipiwitaapo,’ tati Autaahaatihomi piwihaathi napaapi jipatipindise? ¹³ Nini sangi akitinihi sandi kasatataato. Eraijaahohi aimi napise. Aimi napihi ami isihiya koai kawitaatiwi maaritohipipa kireti aimi kawisopo ami Autaahaatihomi piwiha katati jipatipindirihireti japepihiriwo,” undati Joniho isihiyai baawusisihopi gwinyaataati sa piwiha kaundataase.

Kima Piwima Jisaasiho Metiho Womihetapi Itipiho

Maipihoai Nemasitihandapihaare

(Matiyuho 17:14-21; Rukiho 9:37-43a)

¹⁴ Aihi Jisaasiho Pitaaho Nemisiho ami Joniho Jisaasihomi otipipatihya usenda japihi napiwi niwipaawaayopo. Napiwi iwinjawa isihiya apipaahi kiyai otaatemapi bitotawa ami winihapipa katiwunjohiyihiya piwihaara pwisipataahamataiwi tunniwi kanihauni iwinjawaayopo. ¹⁵ Aihi Jisaasiho aimi nasa noaipasihi isihiya wirisandihya winjaposawi waati yaiwipwitawaayopo. Waati yaiwipwitiwimapi keti dosi ruhiti deti Jisaasihoapihi nuwi, “Aimi soni nasapaino?” undiwi piwaundawaayopo. ¹⁶ Aihi Jisaasiho komi otipipatihyai sata nunjenataise. “Sahi kimiya isimiyaisawi pwisipataahamataiwi piwihaara napaapi tunnihopo?” undati nunjenataise. ¹⁷ Aihi isihiya wirisandihyaami otihatihapi utaaho wo dotati Jisaasihoai saundataase. “Katipunjingihone, nini nisi maasihihoi gisenda numwaasi nasataayo. Itipiho maipiho komiheti bindata timbipa nunyati komi piwiha nemati maahomwanga neti niwisapusihimi ami ko piwiha biyati windi piwaamaatiho. ¹⁸ Iyataati kimo nisi metimoi itipiho maipiho nahateweti siyati isiwatataati koai neti waati maahutati yapipateti neti tusaataise. Sawihi nisi metimo komi maahomwanga mipateti sisipa maahoirihiri nasati noamatimi ami mangiri neti sawaho ikwinati ikitihitisataise. Iyati ami komi ambipati tihrotipitati yahamipindaise. Aihi wani nini koai kinyi otipipatimiyaapihi kiya koai titihiwitondi numwaasi nasataayo. Numwaasi kiyaapihi nasonihandi kandi kiya metimomiheti itipiho maipiho bimisihoi windi nga nemaamahopo,” undataase.

“Itipihō maipihō setahoaisaahi nehi gaapipataahihi^o nga nemaitaapo,” undataase.

**Kima Piwiha Jisaasiho Napotati Japihi Nepaitandihandapi
Kasinihandi Katindihandapihaare
(Matiyuho 17:22-23; Rukiho 9:43-45)**

³⁰ Aihī Jisaasihouni komi otipipatihyauni kapihi aunahipa namasi Garirihandaahira kandi Garirihandami otihapihī daimi nowaayopo. Aihī Jisaasiho isihyaapi sawahopī aimi yamo napise nnawa napiwi usondaatiwihandapi windi maarimitise. ³¹ Ami sandi apaapimaahē, komi otipipatihyai taati kataunjataate. Iyati ami ko komi otipipatihyai saundataase. “Isihyaami Saahonini Jihonini Awaisihoningsi isihya tiworisaami ikwiraatihinimasaihi ami kiya ningi sohonihī niwitaapo. Niwisaihi napomatati animwaahipatombi asisiha mairima saniyonihī japihi asohoninimandi nepaito,” undataase. ³² Isihya yaasihandi naninyawi nusaihi napomatati asisiha mairima saniyonihī japihi animwaahipatombi nepaito undisimaapi komi otipipatihyai windi gimaawunyaatati namausesipainje. Siyati namausesipainjihandi kandi kiya Jisaasihoai nunjendaatiwihandapi yayawaawi nesipapi kanyate undiwi koai windi namunjenihopo.

**Kima Piwima Jisaasiho Isihya Awaisawihiyaimatohirihiretapi
Katindihandapihaare
(Matiyuho 18:1-5; Rukiho 9:46-48)**

³³ Aihī Jisaasihouni komi otipipatihyauni aimi Kapaniyaamihanda noaipapi añaanī nandaapi bindawaawi Jisaasiho komi otipipatihyai sata nunjenataise. “Daihira nyahi taawa nasihaawi sahi akitindi napindapi piwiha wihīwihoaanī kanimi nasopo?” undati nunjenataise. ³⁴ Aihī kiya wihoaanīha sapaapi katihāato undiwi windi kamundopo. Ami wihoaanīha kamundohitimandi ami kiya daihira wihīwihoaanī saniwi, “nyamimatihapi diyaamaho awaisihore?” niwi kaniwawihanditihī namapi kiya yatihitawaayopo. ³⁵ Jisaasiho yatihī bindata komi otipipatihya 12 kaiwihyaasi kiyai gaatati deti komihini ahoyatosati ko kiyai saundataase. “Sami wo noaipati jīhoematitandaahi so isihya nahatiyaami nehi ipotihōematati ami isihya nahatiyaami yatihī otitihī nehi otipipatihōematati otipipati kiyane,” undataase. ³⁶ Sata kaundatosati Jisaasiho metihonji wonji numwaati kiyaami ndiheti otihapihī ahiwihī bitondaise. Bitosihī konji komi ikwiraatihī numwaati isiwataatai kiyai saundataase. ³⁷ “Utaaho wo metihonji kimonjamatiyahonji ami nisapimatonihi wonji metihonji numwaati iwitatamanataataahi so ningi

^o 9:29 ami nandapa onaayohitihandaahihe tati utipihō wiwaatihī sa ahondaise.

nanimaataise. Iyati ami ningisi wo nanimaati nitatamaso so ami ningisi nanimaataamaise ami ningisi natanoaasisihoai numwaataise,” undataase.

**Kima Piwima Jisaasiho Komi Otipipatihyai Saundati Utaaho
Wo Nyami Tiworihomendaataahi Ami So Nyami Naisohore
Undindahandapihaare
(Rukiho 9:49-50)**

³⁸ Aihi Joniho Jisaasihoai saundataase. “Katipinyasingihonje, utaaho wo namaanyipinjaho kinyi ambipataahi itipiho maipihoi utaaho womihetapi taati tahamana nemasihi nyahi usonihaawi kinyi saimbi kamaima undaati itihunda nimbipuwahaayo,” undataase. ³⁹ Ami Jisaasiho koai saundataase. “Sahi napaapi niwimbipuwawaawe nehi iwinjasawise kiyati kaito. Ami utaaho wo nisi ambipata watipihaiwa wiwa kaisiho so nisapi keti maipiha windi kamaatitaiso,” undataase. ⁴⁰ “Isihiya usa nyangi nyaipindiwi nepimaanyamahohiyihya siya ami nyami naisihyaare. ⁴¹ Nini sangisi apipaahi akitinihi sandi kasatataato, utaaho wo sangi jasonataati kimiya Kiraisihomihyaaso tati nehi waapohoaisangi nasamisihso soai ami nini wihoaanjhandi gaahandi nawihomataindi numwisanihi ko naitaise.

**Kima Piwima Kopi Giwunyaahohiyihyai Isihiya Usa Maipihaiwa
Kaitaatiwihandaatih Numwaasi Nandaitauhahandapi Jisaasiho
Katindahandapihaare
(Matiyuhu 18:6-9; Rukiho 17:1-2)**

⁴² “Ami isihiya nisapi wani namasawi taawi ginunyaahohiyihya kiya manyinyaamataiwihiyai utaaho wo maipihandi sangi kiyaunjonihhi ami koai nepi jihi nawiha aungwohandi apipaahi naanjhandi komi naahutarihiraapihi wirapi nahemaposawi durihiraatihhi nepi timandaasahi nawatisati napotaataahi ngaatitaise. Autaahaatiho koai yaawihandi windi namumwitando. ⁴³ Ami kinyi ikwiri maipihandi kinyi kaitaapihandaatihhi angisi niyonaahi gaasi keti kuraanihi kirisi tisatimape. Ikwiri nehi naasairisapi asohonjimatitaapihandi nga naitaapo. Ami wiwa ikwiri maindimurisapihoni opaimbi sisiha kaanihi namaayotati tihatoatisihaapihi numbwi tihooatitaino. ⁴⁴ (Ami sapihi kiya maatiimaatihiyaami pindipihho noamati kiyaisinihi nisatoaapati nanimi notooatitaise. Iyati ami sisiha windi namaayotati kaanihi tihati kiyai tihimi notooatitaise.)^p ⁴⁵ Iyataati ami kinyi auhiri maipihandi kaitaapihira nangimaasi niyonihhi kinyi maipihandi kiyapaapaahi ami kiri tisatimape. Ami kinyi saimbi ambipati wihoaanjihati tisatipi nehi wihoaanjihatisahoni asitimatitaapihandi nepi nga bimitaapo ami

^p 9:44 Wesi 48 handi mmome kima kandamatiyati naahwitarihiri naasairi noaipaso.

wiwa ambipati nahatepisapihoni sisihaapihi nutaino. ⁴⁶ ⁴⁷ Ami kinyi ndiha maipihandi kaitaapihira nangimaasi niyonihi kinyi maipihandi kiyapaapaahi ami gaasi kinyi ndiha wa namwaapi yotime. Ndiha nehi naasaisapihoni Autaahaatiho gisi biyati ginjaati bimitando ami wiwa ndiha maiwisapi opaimbihongi nepi sisihaapihi yangotitaawo. ⁴⁸ Iyataati sapihi sisihaapihi pindipihoni isihiyai pindipoaamati nainjiho windi namaapoti ami sisiha isihiyai tihatoaatisiha windi namaayotati kaanihi tihatoaatitaise.

⁴⁹ “Isihiya nahatiya sorihoni sapipa nandapaatihi ahiyauhi ami nandapa nga jipiyataise. Isi siri kireti sisiha isihiyaami omanjititihoni maipihaiwa ahotiwaiwa tihamahonihi kiyaami omanjititihoni titihitani popitititaise. ⁵⁰ Iyataati sorihoni sapipa sapa gaahape. Gaahapandaahandi kandi sapipaami jipaindihandi nupwihooatati owendaataahi sahi japihi jipaindihandi napitaiwi nepi ahaitaapo. Isi ami sahi sapipaami jipaindihandi samiheti neti tsaitonihoni ami sahi ususaati bipi napaisaati bimaawise,” undataase.⁷

**Kima Piwiha Jisaasiho Namaatiniwihiya Tipitapaatotihandapi
Kataunjindihandapihaare**

(Matiyuhu 19:1-12; Rukiho 16:18)

10 ¹ Aihi Jisaasiho sapihi namasi yapipati Judiyaahanda notaise. Noti yapipati Judiyaahanda waapihaati Joritaanihaati nahaitati kaanihi notaise. Aihi isihiya taahiyihiya wirisandihandi koai usoniwosawi napiwi ahoyanihauhi Jisaasiho komihati kiyati namasati Autaahaatihomi piwiha ausaati kiyai kataunjataise.

² Aihi Parisihya usa napiwi Jisaasihoai piwiha wa nehi jaiwaiwiha ko napititihani kanyatise tiwi iwinjatawa namasawi saundiwi nunjenawaayopo. “Nyami winihapipa napondaase? Utaaho wo komi apwaataati nemaitandi sandi titiho e titihimaaho?” undiwi nunjenawaayopo. ³ Aihi Jisaasiho kiyai wihooanjiha saundataase. “Mosesiho winihapipa napititihapa nasanyataise,” undati nunjenataise. ⁴ Aihi kiya wihooanjiha saundawaatopo. “Mosesiho satise ‘Utaaho apwaataati namataataahi kaati aimi namataayo tati utipihoni jipitipiyati nunyati nemati natausaasane,’ tati katise,” undawaatopo. ⁵ Aihi Jisaasiho komiha kiyai saundataase. “Sahi maatimaatiwi wiretitiwi Autaahaatihomi piwiha katasimbipani atihomiwi daahi nisaputiwi watipitauhi Mosesiho sapa winihapipa katati jipitipiya ahiyataise.

⁹ 9:46 Wesihandi 46 handi ami 44 handi sauri 48 handamatiyahaurisi wesi 48 handi mmome. ⁷ 9:50 Kimandi wesimandi satatise, Kiraisihoai nuwipinjohiyihya kiya kopi giwunyaahotihandapi yaawati naanjawisihaiwa newaahandi kandi kiya ususa baiwi geriniwi napaisaati bimaawise ndaase.

⁶Ami jihi wuwanihura Autaahaatiho kahapaamapipa kiyati ahaisura, ‘wohoaisuni ami apopaatisuni kiyati ahiyataise,’ ” tati piwiha katise. ⁷‘Isi ami woho saniyi sapiyaisi namasi noti apwaataatisati timaamaititande. ⁸Saimi timaamaitamaami kasanyuri noaipapi ambipati yandihi yatiwitamaamaise. Owe. Kasanyuri noaipapi ambipati nehi naasaipatisahasanyure.’ ⁹Iyataati kasanyuri Autaahaatiho neti maasi timaamahiwataise. Isi utaaho wo neti kasanyuri timaawipitapaane,” undati Jisaasiho kaundataase.

¹⁰Jisaasiho kiyai sata kaunda namihaasihi ipotihia anjipipihapi japihi nowaayopo. Nuwi bindawa komi otipipatihya Jisaasihoai piwiha isihya namaatinohiyihya tipitapaatotihandapi katisihaapi nunjenawaayopo. ¹¹Aihi Jisaasiho kiyai saundataase. “Utaaho komi apwaataati namatosati ami waati neti wirataataahi so komi apwaataati jihaati neti maipihandi kawisataise. Iyati ami kasanyurami namaatinjitihandi neti nopisasataise. ¹²Iyataati ami apopaati waati warihoai namasi noti woai namaatataataahi kasanyurami namaatinjitihandi neti nopisasati maipihandi kiyataise,” undati komi otipipatihyai kaundataase.

Kima Piwima Jisaasiho Manyinyai Gaahandi Numwindihandapihaare
(*Matiyuho 19:13-15; Rukiho 18:15-17*)

¹³Isihya usa metihonyai numwaasi nasawaayopo konyai Jisaasiho saundati, “Sangisi Autaahaatiho gaahandi kasisane,” undati komi ikwiri ahiwisati gaahandi numwitotiwo. Aihi Jisaasihomi otipipatihya kiyai itihundiwi niwisapuwawaayopo. ¹⁴Aihi Jisaasiho isihyai komi otipipatihya itihundiwi niwisapuhotihandi mmonata kandapi ko windi maarimitati apowihia ko kiyai saundataase. “Sahi metihonyai nepi namaawisapupise. Nehi iwinjasawise, kiya ningisenda kaiwi napito. Ami isihya kimonyaamataiwihyai Autaahaatiho nga iwinjatitaise. ¹⁵Nini sangisi akitinihi sandi kasatataato, metihonya wapa nehihapa nunyauhahapa nanihaiwi nehohipatamataiwi isihya Autaahaatiho kiyai iwinjatitandi metihonyaamataiwi kopi windi gimaawunyaahohiyihyai ko windi maawinjatitaise,” undataase. ¹⁶Sata Jisaasiho kiyai kaundatosati metihonyai numwaati komi ikwira namaahatata nahatonyai kiyaami mitihoatihi ikwiri ahiwisati uripatisati saundataase. “Autaahaatiho sangisi gaahandi kasisane,” undataase.

Kima Piwima Jisaasiho Isihya Ikipipa Taahipipaisahiyaapi
Katindihandapihaare
(*Matiyuho 19:16-30; Rukiho 18:18-30*)

¹⁷Jisaasiho sapihi namasati taati namasisi naihi utaaho wo njuhiti nasati Komi utatototi timahiyati komi atotipati atotipiwesati bindata sata nunjenataise. “Katipunjingihonji gaahone, nini napitiyataatinihi gaahandi

asitimatitandihandi neti nasisoaari bimitande?” undati nunjenataise. ¹⁸Siyati ko nunjesihi Jisaasiho koai wihoaanjha sata kaundataase. “Ningi kinyi napaapi gaahonje ndipi kandise? Nehi Autaahaatihoihi gaahoso. ¹⁹Kinyi winihapipaami piwihaapi aimi gwinyaapihonje. Winihapipa sandaase.

‘Sahi isihiya usaisi windi siyihiyai timaamapise. Sahi namaatiwihiyaati usihiya asihiya usa sami siwaasisa ami sami siwoyaametahiyaisawi ambipati windi timaamaamaitiwise. Sahi isihiya usaamihapa ikomaaniwise. Isihiya piwiha atiwi nepi tipitapaapi mmonihohiyihyaapihi sahi piwiha usaapi jaipitiwiha kamaatiwise. Sahi usaisi jaipundiwi kiyaamapa nawiho ami wapa wapaisangi aipi namausepise. Sahi sami siniya japiyaami piwiha atiwiwi kiyai nepi autaahi isiwatiwise,’

Japihi Numwaasiho 20:12-17; Winihapipa 5:16-20

tati winihapipa ahondaise,” undati kaundataase. ²⁰Aihi ko Jisaasihoai saundataase. “Katipinyasingihonye, nini metihonihuraapi sapa winihapipa nahataapa japepilirimi napiti wani kimurandaise,” undataase. ²¹Aihi Jisaasiho koai titihi iwinjatataati maariho nunyati maariho wiwiwati koai saundataase. “Kinyi winihapipa nga japepilirapaahandi kandi nehi naasaindih windapaahihhi nenoahitapaise. Isi wani numbwi kinyi ikipipa kahapaamapipa nahataapa nepi isihiya usaisi nunyapi nawiho nepe. Nunyapi nawiho nepi isihiya ikipipa apipaahi owematimai nawiho ko nunye. Kinyi saimbi kiyapaapaahi kinyapihaiwa apipaahi gaahaiwa yamihapataatihhi ahisotitaise. Numbwi saimbi kaimbimapi nambi ningi nanipinje,” undataase. ²²Aihi ko Jisaasiho piwiha kaundisiha atisataati namati mandiropatati windi maarimitati maariho naanjawisaho notaise, ami ko ikipipa taahipaisahondaato.

²³Siyati ko aimi naihi Jisaasiho komi otipipatihiyai gaamati winjatataati kiyai saundataase. “Isihiya ikipipa asaketahiya Autaahaatiho iwinjatitandihandaatihhi napwi nandaitaatiwi apipaahi naanamataise,” undataase. ²⁴Aihi Jisaasiho piwiha sata kaundihi kiya komi otipipatihiya atisawaawi waati aungwohandi yaiwimapi gwinyapenawaayopo. Saiwi yaiwipwitauihi ami Jisaasiho kiyai jihaati saundataase. “Nisi metihonyaate, utaaho wo Autaahaatiho iwinjatindihandaatihhi nandaitandaisihoai ami koai Autaahaatiho iwinjatitandi apipaahi kimbimatati naanamataise. ²⁵Sandi utaaho wo ikipipa asaketahoi Autaahaatiho iwinjaati bimitandi apipaahi watipitati naanamati niwipindaise. O ami Kamerihandihhi jaatihirami daundirihira windi namitanati windi napasipasinati kamaayati nga nanihiyati napaisaati nandaasi nutaise,” undataase. ²⁶Aihi ko Jisaasiho sata kiyai kaundihi, kiya komi piwiha atisawaawi maariho owetihi

Katiwunjohiyihiyaami ikwiraatihinimasaihi nini napwitandihandapi kiya piwiha nepi nisiheti yanutaapi, 'Kinyi winihapipa nemapaini napope,' ndiwi piwiha wisasitaapo. Saiwi piwiha wisasawi isihiya Judaahiyaami dawaapipihi bimohiyihiyaami ikwiraatihinimaitaapo. ³⁴ Saiwi kiya ningi nepi kiyaamihetinimasaihi ami kiya tiworisa ningi sisipihindiwi maahoapinupwi ami irihira maahwitiwi nindipapi ami sohonongi niwisaihi nini napwito. Napomatati ipoti asisiha mairima saniyonihura asohoninimandi japihi nepaito," undataase.

**Kima Piwima Jisaasihoai Jemisiyi Joniya Kinyi Wihiwihoaaji
Yihoanyangi Nepinyitaape Undimi Nunjesitihandapihaare
(Matiyuhu 20:20-28)**

³⁵ Aihi Jepetihomi mwaahuri Jemisiyi Joniya nami deti Jisaasihoai saundamaase. "Katipinyasingihonye, kinyi yihoanyangi wapa kanyitaapihandapi gisi nangisendihaawiyo," undamaase. ³⁶ Aihi Jisaasihomiha wihoanjiha kuri saundataase. "Nini sihoasangi napindi kasitande?" undati nunjenataise. ³⁷ Aihi kuramiha wihoanjiha gwinyaasiha Jisaasihoai saundamaase. "Ipotihura kinyi kinyi gaahaiwa sisahaamatiyati otiwa kaumbwaati isihiyai niwusainjitihandaatih kinyi ganiho gaahoaasini ambipati wandiha awaisiha nepi isihiyai iwinjatapaahura kinyi yihoanyangi kanyatisamihi kinyatiyaha ambipati ami wandiha awaipati neha wonini kinyi ikwiri gaatihiraihoanjanitanihi ami wonini kinyi ikwiri konaamohihoanji gisaha isihiyai iwinjaaha bimitihaawito," undamaase.

³⁸ Aihi Jisaasihomiha wihoanjiha kuri saundataase. "Sahuraahi sa piwima ningisi nanisepe kandisaapi windi baimi gimunyaapi monimihuraahe. Owetise. Nini yaasihandi waapoho sawinjiho ipiho yahohomatiyahandi nandandiyohitihandi sahuraahi nga ningisami maasi maingwanaanini newaati nandaano? Iyataati isihiya waapihaateti nandaahauhi waapihaati nurimaasasipatamatiyati ningi yaasihandi awaindihandi siyati nanimaasaitaise. Isi siyati yaasihandi nanimaasahonihi sihoaahi kandi nisi maariho ambipati nahandi yaasindihandaatih maasi maingwanaanini nandaasaihi maingwanaanangi ahoyati nanyamaasaitaiso?" undataase. ³⁹ Aihi kuri saundamaase. "Ye, yihoanyangisangi kinyi naanjihandi kinyi ambipati ami maariho nahatoji yaasahandi naitapaingiwimaiwaamaahi ami kiyaha naito," undamaase. Aihi Jisaasiho komiha wihoanjiha kuri saundataase. "Akitinihi sihoaahi nga waapoho nandandiyohiho nanimi ami yaasati naanjihandi ningi waapihaatamatiyati nanimaasaitandaindimandi sihoasangisangi nga nasamaasaitaise. ⁴⁰ Nasamaasahonihandi kandi nini sihoasangisi woji nisi ikwiri gaatihiraihoanjanitanihi ami woji konaamohihoanjanitanihi ningisapi

wonji otipipati sati kaimbi ami wonji sati kaime satitandihandi sandi nisihandimahe. Owetise. Sandihi Autaahaatihomihande. Autaahaatihomihandisi isihiya sati otipipati ami aunahipa naitaatiwe tati neti timanati namihanati kiyaapi gwinyaasawihiyai numwitaise. Nunyati ahiwitaise,” undataase.

⁴¹ Aihi ami otipipatihiya sasaahoya ikwimaindimwi 10 kaiwihiya kuri Jisaasihoai saundimi nunjesihaapi atisawaawi kiyai Jemisiyi Joniyaapi apousataise. ⁴² Aihi Jisaasiho komi otipipatihiya nahatiyai numwaati detematosati ko piwiha sata kaundataase. “Sahi kimandi aimi mmopi gwinyaapihiyaate. Isihiya usa Judaahiyaanami dawaataatapihiyaami mitihiya awaisawihiya isihiyaisi iwinjaawi bindawaawi nyahi awaisawihiyaaniso tiwi maaritiwimapi wandiha ambipati awaipati nunjawi kiyaami isihiyai nepi uripatiwi otipipati aungwohaiwa kimbimatahaiwa waati nunyawaayopo. Aiwi ami kiyaami awaisawihiya Kijihiyaisangi kiyaami watipihandi wandihaaraahi isihiyai nepi yatihiti otitihemapi saundiwi, ‘Sahi nyami yatihiti pinuwi nyami piwiha baiwi atinyiwise,’ undiwi maaritiwi apipaahi watipitiwimapihiyaare. ⁴³ Isi siyahaiwa saiwa gaahaiwaametisi sami otihatihiti saiwa apipaahi windi namoipane. Apipaahi owetane. Isi sami wonji noaipapi usaami jihimatipi awaisihonjimatitaapaahi kinyi noaipapi nahatiyaami nehi otipipatihonjimate. ⁴⁴ Iyataati ami sami wo noaipa jiho awaisihoematitandaahi ko noaipati sahi nahatiyaatami nehi otipipatiho nehioematane. ⁴⁵ Sandi apaapimaato. Ami Nini Isihiyaami Saahonini Jihonini bwandipihonini nasohitimandi otipipati ningisi nitatamanati anditiniwitandihati isihiya kaiwi nitatamanisaihi nga bimitandi nini nasataamaayo. Owetise. Isihiya taahiyihiyai nini iwitatamaniti ami Autaahaatiho kiyai nunyati numwaitandi nisi ambipati nawihomataindi koai nunyandandi napitihonine. Nini saindi nunyainjanihi Autaahaatiho nisi ambipati nunyati isihiya taahiyihiyai numwaitando,” undataase.

Kima Piwima Utaaho Wo Batimiyaasiho Ndiha Niyotahoai
Jisaasiho Nusorihaasitihandapihaare
(Matiyuhu 20:29-34; Rukiho 18:35-43)

⁴⁶ Kiya naiwi aunahipa Jerikohanda noaipawaayopo. Noaipapi Jisaasihotihiti sapihi namasi taati naihi komi otipipatihiyauni ami isihiya taahitihandi kiyai niwipinjai niyohiyihiyauni kati aunahipiti namasisi Jisaasihoaisawi taawi aimi niyawaayopo. Aihi utaaho wo komi ndiha niyotaho Batimiyaasiho, Timiyaasihomi mwaaho isihiya daihira nuwi napiwiyohipihiti bindataise. Komi ndiha siyati niyotahosi isihiya daihira nuwi napiwiyauhiihiyai nawiho kahapaamapipaapi itundati daihira mangiraini bindataise. ⁴⁷ Isi ko daihira mangiraini bindataati isihiya satiwi, “Nasaretihandaahapi Jisaasiho yamo taati nasataise,” tiwi

katauhi atisataise. Atisataati ko waati kaahaata sandaase. “Jisaasihorje, Daawitihomi mwaahorji Satihorje, kinyi nisapi maariho tihitane,” tati kaahandaase. ⁴⁸Aihi isihiya taahiyihiya koai itihundiwi, “Kinyi kaahaapa bipi namihaape,” undiwi niwisapuwaayopo. Saiwi kiya koai namihaape undauhihand kandi ko kiyaamiha atihomaawisa waati asakata kaahaata, “Daawitihomi Mwaahorji Satihorje, kinyi nisapi maariho tihitane,” tati kaahandaase. ⁴⁹Aihi Jisaasiho komi gapipa atisataati namati kapihi bitondaise. Bitondaati saundataase. “Napita sopi gaatiwise,” undataase. Aihi kiya so ndiha niyotisoai gaatiwi saundawaatopo. “Kinyi maaritipi dosisi name Jisaasiho kinyapi ko nasane ndaaso,” undawaatopo. ⁵⁰Aihi ko atisataati komi apotihiri tiwatihaati nipaatihiri nausohaati yotamapi dosisi Jisaasihoaapihi notaise. ⁵¹Aihi Jisaasiho koai saunda nunjenataise. “Nini gisi napindi kahitandi gaatise,” undati nunjenataise. Aihi komiha wihoanjiha saundataase. “Katipinyasingihonye, nisi ndiha nanorihatonih japihi nga baindi jaitandito,” undataase. ⁵²Aihi Jisaasiho komiha wihoanjiha saundataase. “Kinyi nisapi ko nisi ndiha neti nga nanorihaitaise tipi andititipi ginunyaahingitihandaahi kinyi ndiha nangorihatonih numwe,” undataase. Aihi Jisaasihomi piwiheti keti kuraanihi komi ndiha biyati nusorihaitih biyati jati Jisaasihoi niwipinjai daihira notaise.

Jisaasiho Aunahipati Jerusaremihandi Awaisiho

Kinjhoematati Nandaasitihandapihaare

(*Matiyuhu 21:1-11; Rukiho 19:28-40; Joniho 12:12-19*)

11 ¹Aihi kiya naiwi deti Jerusaremihandi noaipaitaahetihi aunahipihauri Betipaakihandamuni Betaanihandamuni sisiho Oripihoasini niyawaayopo. Saiwi taawi niyawaawi Jisaasiho komi otipipatihuri yahuri jihi natausaasataise. ²Natausaasataati kuri piwiha saundataase. “Kimihini kimati aunahipimati jahohimata numwise. Numwi titihi mmonama dongihandami mwaaho sipipihoho isihiya windi awitimatiwi dahomaiwiho wiraposisaihi wiranditaise. Isi ko nesipapi nesi nami kimbihini ningi nanimitaaitime. ³O ami isihiya usa sihoasangi sasatiwi, ‘sahuraahi dongihoai napitaitaaitimi taami nesipase?’ satisaihaahi sahuraahi kiyai saundimise. ‘Awaisiho komi otipipati witi ahotihini kati kaitandi kanyatihisi kati kiyati owetanihi japihi keti kuraanihi numwaasisamaitaise,’ undimise undati,” natausaasataise. ⁴Siyati kuri Jisaasiho kaundati natausaasihini numwi mmonama dongihandami mwaaho aimi akururaaho sipipihoho anjihandami maasometeti daihiraami nehinihi wiraposauhi wirandihini mmonamaise. Mmonimosami taami kandi dongihandami mwaaho numwaasi nutotimi nesipamaise. ⁵Saimi taami nesipasihini isihiya kapihi bitohoyihiya kuri saundawaatopo. “Sahuraahi napaapi taami dongihandami mwaaho nesipase?” undiwi nunjenawaapo. ⁶Aihi kuri Jisaasiho

nasisesaihaahi saundimi kaundimise undatati kaundisiha ka kaundamaase. Aihi kiya kuri, “Gaasi gohi numwaasi numwise,” undawaatopo. ⁷Aihi kuri dongihoai numwaasi Jisaasihoaapihi noaipamaise. Noaipapi kurami apotihiri tiwatihatihi niyosirihiri nausohaapi dongihandami dawaarihireti ahaihi Jisaasiho kasini nasaamana bindataise. ⁸Aihi ami isihiya taahiyihiya apotihiri kiyaami tiwatihatihi niyohohipaisangi nausohaapi daihira Jisaasiho nutandihira gaamapi nusapaapi gwaumwi nowaayopo. Aihi ami usa osaataati nuwi ipati iwiwirihome isaaha nimanwi nesipiwi daihira gaamapi gwaapowaayopo. ⁹Aihi isihiya jihuni ipotuni Jisaasihoai otihapemapi maaritiwi nowaawi waapihitiwi satawaatopo. “Nyahi Autaahaatihopi maaritahaayo. Kimo Awaisiho Autaahaatihomi ambipataahi nasahosi Autaahaatiho koaisi gaahati kawisati gaahandi nunyane. Osaana. ¹⁰Kimandi noaipasitimandi nyami asiho Daawitihohi isihiyai iwinjaati bimindihandamatiyahandi noaipaitandaisi gaahandi noaipaitandihandi Autaahaatiho koai nunyane. Nyahi Autaahaatihopi waati maaritahaayo. Iyaati Autaahaatiho yamihapataatihi bimisihoai mepi autahewaumihaayo,” tiwi konyahitawaatopo.

¹¹Siyati saiwa noaipasihi Jisaasiho niyati aunahipa Jerusaremihanda nandaati niyati Autaahaatihomi Anji Awaindihandaatihi nandaati nahataapa katihi ahotimbipai jati mmonataise. Mmonati kiyamapi ipiho aimi noti tipateti namaatipasihi katihi namasi ipaahaapi noaipati komi otipipatihyaisati maasi aunahipa Betaanihandaahapi notaise.

**Ipati Pihoaipihomatiyahati Yandipihohi Namingosihohi Kati Jisaasiho
Yandipihohi Namingope Undihohi Awaipitindihandapihaare
(Matiyuhohi 21:18-19)**

¹²Saiwi nuwi aunahipa Betaanihanda nanopawi bowihi nepasi japihi kapihi Betaanihanda namasi niyawaayopo. Niyawaawi Jisaasihoai jaumanataise. ¹³Aihi Jisaasiho ipati witi pihoaipihomatiyahatami yandipihohi namingohati onihohi wonji yaninaatihohi mwininjati ahetihi jataise. Jataati wiwa yandipihohi ningotihohi ahotitaiso tati detapi mmondandi niyataise. Niyati detapi yandipihohi ningotihohi ahotitaiso ta mmonata yandipihohi ningoitandihura sangindaati nehi yananaatihohi nupwaitati mwinati ahetihi mmonataise. ¹⁴Aihi kati ipiti Jisaasiho saundataase, “Isihiya kinyi yandipihohi jahaati windi nandiwi namaahindaapo, owetitaise,” undati kaundihi komi otipipatihyaha piwiha sa atiwi newaayopo.

**Isihiyahohi Kahapaamapipahohi Anji Awaindihandaatihi Ahiyawihohi Nunyawihohi
Nehauhi Jisaasiho Tahamasitihandapihaare
(Matiyuhohi 21:12-17; Rukiho 19:45-48; Jonihohi 2:13-22)**

¹⁵Aihi kiya naiwi Jerusaremihanda noaipawaayopo. Noaipapi Jisaasiho Autaahaatihomi Anji Awaindihandaatihi nandaataise. Nandaati isihiyahohi

katihī taawi kahapaamapipa nunyawī nawihō nepī ami nawihō yapipati witiwitaahapihō nunyawī Judaahiyaamihoetemapi nepī kiyohiyihiyaami ganihō neti nepuhotaise. Iyati ami isihīya nawihō nunyawī kohō dipisihō gaarehandi Autaahaatihōai numwitaatiwī nehohiwaiwaami ganihō neti nepuhotaise. Iyati ami kiyaisi neti tahamanausoasataise. ¹⁶Neti nepuhoti katihī Anjī Awaindahandaatihī usaanjaipataini ami gotitipihiroti isihīya saiwa japihī isisi katihī nandaapi nuwī napiwimaitaatiwī neti niwimbipuwataise. ¹⁷Iyati ami ko isihīyai kataunjati saundataase. “Autaahaatihōmi piwiha jipatipindisihaatihapi Autaahaatihō sandaase. ‘Nisi añaanji saanji isihīya yapihī nahandaahapihīya nahatiya napiwī gaapunditaatiwihaane,’ tati jipatipindise. Satati jipatipindihandī kandi sahi isihīyaami nawihō wihōaanjihō titihī kamwaanji namunyawī wihōaanjihō wo ikonīwī nusaitaatiwī sandi sahi kiyawaayopo. Siyawaawi nisi añaanji ikohīya ikopa kaitaatiwī noatitaatiwihaanjemawaayopo,” undataase.

¹⁸Aihī pirisihīya isihīyaapi nandapa tihīwī Autaahaatihōai dipumanihohiyihīyaami mitihīyauni ami Judaahiyaami winihapipa katiwunjojhiyihīyauni Jisaasihōmi piwiha sata kaundisihaapi atiwi newaayopo. Atiwi newaawi Jisaasiho sohoai tiwitaatiwihira daihiraapi daawaayopo. Iyataati ami kiya kopī yayawaayopo. Sandi kopī yayotimandī apaapīmaahē, ami isihīya nahatiya Jisaasihōmi piwiha atisawaawi kiyaami maarihō windosihuni ami Jisaasihopi maaritauhe. ¹⁹Aihī aimi ipihō naihi asihananaataatihī Jisaasihōuni komi otipipatihīyauni aunahipati Jerusaremihandī namasi nowaayopo.

Kima Piwima Jisaasiho Satati Utaaho Wo Wapaapi Gwinyaataati Kapa Akitinihi Naito Tati Kopi Giwunyaati Autaahaatihōai Nunjenihōnaahi Nunjesipapa Naitaise Tindihandapihaare
(*Matiyuhō 21:20-22*)

²⁰Nanopawī bowihī kohokoaisawī nepasi daihira niyawaawi ipati witi pihoaipihomatīyahati awaipitamasihī mmonawaapo. Sati ipiti isaaha isititī saatitihō tamitati damipati tambatihiri nahataapa osamatī apīpaahi napoti awaipitamataise. ²¹Siyati awaipitamasihī Pitaaho mmonataati gwinyapenataise. Gwinyapenataati bati ipiti kaundindahandapi namati Jisaasihōai ko saundataase. “Katipinyasingihonye, jase, kimati ipimatisi kinyi bati itihundingipati wani aimi awaipitati napomataiso,” undataase. ²²Aihī Jisaasihōmīha wihōaanjīha kiyai saundataase. “Sahi baiwi Autaahaatihopi giwunyaapise. ²³Isihīya usa baiwi Autaahaatihopi giwunyaahohiyihīya kimiri sihoarimiri tipimati, ‘kinyi niwautipesi durihiraatihī timandaate,’ undiwi nga kaunditaapo. Kaundisaihi ami kireti titihī kiya noaipaitaise. Saiwi kaunditaatiwihīya maarihō yiyahwi gwinyaapihiyaamaahē, owetise. Nehi maarihō naasohihī giwunyaapi

nyahi katisaihi titihi akipipa noaipaitaise tiwi gwinyapenawaawi katitaapo. Isi nini sangi akitinihi sandi kasatataato, sahi wapaapi gwinyapenawaawi katisaihaahi titihi akipipa sami katohimumwaanji kamwaanji japepihira titihi kapa noaipaitaise. ²⁴Isi sahi Autaahaatihopi gaapundiwi wapa naitaatiwi koai nunjenawaawi nyami kaundohipipa akitinihi kapa titihi naito tiwi gwinyaawaawaahi sami katohipipa kapa titihi naitaapo satiti nini sangi akitinihi kasatataato.

²⁵“Isi sahi gaapunditaatiwi dowaaheti utaaho wo sangi maipihandi windi kasindahandapi kopi gwinyapenawaawaahi namapi komi maipihaiwa sangi gaapundiwiwatawa jiji nepumapise. Saiwi kaisaihaahi ami sami japiho yamihapataatihi bimisihohi sami maipihaiwaisangi nesamaitaise. ²⁶(O ami utaaho wo sangi maipihaiwa kasiwaiwa nepimumwawaawaahi ami sami japiho yamihapataatihi bimisihohi sami maipihaiwa windi nesamaamaitaise owetitaise,” undati Jisaasiho kiyai kaundataase.)^s

**Awaisawihiya Jisaasihoai Watipihandi ndi Nahinyati Kahitihini Kinyi
Sandi Kiyapaise Undotihandapihaare
(Matiyuhu 21:23-27; Rukiho 20:1-8)**

²⁷Aihi kiya japihi napiwi Jerusaremihandanda noaipawaayopo. Noaipapi Jisaasiho Anji Awaindihandaatihi nandaati taati daayataise. Aihi pirihihiya awaisawihiya Autaahaatihohoi nandapa tihiwidi dipumanihohiyihiyaaami mitihiyaauni ami Judaahiyaami winihapipa katiwunjohiyihiyaauni ami usa gwinyaahiyauni Jisaasihoapihi nasawaayopo. ²⁸Napiwi Jisaasihoai satiwi kiya nunjenawaapo. “Kinyi isihiyai Anji Awaindihandaatihi saiwa kamaiwise undipi niwisapupi kaingitimandi watipihandi diyaamihandaaha? Aimbini ami gisi saimbini kaimehita ndi kahitihini kinyi kiyapaise?” undiwi nunjenawaapo.

²⁹Aihi ami Jisaasihomihi wihoaanjiha kiyai saundataase. “O ami nini piwiha wa nehi naasaahihini nasisendaano, sahi wihoaanjiha baiwi nepi kandisaihaahi ami nini kaiwa kaiwa kiyohiwimaiwaapi watipihandi sandaaha satiti sangi kasatitendo. Isi nini sandi nasisendaano. ³⁰Jonihohi isihiyai piwiha ausaati kaundati ami waapohora baawusindindi Autaahaatihomi watipihandaaho e yapipatambi isihiyaaami gwinyaahotihandi watipihandaaho wani sahi kandiwise?” undati kiyai nunjenataise.

³¹Sata Jisaasiho nunjesihini kiya sawana sanawaatopo. “Nyahi napititihahaawe? ‘Nyahi Autaahaatihomi watipihandaaha,’ undisaihaahi piwiha Jisaasiho wihoaanjiha sanyatitaise. ‘Ami Autaahaatihomi watipihandaahaahi sahi Jonihohi napindapi gimaawunyaahopo?’

^s 11:26 Utipihaiwa taahiwaiwa wiwaatihi kima piwima windi jipatipimindise. Owe.

nyatitaise. ³²O ami nyahi, 'isihyaami gwinyaahotihandi yapipatambi watipihandaaha,' undisaihaahi ami isihya Jonihopi Autaahaatihomi piwiha atisati neti ausaasihoe tiwi giwunyaapihiyaasi kiyaisi nyapi apowitaiso," nnawaatopo. (Ami kiya saniwi kanihotimandi sandi kiya isihyaapi yayawaawi kanawaatopo.) ³³Aihi kiya yayawaawi namapi Jisaasihoi saundawaatopo. "Nyahi saiwaapi windi mmonaahiyaane," undawaatopo. Aihi Jisaasihomiha ami kiyai saundataase "O siyonaahi ami nisangisi watipihandi sandi so nanimihihanda saindi kiyataayo satiti windi kamaasatito," undataase.

**Kima Piwiha Isihya Maatimaatiwihiya Wainihandi Osaataati Jaawi
Bimohiyihyaapi Jisaasiho Namihana Katindahandapihaare
(Matiyuhu 21:33-46; Rukiho 20:9-19)**

12 ¹Aihi Jisaasiho piwiha namihanaha Judaahiyaami awaisawihyaapi kiyai sata kaundataase. "Utaaho wo wirihiri wainihandi niyaamati naporihiri nisati nisihoaapotosati ami waapoho wainihandi namwaitandihandi kiyataise. Kiyatosa ami añaanji waanji isihya wainihandi ikondaatiwihiyaapi tamangipipihapi jaawi bitoaitaatiwihaanji autaahi niwaataati animatataise. Siyati kiya owetihi isihya usaisi saunda nunyataise. 'Sahi nisi osaataati wainihandi kimandi ninjaawi bitosawise. Ninjaawi bitotawaawi wainihandi ningohonihura sapihandi nanawaawi ami niwahonisapihandi nanimitaatiwo. Aiwi ami windi nunyawawi isihyai nawiho naitaatiwe,' undati kiyaami ikwiraatihimataise. Siyati nunyamapi konihi kaanihi wapihapi nomataise. ²Nomati ketinjati wainihandi aimi ningoti akuraihihura komi otipipatiho woai saundataase. 'Kinyi numbwi nisi wainihandi ninjaawi bitohohiyihyaapihi noaipasamihi kiya wainihandi windi nahimisaihi nanenapita numwe,' undati natausaasataise. ³Siyati natausaasihi ko naihihandi kandi kiya wainihandi jasohiyihya komi otipipatihoai isiwatawa timambiwi ahiyawawi nehi taanahihoai japihi nepi natiwusaasawaayopo. ⁴Aihi ami wainihandami satiho komi wainihandi jaawi bimohiyihyaapihi jihaati komi otipipatiho woai natausaasataise. Aihi ami koai isiwatawa mitihaatihi timbipi jitipitahandi tipi mawahandi nunyawaayopo. ⁵Aihi wainihandami satiho ami komi otipipatiho woai jihaati natausaasataise. Natausaasihi ko noti kiyai iwinjasihiki kiya koai sohoai tiwawaayopo. Aihi wainihandami satiho ami komi otipipatihiya taahiyihyai natausaasataise. Natausaasihi kiya nuwi kiyai iwinjahauhi jihiyai kawisohipati kati kawiwawi usai goti tipusoasawawi ami usai siyihiyai tiwawaayopo. ⁶Aihi ami komi mwaaho nehi naasohihi maariho biyati wiiwahoai ipoti natausaasitandi bindataise. Aihi ipotaataatinihi sawahomi mwaahoai wainihandi jaawi bimohiyihyaapihi neti natausaasataise. Natausaasataati sapihoo sandaase. 'Nisi maasihihomi

piwiha kiya baiwi atiwiwitaapo,' ndaase. ⁷Satati natausaasihi ko noti noaipasihi wainihandi jaawi bimohiyihiya taati naihi koai iwinjaposawi kiya sanawaatopo. 'Kimo utaamo wainihandi kimandami satihomi titihi mwaaho akohoe. Isi koai sohoai tiwitihawwi napiwise. Tiwisaihi ko naponihi ko wainihandi osaataati naitotahandi namawa nyahi kandi nesaihi nyamimatitando,' nnawaatopo. ⁸Satiwi kanawaawi namapi komi mwaahoai isiwatawa sohoai tipi osaataatami nehahaati yotawaapo.

⁹"Isi wainihandami satihomi kiyaisi napitiwitaase. Osaataatami satihomi nasati kiyaisi siyihiyai tiwamaitaise. Tiwamati komi wainihandi osaataati usai nemwitaase. ¹⁰Piwiha kima sata jipatipindisiha sahi windi awimitiwihyaato:

'Añaaji anjimatohiyihiya yasiha kimaapi ponyase tiwi namahotiha wani noaipati mihotirisati añaajapi yasiha aundetihomi anaahihaimatataise. ¹¹Awaisiho sawaho sandi siyati kaihi nyahi mmonihawwi apipaahi gaatihi maaritihawwi,' *Aunihihiri 118:22-23* tati jipatipindise," undati kiyaisi kaundataase.

¹²Sata Jisaasiho kiyai kaundihi Judaahiyaami awaisawihiyai komi piwiha atiwisawaawi ko nyapi piwiha sa namihanaha kandaase tiwi Jisaasihoai isiwitotiwai gwinyaahohiyihiya namapi isihyaapi yayawaawi koai namasi nowaayopo.

**Kima Piwima Jisaasihoai Isihiyai Nyami Awaisiho Sisaahoai Nawihomi
Numwitaano Undiwai Nunjenihotihandapihaare
(Matiyuhu 22:15-22; Rukiho 20:20-26)**

¹³Saiwimapi nuwawai bowihi isihiyai Parisihyaami usaisuni ami Erotihomihiyaiami usaisuni ko napitinyatise tiwi bipi iwinjatawa nunjendaatiwi Jisaasihoapihi natiwusaasawaayopo. Aiwai ami piwiha wa wipita asireti kaundonaahi asireti satipihone undiwai piwiha komiheti nutotiwai. ¹⁴Aihi kiya nuwai Jisaasihoapihi noaipapi koai saundawaatopo. "Katipinyasingihonye, nyahi gwinyaahaayo kinyi utahonji ainahihonji piwiha titihi gaahaahihomi katipihonjinihi. Aimbai ami kinyi isihyaami gwinyaahohiwaiwaapuni kinyapi itihitohiwaiwaapuni windi yamaimbani andititipi bitotapa Autaahaatihomihomi piwiha naasika Akitihahihomi katipinyasapihone, isihiyai awaisawihiyaisuni gwiharaahiyaisuno. Isi wani nyangi kanyate. Nyahi awaisiho Sisaaho Romihanda nahataapipihomi jatisihoai nawihomi gamanihomi otipipati kaitandihomi nunyahaawaahi sandi Judaahiyaami winihapipa newa nopisasihaayono e owetiso? Isi Sisaahoai nawihomi nunyaano e namunyaano?" undiwai kiya nunjenawaapo.

¹⁵Aihi Jisaasiho kiyaami jaiwaiwi iwinjatawa nunjenihotihandihomi usonataise. Usonataati kiyai wihoanjiha saundataase. "Sahi napaapi napiwai ningi ninjatawa jaiwaiwi taawi nanishopo? Nawihomi taanauhohi woi isisi nasawaawaahi naninyawewise nini mmondaano," undataase.

16 Undihi kiya nawiho wo nunyauhi ko neti mmonatosati ami kiyai saundati nunjenataise. “Kimati siwipimatuni ambibatuni diyaamihate?” undataase. Aihi kiya saundawaatopo. “O awaisiho Sisaahomihate,” undawaatopo. 17 “O siyonaahi wapa awaisiho Sisaahomihapanaahi ami koai titihi komihapa nunyawise. O ami wapa Autaahaatihomihapanaahi ami titihi kapa Autaahaatihoai nunyawise,” undataase. Undati Jisaasiho piwiha kaundihi kaapi kiya namapi yaiwimapi maaroamapi pihitiwi gwinyaawaayopo.

**Kima Piwima Jisaasihoai Satiyusihiya Isihiya Napohiyihiya Japihi
Nepaitaatiwihandapi Nunjenihotihandapihaare
(Matiyuhu 22:23-33; Rukiho 20:27-40)**

18 Judaahiyaami usa isihiya Satiyusihiya Jisaasihoapihi napiwi noaipawaayopo. Isiya siya Satiyusihiya satiwihyaare. Isihiya napohiyihiya japihi windi namepaitaapo tiwi gwinyaapi katiwihyaare. 19 Isi kiya Jisaasihoai saundiwi nunjenawaapo. “Katipinyasingihonye, Mosesiho nyapi winihapipa kimba sata jipatipiya ahiyataise. ‘Utaaho sihimwaaha manyinya oweho nehi bimainja apwaataati namasi naponahi sotisomi titihi saingihosi osinihaati neti wirane. Iyonihi manyinya koapihapi noaipahohiyihiya komi aunahipa naitaatiwimahe. Owe. Sotisihomi aunahipa naitaatiwe,’ tati ahiyataise. 20 Isi isihiya sapiho naasomi mwaaya taahiyihiya 7 kaiwihya noaipawaayopo. Aihi jiho bwandipihosi apopaati neti wirataise. Ko neti wirati bimainjati maaha oweho napotaise. 21 Aihi ami komi saingihosi komihini noaipasiho saahomi osinihaati neti wirataise. Wirati bimainja ami koaisangi naasikati kiyati maaha oweho napotaise. Aihi ami kapihoaisangi kati kiyati neti wirati bimainja maaha oweho napotaise. 22 Saiwi nahatiya kaimi nuwi ipotaataatiho 7 hoaisangi naasikati kiyati maaha oweho napotaise. Aihi ipotinihi kaati apopaati napotaise. 23 Isi saati apopaati saaho saingihosi nahatiya 7 kaiwihya nepi wirapihaatisi asisiha isihiya japihi nepapi asitimatitaatiwiha noaipahonihura saati apopaati noaipati diyaamahomi apwaataatimatitaise?” undiwi Jisaasihoai nunjenawaapo.

24 Aihi Jisaasihomiha wihoanjiha kiyaisi saundataase. “Sahi moniwi gimunyaapihiyaato? Sahi Autaahaatihomi piwihaatihi jipatipindimbipaapuni ami Autaahaatihomi watipihandapuni sahi apipaahi windi moniwi ami windi gimaasunyaatahiyaato? Ami sahi Autaahaatihomi piwiha jipatipindiwaiwaapuni ami Autaahaatihomi watipihandapuni windi moniwihyaatisi sahi saiwa nahiriwi katawaatopo. 25 Isihiya japihi nepawaahura wanamataiwi windi namaamaatindaapo. Owetitaise. Nehi Autaahaatihomi otipipatihiya yamihapataatihi bimohiyihiya enjerihiyaamataiwi bimitaapo.

26 “Isihiya napohiyihiya japihi nepaitaatiwihandapi Autaahaatiho piwiha katisiha sahi aimi akitinini awitiwihyaate. Mosesiho piwiha

ipati mwinihati sisiha sawiha tihindindapi jipati piya ahaisiha sahi windi awimitowo? Sandi ipihosi aninetahonji maipihonjaatihapi sisiha tihisihaapito. Sa piwihaatihi Autaahaatiho Mosesihoai saundise. ‘Nini Abiraahamiho Aisaakiho Jekopihomi Autaahaatihonine,’ undise. ²⁷Autahaatiho so isihiya Autahaatihopu gimaawunyaapihiya napohiyihiyaami Autahaatihomahe. Owetise. Autahaatiho so isihiya sangi napopi asiyihiya bimohiyihiyauni ami isihiya aimi napohiyihiya kopi giwunyaahotihandaahi kiyaanihi asiyaimatiwi koaisawi bimohiyihiyaami Autahaatihore. Isi sahi nahariwihyaatisi piwiha sa apipaahi naharitiwiha katawaatopo,” undati Jisaasiho kiyai kaundataase.

**Kima Piwima Autahaatihomi Winihapipa Awaimbipa Jihapaapi Sapa
Awaimbipaare Undati Kaundindihandapihaare
(Matiyuhu 22:34-40; Rukiho 10:25-28)**

²⁸Utaaho wo Judaahiyaami winihapipa kataunjisiho nasataise. Nasati atisata kiya Satiyusihiya nunjenihohiwaiwa Jisaasiho nga wihoanjiha biyati ausaati nusesipati kaundihi ko winihapipa kataunjisiho atisataise. Siyati biyati gaaha kaundihiyataati namati komiha Jisaasihoai sata nunjenataise. “Winihapipa mahiwapaanihi apipaahi awaimbipa jihapaare?” undati nunjenataise. ²⁹Aihi Jisaasiho komiha wihoanjiha koai saundataase. “Winihapipa apipaahi awaimbipa wapaisi nusatipihahapa kimbaare: ‘Sahi Isiraherihyaate atiwise. Nyami Awaisiho Autahaatiho nehi naasohihi ko Awaisihore. ³⁰Isi kinyi kinyi maariho kinyi amitiha gwinyaahingitihandi kinyi andititingitihandi kinyi watipihandi kinyi gwisaha saiwa nahatewa Autahaatiho naasomiheti niyonihini kinyi Awaisiho Autahaatihoaisaahihi maariho napaitipi nunye.’ ³¹Aihi ami winihapipa wapa awaimbipa kapihapa kimbaare. ‘Kinyi kiwahonji maariho naminipi kinyi ambipatisi maariho nunyapi baimbi napaitipi itatamanihingipatamataimbi kinyi naisohoi maariho nunyapi ami komi ambipatapihapa nunyapi iwitatanimi.’ Iyataati winihapipa wapa awaimbipa kimaursi nusatipihati awaimbipaaitandihapa apipaahi owetise,” undati Jisaasiho koai kaundataase.

³²Aihi ko winihapipa kataunjisiho Jisaasihoai saundataase. “Katipinyasingihonye, kinyi titihi piwiha apipaahi akitinihi akaaha katapaase, Autahaatiho Awaisiho nehi naasohihi bindataise. O wo autahaatiho owetise. ³³Isi nyahi biyaati napaita nyami maariho nyami gwinyaahotihandi nyami andititotihandi watipihandi nyami omanjititihini saiwa nahatewa akitinihi komiheti niyonihini koaisaahihi maariho numwitahaawo. Iyaati ami nyahi yawanaani nyami ambipatisi maariho nunyaati biyaati napaitaati itatamanihopatamatiyaati ami naisihiya ami isihiya usaisangi maariho nunyaati iwitatamanitahaawe.

Isi winihapimauri kimauro nyahi atisaati biyaati japepihirotihandi nyahi gaarehandi nandapa kohasipihō tihāati Autaahaatihoai dipumanihohiwaiwa nahatewaisi nusatipihāataise,” undataase.

³⁴Sata ko winihapipa kataunjisiho katihi Jisaasiho atisata ko biyati titihi akaaha katihiyataati Jisaasiho koai saundataase. “Kinyi Autaahaatiho isihiyai iwinjaati bimindhandaatīhi nandaitaapi aimi detitapaise,” undataase. Undati kaundihihura isihiya nahatiya yayawaawi andititiwi piwiha wiwa Jisaasihoai jihaati namunjenihopo owetise.

**Jisaasiho Sawahopi Kiraisiho Diyaamahore
nda Nunjesitihandapihaare
(Matiyuho 22:41-46; Rukiho 20:41-44)**

³⁵Jisaasiho Autaahaatihomi Anji Awaindihandaatīhi nandaati katihi gotitipihiroti usaanjaipataini bitonda piwiha ausaati kataunjataati isihiyai saundati nunjenataise. “Isihiya winihapipa katiwunjohiyihiya Kiraisihopi Daawitihomi mwaahoe tiwi napaapi katopo? ³⁶Autaahaatihomi Itipihō neti Daawitihōai giwunyaasīhi ami Daawitihohi sawaho satise:

‘Awaisiho Autaahaatiho nisi Awaisihoai saundise, “Kinyi nisi ikwiri gaahirailhoanaṅi bime. Bimaami numbwi nini kinyi tiworisaisi neti kinyi asimwaatitihemasanihi kinyi kiyai nepi ipihatisamihuraatitāndo,” *Aunihihiri 110:1*

undati Autaahaatiho Awaisiho nisi Awaisihoai kaundise,’ tati kandaase.

³⁷Daawitihohi sawaho koaisi nisi Awaisihōne undati ambihundataase. Isi Kiraisiho naasikura napitiyati Daawitihomi awaisihotati mwaahotitaise?” undataase. Undihi isihiya taahiyihiya komi piwiha saapi asakaiwi maaritiwi atiwisawaayopo.

**Kima Piwima Jisaasiho Isihiya Winihapipa Katiwunjohiyihiyaami
Kiyohiwaiwaapi Kaundindihandapihaare
(Matiyuho 23:1-36; Rukiho 11:37-54, 20:45-47)**

³⁸Jisaasiho isihiyai piwiha kataunjataati satati kaundataase. “Isihiya winihapipa katiwunjohiyihiyaami kiyohiwaiwaapi sahi baiwi jaawo. Kiya saiwihiye. Isihiya nyapi awaisawihye nyatito tiwi apotihiri gaahapa utaarihapa niyosi daitaapo. Aiwi ami kiya isihiya ahoyaniwi nuwi napiwaiwi kahapaamapipa nunyawī nehohipipihī isihiya nyangi nyainjapi ipihirete nyatito tiwi apipaahi maaritiwimapihiyaare.

³⁹Aiwi ami aṅaṅi gwiharaahaṅi isihiya ahoyaniwi Autaahaatihopi gwinyaapi gaapundohipipihī (sinekokihandaatīhi) mitaahoahapaahaiwi isihiyaami ndiheti awaisawihyaaniso tiwi bimaawihyaare. Aiwi wapa usipipaapi ahoyaniwi nandapa awaimbipa tihauhahapihī noaipawaahura awaisawihyaanisi nyangisi awaisawihyaisawi nepi ahinyisawosawi nandapa nyangi maasi jīhi nanyamito tiwi gwinyaapihiyaare. ⁴⁰Aiwi

ami kiya asihya osinihiyai jaiwundiwi kiyaami aŋititih wapa ahusotimbipa ikowiniwi nusepihiyaare. Aiwi ami kiya kiyaami ikopa maipihaiwaami tiwathiapatapi isihya kiyaapi gaahya ainahiyihiye tito tiwi Autaahaatihopi gaapipa utaarihaiwa aipi pihitiwi gaapundiwihiye. Isi kiya saiwi kiyohiwaiwaapi ipotihura Autaahaatiho kiyai naaŋati yaawihandi usai nusatipihahandi apipaahi awaindahandi numwitaise,” undataase.

**Kima Piwima Apopaati Waati Nawihohi Kahapaamapipa Taahipipa
Owehaati Autaahaatihopi Maaritahi Autaahaatihoai Gaarehandi
Numwindihandapihaare
(Rukiho 21:1-4)**

⁴¹ Aihohi Jisaasihohi niyati Autaahaatihohi Aŋi Awaindihandaatihohi nandaataise. Nandaatihohi bokisihandi nawihohi gaarehandapihohi wihohitihandamihohi deti bindataise. Bindata iwinjatihohi isihohi taahiyihohi nawihohi ikipipa asaketahiyohi kandi nawihohi wihohitihandopihohi nawihohi wiwawaayopohi. Nawihohi asaketahiyohi ami waatihohi awasihohi taahihohi kandopihohi wiwawaayopohi. ⁴² Aihohi apopaatihohi waatihohi warihohi aimihohi napomasihohi osihaamaatihohi kahapaamapipa nawihohi taahipipa owehaatihohi nasataise. Nasatihohi nawihohi nehohi jisihasurehohi yasurihohi kandopihohi iwiwataise. ⁴³ Aihohi Jisaasihohi kaatihohi osihaamaatihohi iwinjatosatihohi komihohi otipipatihohiyaihohi gaata numwaatihohi detematosatihohi kiyaihohi sata kaundataise. “Nini akitinihohi sangihohi sandihohi kasatitaatohi Kimaatihohi osinimaatihohi warihohi owemaatihohi kaatamihohi nawihohi timasihohi isihohi nahatihohi kimiyamihohi nawihohi awasihohi kimandihohi Aŋi Awaindimandamihohi nawihohi wihohitihandopihohi wihohihohi nusatipihahatihohi apipaahihohi awasihohi iwiwataise. ⁴⁴ Iyataatihohi kimiyohi isihohi nahatihohi nawihohi asaketahiyahohi nahatohi nga kiyatihohi niyatihohi nehohi yandihohi isohohi timawaayopohi. O kimaatihohi osinimaatihohi nawihohi apipaahihohi nenoahatihohi owetihahatihohi kaatihohi kaatamihohi nawihohi kora nandapahohi nunyatihohi netihohi nandandihohi nahatohi konihohi timataise. Isihohi kaatihohi nandapaapihohi nunyatihohi netihohi nandandihohi apipaahihohi owendataise,” undatihohi Jisaasihohi komihohi otipipatihohiyaihohi kaundataise.

**Kima Piwima Jisaasihohi Aŋi Awaindihandihohi
Nosasindahohi Tatihohi Katindihandapihaare
(Matiyuhohi 24:1-2; Rukiho 21:5-6)**

13 ¹ Jisaasihohi Aŋi Awaindihandihohi namasihohi notataise. Namasihohi kohohi taatihohi nahihohi komihohi otipipatihohi wohohi Jisaasihohi saundataise. “Katipinyasingihonyehohi, aŋaŋaŋi kimaiwahohi apipaahihohi gaahihohi sanahihohi. Iyatihohi ami nawihohi kimaiwahohi apipaahihohi aungwohahihohi aŋimatiwihapanyahohi,” undataise. ² Aihohi Jisaasihohimihohi wihohi aŋaŋihohi kohohi saundataise. “Kinyihohi kimaiwahohi animaiwahohi usonapaapinhohi? O

saiwa ipotihura nawaamaiwa tiwati nyepinati ahotiwimaiwa siyati windi ahimotitaise. Owetitaise. Isihiya nepi natipi nopisasiwi nepi nepuhwitaapo. Nepuhwisaihi nahomanindiwa mihaapi yatihhi yapipateti timihaitaise,” undataase.

Kima Piwima Jisaasiho Naaŋihaiwa Pihitahi
Noaipaitaise Tati Katindihandapihaare
(Matiyuho 24:3-14; Rukiho 21:7-19)

³Jisaasiho niyati nasaamanati Anji Awaindihandi wihini ahetihi Sisiho Oripihoasini bindataise. Aihhi komi otipipatihya nehi wingwaasihhi koapihhi nasawaayopo. Kingwaasami ambipati Pitaahotihi Jemisihotihhi Jonihotihi Endiruhotihi siya nehi sawanaahihhi napiwi Jisaasihoai satiwi nunjenawaayopo. ⁴“Kinyi Anji Awaindihandi neti nopisasindaise tipi kanyatingitihandi maahiwura noaipaitaise? Iyataati jihhi siwipati wapa napitiyahapa noaipahonihhi sandi kinyi katindihandi aimi koaipaitande taati nyahi gwinyaitihaawe?” undiwi nunjenawaayopo.

⁵Saundauhi Jisaasiho namasati kiyai wihooaŋiha sata kaundataase. “Sahi baiwi jaawo. Isihiya usa sangisi jaipisatitaawo. ⁶Isihiya taahiyihhiya napiwi nisi ambipati ambihitiwi nini Mesaiyaahonini kimikonine satiwi isihhiyaati taahiyihhiyaatangi jaipisatisaihi ami sahi wiwa kiyaaami jaipipa atiwihhi kiyaaapi giwunyaitaawi jaawo.

⁷“Iyataati pwisipati aungwohaiwa detuni kaanihuni noaipahonihhi piwiha sahi atisawaawi kaiwaapi yayiwi ami sami maariho owemaasetane. Ami Saiwaahi titihhi noaipahonihhi sahi asisiha aimi detitihhe titaawi saiwaahi kiyati jihhi noaipaitaise. Jihhi noaipataahandi kandi asisiha ipotihha sangititaise. ⁸Isihiya yapipati witaahapihhiya dosisi ami isihhiya usa yapipati witaahapihhiyaisawi tundaapo. Aisaihi ami awaisiho kiŋihho womihhiya dosisi awaisiho kiŋihho yapipati witaahapihomihhiyaisawi tundaapo. Iyonihhi ami ipipatihhi nahataapihhi ipipatihindaise. Iyonihhi ami wapihi wapihi jariho noaipahonihhi isihhiya nandapa nandaatiwihapa owetitaise. Saiwa apopaati maaha namwitandi timendaati jihhi wuwani namasati kihurakihura goti yausami noti aimi detitihhi suraanihi kaatami ambipati aungwohandi yaawindihandamatiyati jihhapihapa namasati noaipaitaise.

⁹“Isi ami sangisangi baiwi jaawo. Sangi isihhiya jaipi nepi wisairapi nasamaasi nuwi piwiha piwaatitaatiwihapihhisamaitaapo. Aiwihhi ami anji gwiharaahaiwa ahoyaniwi ami Autaahaatihopihhi gwinyaapi gaapundohiwaiwa sinekokihaiwaapihi tisawitaapo. Aiwihhi kiyahhi sahi nisapi ginunyaahotihandapi nisapisatiwi sangisi nasamaasi nuwi awaisawihhiyaami ndiheti ahisitaapo. Ndhietihhi ahisisaihi sahi nisi piwiha ausaapi kaunditaapo. ¹⁰Nisihhi piwiha gaaha waniha akaaha yapipati aunahipati nahatewaara gaamapi nuwi isihhiyihhi kiyahhi

baiwi atitaatiwi ausaapi kaundisaihura asisiha ipotihaanihi sura noaipaitando. ¹¹ Iyataati sangisi jaipi nepi wisairapi nasamaasi piwiha piwaatitaatiwihapihi naisaihi sahi piwiha napititaati kaunditihawe tiwi yaiwi pihitiwi waati gimunyaapise. Owe. Autaahaatiho keti kuraanihi sahi piwiha katitaatiwiha nasamitaise. Nasamitaisi sahi baiwi piwiha ausaapise. Iyataati sa piwa sahi nehi sawanaati windi amusaitaapo. Owetitaise. Autaahaatihomi Itipiho samihetapi piwiha sahi katitaatiwiha ausaitaise. ¹² Usa saingo sahoayi numwaapi isihiya usai numwisaihi kiya tiwitaapo. Iyonihimi ami sapiho komi mwaahoai naasikati kiyati isihiyaami ikwiraatihimahonihi kiya koai tiwitaapo. Iyonihimi ami mwaaya matiya dopawi maatimaatiwi saniya sapiyai isihiyaami ikwiraatihimasaihi kiya tiwitaapo. ¹³ Iyataati isihiya sapi apipaahi apowitaise. Sandi nisapi kiyaisi poundonihi kiya sangisi pohipisitaapo. Isi utaaho wo saiwa siya noaipahonihandi kandi anditita kaiwaisi ipihatisamati asisiha ipotihaapi jaati bimisihoai Autaahaatiho numwati asitimatitandihandi numwitaise.

Kima Piwima Jisaasiho Apipaahi Maipihandi
Windi Noaipaitaise Tindihandapihaare
(Matiyuhu 24:15-28; Rukiho 21:20-24)

¹⁴ “Sahi utaaho woai iwinjaitaapo ko Autaahaatihomi Anji Awaindihandaatihi nehi Autaahaatihopaahihi gaarehandi tihohitihandi aritaahandi ahetimbipihimi apipaahi maipihapa kapihi ahimotihapihimi gonihiyati wanihandi ko nesi nandaati maipiyausoasa neti nopisasoniho. Iyonihimi isihiya ese tiwi yaiwi kiyaami ambipati mwituniwi usondaapo. (Utaaho piwiha kima awindaaho biyati gwinyaane). Isi sura isihiya Judiyaahanda bimohiyihiya kiyaami Autaahaatihomi Anji Awaindihandaatihi utaaho apipaahi maipihandi yawimatahandi kiyonihimi kima asisiha ipotihe tiwi mmoniwiwimapi yanihimapi sisihoasinapi naiwise. ¹⁵ Iyataati isihiya sura kiyaami anjitaupwataatihi^t masapipihimi bimambiwihiya anjitihi kiyaamihapa isisi nutaatiwihapa naitaatiwihandapi windi gimunyaitaapo. Aiwi kiyaamapa naitaatiwi anjitihi windi namindaapi yanihimaitaapo. ¹⁶ Iyonihimi ami isihiya osaataati bitombiwihiya japihi nepemaitiwi nuwi kiyaamihapa uti apotihiri kiyaami anjipihimi naitaatiwi windi namuwise yanihimapise. ¹⁷ Aisaihi sura asihya maaha sangihaisahiyauni ami maahaapi gwisihyauni keti sura yanihimapi namaisaihi yaawihandi naitauhi, “Ese”, ningi kiyaapi maariho tindataise. ¹⁸ Saiwa siyati wipati wipiwati boahonihura sangisaapihi namwaipaitandi sahi Autaahaatihopi baiwi

^t 13:15 Judaahiya kiyaami anjihaiwaami anjitaupwati nimaayawi anjimatawaayopo. Anjitaupwataatihi wapa nandapa ami ipatami yandipihopi ipiyawaayopo. Aiwi yatihihura mbipa nepi kasini nanopi ami gaapundawaayopo.

gaapundiwise. ¹⁹Ami sandi apaapimaato sura naanjihandi apipaahi awaindihandi noaipaitaihto. Jihura Autaahaatiho kahapaamapipa kiyati ahaisuraapi nasati wani kimura siyahaiwa windi namwaipase. Iyataati ami ipotisangi windi siyahaiwa naanjihaiwa apipaahi awaiwaiwa windi namwaipaitaise. ²⁰Isi Awaisiho Autaahaatiho asisiha sa naanjihaiwa apipaahi awaiwaiwa noaipaitandi neti nuhimaitandi aimi gwinyaase. O ami ko windi siyati asisiha sa neti nuhimaamahonaahi isihiya windi nga bimimaawi nahandi kiyaanihi owetitauhe. Saitihati kati ami Autaahaatiho isihiya komihiyaimatitaatiwi aimi namihanati ahiwisawihyaapimatonih i gwinyaataati kiyai neti iwitatamanitandi namati asisiha neti nuhimaitaise.

²¹“Isi sura isihiya usa napiwi nisapi satiwi, ‘Kiraisiho komi isihiyai japihi numwaitandi Autaahaatiho namihainjiho kimbih i kimosi jase ami yaihapih i yaihosi jase ami mihapih i mihosi jase,’ satisaihi ami sahi kiyaami piwiha atiwi windi gimaawunyaapise. ²²Iyonih i ami isihiya usa taahiyih iya napiwi sang i jaiwisatiwi sasatitaapo. ‘Nini kimonini Kiraisihonini Autaahaatiho komi isihiyai japihi numwaitandi nanimihainjihonine,’ satitaapo. Aiwi ami usa taahiyih iya neh i ninaasoh i wura wura napiwi satiwi, ‘Nini Autaahaatihomi piwiha atindi neti kopi awusaahohihonine,’ satiwi jaipisatitaapo. Aiwi ami kiya watipihaiwa kihaiwa kihaiwa kahatamatipetahaiwa kaitaapo. Satiwi saiwa kiyawaahandi kandi Autaahaatiho isihiya komihiyaimatitaatiwi namihanati ahiwisawihiyai maawi jaipundiwi numwaitaatiwaitaapo. ²³Siyahaiwa noaipaitaihi ami kaiwa sang i noaipasih i nini piwiha jih i timaniti aimi kasatataatoni sahi baiwi jaawo.

Jisaasiho Isihyaami Saahonini Jihonini Napitotindihandapihaare
(*Matiyuh o 24:29-31; Rukiho 21:25-28*)

²⁴“Saiwa siyati naanjihaiwa noaipati owetanihura sura.

‘Ipiho noaipati asahatitaise.

Iyonih i ami waatihoaisangi windi namusaatitaise.

²⁵Iyonih i ami kaumbwaati yamihapataatihapi timihaitaise.

Iyonih i ami yamihapataatih i watipihaiwa ahotiwaiwa ahoainati nasihaahaarindaise.’

Aisaiyaaho 13:10, 34:4; Isikierih o 32:7; Joerih o 2:10, 31, 3:15

²⁶Iyonih i sura Nini Isihyaami Saahonini Jihonini nisi watipihandisa ami nisi yundanyaahaisati watipihonini tiwipataatih i napisanih i isihya ninjaitaapo. ²⁷Saindi sura nini nisi enjerih iya otipipatih iya yamihapataatihapihiyai nandusaasito. Nandusoasisanih i kiya nuwi nisi isihya nisihiyaimatitaatiwi namihanohiyihiyai nahataapipih i yapipatamuni ami yamihapataatihapuni mangiraini numwaapi nepi ahonitaapo.

**Kima Piwima Jisaasiho Komi Napitandihuraapi Awaatipihoti
Yatitandihura Wapa Noaipasipipaapi Namihana Katindihandapihaare
(Matiyuho 24:32-35; Rukiho 21:29-33)**

²⁸“Awaatipihoti kaindihandapi aimi mmowi nepi gwinyaapihyaate. Awaatipihoti kupwirati tiwihandiwihi sahi mmonawaawi kimura yatihiri yatitandihuraare tiwihyaate. ²⁹Sahi saiwi aimi mmowihyaatisi naanjhaiwa siyahaiwa noaipahonihi mmonawaawi sahi nisapi satiwi, ‘Ko napitandihura aimi detindaate,’ tiwi gwinyaapise. ³⁰Nini akitinihi sangi sandi kasatataato. Isihiya kimuraahiya sangi napopi bimisaihi saiwa naanjimaiwa nini katohiwimaiwa noaipaitaise. ³¹Yamihapatuni ami yapipatuni noti owetitaise. O nisi piwihaahi windi owemetitaise. Owemetati, Kaahi kaanihi ahotimi nutaise.

**Kima Piwima Jisaasiho Satati Saiwa Noaipaitandiha Asisihaapi Utaaho
Wo windi Gimunyaati Windi Mose Tati Katindihandapihaare
(Matiyuho 24:36-44)**

³²“Iyataahandi kandi Nini Isihiyaami Saahonini napitandihuraapi utaaho wo asisiha sete ami ipihomi ndihaami siwipati suraare tati windi gimunyaati windi mose. Owe. Autaahaatihomi enjerihiya itipihya otipipatihya yamihapataatihapihiyihiyaisangi windi mohopo. Owe. Aihi ami Nini Isihiyaami Saahonini Jihoninisangi windi moho. Owe. Nehi Apiho Autaahaatiho sawahohihi asisiha ami ipihomi ndihaami siwipati seti suraare tati mmonati gwinyaati isiwatitaise.

³³“Isi sahi baiwi jaawo. Sahi baiwi timaniniwi jatiwise ami sahi asisiha akaaha titihi ahura noaipaitaise tiwi windi mopihyaatiso. ³⁴Sandi siyahande. Utaaho wo komi anjipihini namasi kaanihi wapihapi daitandi nutandi komi otipipatihiyai nisihapa kimba baiwi ninjaawi bimaawise undindihandamatiyahande. Iyati komi otipipati otipipatihya kiho kiho jatitandihati yiyandihini nunyataise. Iyati maasomwaanji jatitandihoi, ‘Kinyi baimbi namopi konihini jatime,’ undindihandamatiyahande. ³⁵Isi siyahandisi sahi baiwi jatiwise, anjanami satiho napitandihandapi sahi windi moniwihyaatiso. Iyati komi napitandihura asisiha taati napandosuraatitaindiho ami apatihini apwitetititaindiho ami asisiha wa taati bowataati sangi saasinihonihititaindiho ami ipiho taati yahutaahonihititaindiho. ³⁶Sahi nasisoaari kiyatinihi timetiwise. Ami wiwa ko keti kuraanihi nasati sahi nanihaiwi nanopotisaihi jasondaiso. ³⁷Piwiha kima nini sangi timetiwise satiti kasatohima naasika isihiya nahatiyai sahi jaawi timetiwise undataato,” undati Jisaasiho komi otipipatihiyai kaundataase.

**Kima Piwima Jisaasihoai Aŋi Awaindihandami Mitihiya
Tiwitaatiwi Piwiha Katohitihandapihaare**
(*Matiyuho 26:1-5; Rukiho 22:1-2; Joniho 11:45-53*)

14 ¹Asisiha yatairi ahondaise ami Asisiha awaisiha Pasopaahanduni ami kimbapiho nandapa biretihandi nipitandihandi yisihandi owehandi nandaatiwiha noaipaitando.^u Sandi jihura asisiha weti Autaahaatihomi enjeriho otipipatiho yamihapataatihi bimisihohi jitiapati anjaanami maasomwaanji jaahohipati mmonataati Isiraherihyaami manyinya bwandipihya jihiyai timaawati nehi nusatipasitihandapi gwinyaapi mmoniwihare. Sa asisa noaipasihura kiya nandapa biretihandi nipitandihandi yisihandi owehauni maasapiho sipisipihanduni nanawaayopo. Aiwihaasi ka asisiha noaipaitandi nehi asisiha yatairi ahotihi pirisihya awaisawihyauni^v ami winihapipa katiwunjohiyihyauni ahoyaniwi piwiha kanawaayopo. Aiwi kiya Jisaasihoai daihira wiraapi nanihundiwi jaiwaiwihiretapi isiwatawaawi sohoai tiwitaatiwi kanawaatopo. ²Aiwi ami kiya sanawaatopo: “Nyahi asisiha awaisiha Pasopaahandeti sandi isihyaami ndiheti windi kamaitihaawo, ami kiya wiwa maatimaatiwi pwisipati noaipaitaiso. Isi gaasi namihaitihaawo,” niwi kanawaatopo.

**Kima Piwima Apopaati Waati Atipati Waamainjotahati Gaahati
Jisaasihomi Mitihatihi Niwindihandapihaare**
(*Matiyuho 26:6-13; Joniho 12:1-8*)

³Jisaasiho aunahipa Betanihanda niyati utaaho wo jiji asaaha pisapipa neho komi ambipati Saimonihomi anjipipihini nandaati bindataise. Bindata ganihoaasini taati nandapa nainjihini apopaati waati oniha wa atipati apipaahi waamainjotahati windaha nesi nasataise. Atipati sati nawihohi awaindihandisahate. Oniha atipati windisiha nupwi napuwitihandi owehaasi namati nehi awiha napuhohininapi maipihinjaapihapi tiwitasati Jisaasihomi mitihatihi niwisataise. ⁴Aihi kapihi isihya usa bimohiyihya kaati siya niwihini kiya mmonawaawi mimaipaiwi gwinyapenawaayopo. Kiya saiwi mimaipaiwi gwinyapeniwi satiwi kanawaatopo. “Ese kimaati apomaati atipati kimati apipaahi nga waamainjotati gaamati napaapi nyahowati nuhoaase? ⁵O sati atipiti isihya usai nawihopi nunyaati nawihohi

^u 14:1 Pasopaahandi sandi Judaahiyaami asisiha sa kimbapiho awaisihaare. Aihi kiya sandi Pasopaahandi kinaungwiha nahateweti nehi naasaraahi mmoniwihyaare.

^v 14:1 Siya pirisihya isihyaapi kiyaami aunahipati nepi kohasipihohi nandapa tihihohi Autaahaatihohi waamaindumwapi dipumaniwi nunyohiyihyaami mitihya jihiyaaare.

ikihi murimo” nga naito. Nawaati isihiya ikipipa owehiyai nga numwito,” nnawaatopo. ⁶Sanihauhi Jisaasiho kiyai saundataase. “Sahi kimaati apomaati munyaipundiwi itihimundiwi bipi namihaapise. Sahi saiwa napaapundopo. Kaati maipihati kiyataamaise. Owe. Ningsi apipaahi gaahati kanisataise. ⁷Nahateweti isihiya ikipipa owehiya sangisawi maasi nasisoaari bimitaapo. Isi sahi kiyai wura wura iwitatamanitaapo. O ami ninihi sangisati maasi nahateweti windi bimimito. ⁸Apopaati kimaati wapa nga kaati kaitandihapa aima kiyataise. Kimaati atipati waamainjotihati nisi ambipateti nanuhoasitimandi nini animwaahipatopi yamwaatitandihandapi nisi ambipati neti apipaahi nimanati kanisataise. ⁹Nini sangi akitinihi kasatataato. Yapihi nahatewara isihiya Autaahaatihomi piwiha gaaha waniha ausaawaawi kimaati apomaatami kimandi gaamandi kaimandimandapi piwihaatihohoyawi ausaapi katitaapo. Ausaapi katisaihi isihiya kaatapi giwunyapendaapo,” undati Jisaasiho kiyai kaundataase.

**Kima Piwiha Judaasiho Noaipati Jisaasihomi
Tiworihomainjitihandapihaare
(Matiyuhu 26:14-16; Rukiho 22:3-6)**

¹⁰Aihi sura Jisaasihomi otipipatihaya ikwimaandimwitihia auhirami yahuritisawihaya aposerihyaami wo komi ambipati Judaasiho aunahipa Kariyotihandaahapiho tiworisai nusepaati mwitipiwitandi notaise. Noti pisisihya mitihya jihya (isihiya isihyaapi nandapa kohasipihohoi tihwi Autaahaatihohoi dipumaniwi nunyohiyihyaami) awaisawihiyai Jisaasihohoi kiyaami ikwiraatihimahonihi kiya tiwitaatiwi mwitipiwisati nusepaataise. Nusepaati, “Nini koai saindi sami ikwiraatihimati nasamito,” undataase. ¹¹Satati ko mwitipiwisati kaundihi kiya pisisihya atisawaawi gaaso tiwi waati maaritawaapo. Aiwi kiya Judaasihohoi nawihohoi wo numwitaatiwi watipitiwi katawaatopo. Aihi Judaasiho Jisaasihohoi kiyaami ikwiraatihimaitandihira daihiraapuni asisiha titihohoi gaaheti numwitandihapuni gwinyaati jatata timanataise.

**Kima Piwima Jisaasiho Komi Otipipatihayaisati Asisiha Awaisiha
Kimbapiho Pasopaahandeti Nandapa Ipotihapa Nainjitihandapihaare
(Matiyuhu 26:17-25; Rukiho 22:7-14, 22:21-23; Joniho 13:21-30)**

¹²Nandapa biritihandi nipitandihandi owehapa sipisipihohoi tipihohoi tihiwi gaarehandi Autaahaatihohoi nunyawihohoi komi gwititihohoisawihohoi

^w **14:5** Nawihohoi ikihi murimo so jihohoi suraahiya nawihohoi otipipati kiyohiyihya kinaungwiha naasaapi nehohoi.

nandaatiwihaiwaami asisiha jihapiha noaipataise. Iyataati asisiha sa awaisiha kimbapiho Pasopaahandami jiha noaipataise.^x Aihi kura asisiha keti Jisaasihomi otipipatihya Jisaasihoai satiwi nunjenawaapo. “Pasopaahandapi Sipisipihomi gwititiho nandapa biretihandi nandaapihapa nyahi newa maahapihi tahaati tingimanitihawawi gwinyaapaise,” undiwi nunjenawaayopo. ¹³ Aihi Jisaasiho komi otipipatihuri yahuri kapa Pasopaahandapi sipisipihomi tipi gwititiho biretihandi nandapa nandaatiwihapa nepi tihimi timanitaatimi piwiha sata kaundati natausaasataise. Iyati ko kuri saundataase, “Sahuraahi aunahipata awaipati sitihanda numwise. Numwi noaipasaihi utaaho wo onihaara waapoho niwatesiho daihira taati niyonihisihoahi koaisami nutandaise. Nutaniwi ko nasitipa jihi niyonihisihoahi ami sahuraahi koai niwipinjai ipoti numwise. ¹⁴ Ko noti anjhandi windaatihi nandaitaise. Ko anjindi nandaasitindami satihoai satimi nunjepi kaundimise. ‘Nyangi katanyasisiho sanyatihe. Asisiha kima awaisimeti nini nisi otipipatihyaisati nandapa biretihandi sipisipihomi gwititiho Pasopaahandapi nandapa Autaahaatiho Isiraherihiyai Nehi Iwinjasihi Nga Bimohitihandapi Gwinyaawaati nandandihapihi anjipihisi maahipihisi? Nyatihe,’ undimise. ¹⁵ Satimi kaundisaihi ko anjhandami satiho autaahi wiri awairihiroti kahapaamapipa ganiho gwitihomi aimi timaninda ahotahiroti neti nasisitaise. Nasisonihisi kiroti nyahi Pasopaahandapi nandapa nandihahapa nepi nyamanimise,” undati kuri natausaasataise. ¹⁶ Aihi kuri komi otipipatihuri atimi nomaise. Numwi aunahipati awaipati Jerusaremihandi noaipapi Jisaasiho kaundimumwaanji kamwaanji kaiwa titihisi noaipasihisi mmonimi kiyamaise. Aimi asisiha Pasopaahandeti nandapa Jisaasihoaisawi kiya nandaatiwihapa nepi timanamaise.

¹⁷ Aihi asahataahura aimi napwihisi asihananaataatihi Jisaasiho komi otipipatihya 12 kaiwihiyaisati niyati sapihi anjipihisi nandaataise. ¹⁸ Aihi kiya ganihomihini nausaniwi yaataati bindawaawi nandapa taawi nanawaawi Jisaasiho komi otipipatihyaisati saundataase. “Nini akitinihi sangisi sandi kasatataato. Sahi kimiyaatami otihatihapi wo nisi tiworihonjimatihi ningisi isihya niwitaatiwihya tiworisaami ikwiraatihinimaitaise. Wani kimbisi ganimoasini nandapa maasi ningisati maasi supwihandi waapohoaatihi biretihandi timandaati nainjimopito,” undataase. ¹⁹ Aihi komi otipipatihya piwiha sa atisawaawi maariho naanawisataise. Naanawihisi

^x 14:12 Asisa seti Judaahiya gaarehandi (Autaahaatihoai) nunyawisi nandaatiwi sipisipihandi tipihyaare. Sandi sipisipihandi tiwotimandi jihi aimehura Isiraherihyaami manyinya jihya bwandipihiyai Autaahaatihomi enjeriho otipipatihomi yamihapataatihi bimisiho timaawati kiyai nehi nusatipati Isipihyaami manyinya usihya bwandipihiyai tiwindihandapi gwinyaapi bindawaawi biretihandi nipitandihandi yisihandi owehandisawi tihwi nandaatiwi so sipisipihomi tiwawaapo.

namasawi ninaasohi saundiwi, “Akitinihi nini nisapino,” undiwi Jisaasihoai nunjenawaapo. ²⁰ Aihi Jisaasihomiha kiyai saundataase. “Usaapimaato owe. Sahi kimiyaati 12 kaiwimiyaatami woni ningisapi maasi nandapa biretihandi waapoho supwihandi disihandaatihi nimandisihoaatihi timandaati nainjimopito. ²¹ Ye, kimandi ningi nanoaipaitandaindimandihiki akiti titihe. Autaahaatiho komi piwihaatihapi nisapi napwitaise tati katimumwaanji kamwaanji Nini Isihiyaami Saahonini Jihonini japepihiriti napwito. Iyataahandi kandi kimo utamo isihiya niwitaatiwihiyaami ikwiraatihinimaitandaisimoai yaawati apipaahi awaindihandi Autaahaatiho numwitaise. Isi ami koaisi sanaati namaamotaataahi ngaaitaihe. Koai sanaati napaapi namotaihihotindiho?” undati kiyaisi kaundataase.

**Kaatiha Biretihanduni Waapoho Wainihanduni Jisaasiho Komi
Otipipatihiyai Numwindihandapihaare**

(Matiyuhu 26:26-30; Rukiho 22:14-23; 1 Korindihiya 11:23-25)

²² Saiwi kiya taawi nandapa naniwi bindawaawi Jisaasiho nandapa biretihandi windi netaise. Neti isiwatataati Autaahaatihoai, “kinyi gaahone gaare,” undati gaapundataise. Gaapundati naumboti komi otipipatihiyai nunyataise. Nunyataati saundataase. “Kimati nisi ambipatisi sahi nepise,” undataase. ²³ Iyatosati ami wipati kapihopi waapoho wainihandi neti gaapundati Autaahaatihoai “kinyi gaahone gaare,” undatosati komi otipipatihiyai numwihi nepi nahatiya kapihombi nanawaayopo. ²⁴ Kiya aimi nanihauhi Jisaasiho kiyai saundataase. “Kimandi wainimandi kapimopi windindimandi nisi jitipate. Nini nisi jitipati kati nuhoaataayo. Nuhaahonihiki Autaahaatiho kati neti komi isihiyaisati kataahi piwiha katati wisasataise. Iyati ka piwiha wisasati ahaisiha wani kimura neti watipimati akaahe tati nisi jitipati nuhaamaitandiyohipataahi (Autaahaatiho) komi isihiyai neti sawihoaisati timaamahiwataise. Isi kimati nisi jitimati nuhaamaitandiyohimataahi isihiya titaahiyihiyai (kiyaami maipihaiwa nemwati) iwatatamanitaise. ²⁵ Nini akitinihi sangi sandi kasatataato. Wirihiri wainihandami waapomo kimo nini japihi windi namandi bimaami nundi Apihouni ninuni isihiyai iwinjaaha bindihaahuraahi wainihandi asitihandi yandipihomi waapoho asoho nando,” undataase.

²⁶ Sata kaunda owetihiki aunihihiri wiri katiwimapaahi Jerusaremihandana namasi Sisiho Oripihoaasinapi niyawaayopo.

**Kima Piwima Jisaasiho Pitaahoi Saundati Kinyi Ningi Nanoasapi
Windi Mausotihonine Tipi Katitaise Undindihandapihaare**

(Matiyuhu 26:31-35; Rukiho 22:31-34; Joniho 13:36-38)

²⁷ Naiwi noaipapi Sisiho Oripihoaasini Jisaasiho komi otipipatihiyai saundataase. “Sahi nahatiyaati ningi nanimasi yanihimaitaapo ami sandapi Autaahaatihomi piwihaatihisangi satati jipatipindiso:

‘Sipisipihandi jaati bitosihoi nini tiwisanihi sipisipihandi yanihimati kihira kihira nandairaitaise,’ tati aimi jipatihindiso ²⁸Isi nini napotati japihi nepasi nini jiji taati Garirihandaahapi naito,” undataase. ²⁹Aihi Pitaaho Jisaasihoi saundataase. “Nisaahoyaaahi gi nangimasi yanihimaisaihihandi kandi ninihi gi nangimasi yamaanihimaito. Owetitaise,” undataase. ³⁰Aihi Jisaasiho koai saundataase. “Nini akitinihi gisi sandi kahitataato, kinyi atinime. Wani kimura apimatihiti otipwisipaati sapiho yataira sangi gaatonihiti kinyi nisapi satipi, ‘Nini koai windi mausoti gimunyaatihonine,’ tipi mairimaara isihiyai kaunditaise,” undataase. ³¹Sata kaundihihandi kandi Pitaaho mwitetati watipitahi saundataase. “Nini gisati maasi napwitandi kinyapi windi mausotihonine mundito. Apipaahi akitinihi owetitaise,” undataase. Aihi ami otipatihiyai nahatiaisangi nehi naasika katawaatopo.

Kima Piwima Jisaasiho Getisemanihanda Gaapundindahandapihaare
(*Matiyuhu 26:36-46; Rukiho 22:39-46*)

³²Aihi kiya nuwi wapihi kapihami ambipati Getisemanihanda noaipawaayopo. Noaipapi Jisaasiho komi otipatihiyai saundataase. “Sahi kimbihiti bimaawise, nini yambihiti nundi gaapunditaano,” undataase. ³³Undati nehi Pitaahoaisuni Jemisihoaisuni Jonihoaisuni singwaasisaahihiti numwaasi naihi nowaayopo. Aihi komi ambipati nahato naagawisati maipiwimataho notaise. ³⁴Aihi kingwaasi saundataase, “Nini nisi maariho ambipati apipaahi awaindihandi naaganisati yaasati daahi nipatisati mimaipinimainjihiyiyo. Sanimainjihiti ami ningi apipaahi napwitaahinyihiyiyo. Isi sahi kimbihiti bindawa baiwi jatiwise,” undataase. ³⁵Saundamapi noti onihiti masiwonjaapihi yapipateti timahiyati ahondaati gaapundataase. Iyati siyati gaapundataase sa asisiha maipihiti ko yaawihandi naitandima ami gaatanaahi ka koai nehi nusatipati sanutando. ³⁶Iyati ko Autaahaatihopi satati gaapundataase. “Apa,^y nisi Apo. Apore nahatewa kinyi nga kaitaise. Isi Apore, ningisi yaasamaiwa kimaiwa waapoho ipiho yahoti ikonati maipihiti nanihohipatamataindi nini naitandiyohiwimaiwa nepinimapehitataato. Ami nehi kinyi maaritipi gwinyahingirihireti japepihire. Nini maarititipi gwinyaahohirihireti kinyi windi minjapepihirime. Owetane,” undati Sapihoai kaundati gaapundataase.

³⁷Siyati gaapundamapi Jisaasiho nasati mmonata komi otipatihingwaasi nanoposauhi Pitaahoai saundataase. “Saimonihone, ningisapi wonji maipihonji minjatipi napaapi nanihaimbi nanopotise? ³⁸Sangi nasisendandihaiwa sangisaapihi namwaipaitandi sahi baiwi jatawa andititihiti gaapundawise. Maarihohi Autaahaatihomi

^y 14:36 Metihonji konjami sapihoai ambihundirihireti ambipati kandaase.

gwinyaasirihireti kaitandi maaritihihandi kandi ambipatihi saiwa kaitandi windi anditiminje,” undataase.

³⁹Saundamapi japihi noti gaapipati jihi noti gaapundipati kati jihara gaapundataase. ⁴⁰Gaapundamapi komi otipipatihiyenda japihi nasataise. Nasati usonata kiyai naapipa apipaahi tiwamasihi nanomihauhi ahowimasihi nepapi piwiha kaunditiha owetihiki kiya Jisaasihoai wihoaariha windi kamundopo.

⁴¹Aihi Jisaasiho jihara niyati mairi manda gaapundataase. Gaapundamapi japihi nasati komi otipipatihingwaasi saundataase. “Saingwaasaati daahi ikiniwi nanopotawaayopo. Naapipa nga nanopi nepawaawaahi nutihaawi dopise. Nini Isihiyaami Saahonini Jihonihiki isihiyai maipihyaami ikwiraatihinimaitawihura wani kimuraare. ⁴²Isi saingwaasaati dopise nutihaawo. Iwinjasawise utaaho nisi tiworihiki ningi nanimaati isihiyami ikwiraatihinimaitandiho aimi kimo koaipataiso,” undataase.

**Judaasiho Jisaasihoai Isihiyai Maipihyaami
Ikwiraatihimasitihandapihaare**

(Matiyuhu 26:47-56; Rukiho 22:47-53; Joniho 18:3-12)

⁴³Jisaasiho satati taati kaundihi Jisaasihomi otipipatihya ikwimaindimwitihiki auhirami yahuritisawihyaami wo komi ambipati Judaasiho keti kuraanihi noaipataise. Ko Judaasihoaisawi isihiyai taahitihandi pwisipi yaipa irihiri gupwati namatanaati bainatihiri isindihi nasawaayopo. Siya saiwa isipi nasohiyimiya pirihihiya awaisawihya isihyaami maipihaiwaapi Autaahaatihoai nandapa maahoai pati kohasipihiki tihiki dipumanihohiyihyaami mitihyauni ami winihapipa katiwunjohiyihyauni ami gwinyaahiya usauni siyai nepi natiwusaasauhi napiwihyaare. ⁴⁴Iyataati utaaho Jisaasihoai neti isihyaami ikwiraatihimaitandiho piwiha wa sata isihiyai kaundamapihore. “Nini nundi utaaho woai naahipauma gerundisanaahi so Jisaasihosi ko naahipauma gerundohoi titihiki isipise. Isipi baiwi iwinjaawitopi numwaasi nutaatiwe,” undati kaundamapihore.

⁴⁵Isi ko keti noipati deti Jisaasihoapihi titihiki noti saundataase. “Katipinyasingihonye,” undati naahipauma gerundataase. ⁴⁶Aihi kiya sotihiso tiwi Jisaasihoai ikwira isipi wirawaayopo.

⁴⁷Aihi kapihi otihatihapi koai niwipinjohiyihya bitohohiyihyaami wo komi namatinaati bainatihiri napatati pirihihi isihyaami maipihaiwaapi Autaahaatihoai nandapa kohasipihiki tihiki dipumanihohiyihyaami mitihomi otipipatihoi amiteteti mitihoaatihi tiwito tati timasihiki ko nawisainjihiki komi atihiri oturamasihiki mihaapi yapipateti timahiyataise. ⁴⁸Aihi Jisaasiho kiyai sata kaundataase. “Sahi ningi nipi nanimaita nasohiyimiyaati pwisipi yaipa irihiri gupwati namatanaati bainatihiri isipi nasohitimandi utaaho wo maatimaatisa tunnati ikopaisahoai

nimbipupwi isiwitaatiwhandamataiwi sahi nasawaayopo. ⁴⁹Nini asisiha nahateweti Autaahaatihomi Anji Awaindihandaatihi sami ndiheti bindata piwiha kandisasonihi sahi windi kura ningisi maanipihyaatiso. Iyataahandi kandi Autaahaatihomi piwiha jipatipindirihiri kireti titihi noaipaitandi gaasi sikiyati noaipane,” undataase. ⁵⁰Aihi Jisaasihomi otipatihya nahatiya koai namapi usesi kihira kihira yanihimapi nandiwirawaayopo.

Kima Piwima Utaaho Wo Waimwaaho Yanihimasitihandapihaare

⁵¹Aihi utaaho wo waimwaaho apotihiri nehi naasairihi kihoepehiri niyoho Jisaasihoai niwipinjai maasi sura niyataise. Niwipinjai naihi isihya koai pinuwi namañdwi isiwawaapo. ⁵²Saiwi ko waimwaasoai piwuwi isiwauhihandi kandi komi apotihiri naasairihi niyosirihiri nesipandiwihiri kiri kiyai nesipaunyami somaahiho yanihimataise.

**Kima Piwima Jisaasihoai Awaisawihya Kaunjorihyaapihi
Tipitapaapi Usotihandapihaare**
(*Matiyuhu 26:57-68; Rukiho 22:54-55, 22:63-71; Joniho 18:13-14, 18:19-24*)

⁵³Saiwi isipi Jisaasihoai numwaasi pirisiho wo isihyaami maipihaiwaapi nandapa tihwi Autaahaatihoai dipumanihohiyihyaami mitiho awaisihomi anjipihih numwaasi nowaayopo. Numwaasi niyauhi pirisihiya isihyaami maipihaiwaapi Autaahaatihoai nandapa tihwi dipumanihohiyihyauni ami isihya usa gwinyaahyauni ami isihya usa winihapipa katiwunjohiyihyauni siya nahatiya kapihi ahoyaniwi bimauihapih Jisaasihoai numwaasi nuwi noaipawaayopo. ⁵⁴Aihi Jisaasihoai numwaasi niyauhi sura Pitaaho Jisaasihomi ipoti koai yandih kaanihi notaise. Noti pirisiho isihya isihyaami maipihaiwaapi maahoipati nandapa tihwi Autaahaatihoai dipumanihohiyihyaami mitihomi matambipoti nandaataise. Nandaati masapipih tingaatihaisahiyai bumasihi sisiha tihoaahauhi kiyaisati maasi bindata sisihaini tihwindataise.

⁵⁵Aihi isihya isihyaami maipihaiwaapi nandapa tihwi Autaahaatihoai dipumanihohiyihyauni ami usa Judaahyaami awaisawihya nahatiyauni isihya usaapi gaatawaayopo kiya napwi Jisaasihopi, “Ko siyahoe satahore,” titaatiwo. Sandi Jisaasiho windi maipihandi kiyonih atiw newaawaahi koai sohoai tiwitaatiwe. Saiwi kiyawaahandi kandi kaunjorihya nahatiya ko maipihandi kaindhendi windi mohopo. Owetise. ⁵⁶Isihya taahiyihya napwi piwiha kiha kiha yiyandih nesuwi katauhi kiyaami piwiha wa noaipati titih windi akaahaamimainje. Owetise. ⁵⁷Aihi ami isihya usa bitotawa piwiha wa jaipitiha nepi Jisaasihoai yawutaapi satiwi kaundawaatopo. ⁵⁸“Jisaasimo kimo satahore. ‘Autaahaatihomi Anji

Awaindihandi isihya ikwira animatotihandi nupwisasitima japihi asisiha mairimanya sanionih ipoti animatito. Isihyaami animatohimumwaanji windi anjimaamatito. Owe. Nehi kandi wamwaanji noaipa animatinditaise, 'tahoe,' taawaatopo. ⁵⁹ Ami piwiha saiwasangi isihya siya katowiwa noaipati windi akiti akaahaamimainje. Owetise.

⁶⁰ Aih i pirihi awaisiho Kaiyapaasiho isihyaami maipihaiwaapi nandapa tihwi Autaahaatihoai dipumanihohiyihyaami mitiho awaisawihya kaunjorihya nahatiyaami ndiheti doti bitonda Jisaasihoai sata nunjenataise. "Isimiya kimiya kinyapi piwima kimaiwa kahitohiwimaiwaapi kinyi wihoaanjiha kamunditaahimaasihaino? Kinyi kiya piwiha kinyihetemapi katohiwimaiwaapi wihoaanjiha kaunditaapihapa owetiso?" undati ko Jisaasihoai nunjenataise. ⁶¹ Siyati ko nunjesihandi kandi Jisaasihohi piwiha wihoaanjiha koai kamunda nehi apihimaata bitondaise. Aih awaisiho mitiho pirihi jahaati Jisaasihoai sata nunjenataise. "Kinyi Kiraisihonji^z Autaahaatiho nyahi apipaahi gaahoe taati mepi autahewaumwahohihomi Mwaahono e wojo?" unda nunjenataise. ⁶² Aih Jisaasiho komiha koai saundataase. "Ye, kimikonine. Nini Isihyaami Saahonini Jihonini Autaahaatiho nahatewaami Awaisiho Watipihomi ikwiri gaatihiraihoanji bindataati autahi mihoti yamihapataatihapi tiwipatisati taati napisanihi sahi ningi ninjaitaapo," undataase. ⁶³ Sata Jisaasiho kaundihi ko pirihi isihyaami maipihaiwaapi nandapa tihwi Autaahaatihoai dipumanihohiyihyaami mitiho sa piwa atisataati apowih komi apotihiri nipaatihiri napwiramatosati sandaase. "Isihya kimopi, 'ko siya siya kiyahoe katahoe,' tiwi katitaatiwihya usaapi jahaati gamaatihahaawo. Owe. ⁶⁴ Sahi sawanaati aimi Autaahaatihopi komi sisipitindihandi atihwi newaapo. Ami ko komi piwihaara nini Autaahaatihonine ndaasi sahi napitaiwi gwinyapenawaayopo?" undataase. Aih kiya satawaatopo. "So maipihandi kandaasi napone," tiwi katawaatopo.

⁶⁵ Aih isihya usa sapihi bitohohiyihya namasawi maahoaipuripwi ami apotihiri nepi ndimaahomwaanji namaasaposawi kiya saundawaatopo. "Autaahaatihomi piwiha atindi neti ausaatihonine tipihonji wani aho aho ningi niwataise tip i kanyate," undihwi nanipi maahipiwaihirawaayopo.

Kima Piwima Pitaaho Jisaasihopi Koai Nini Windi

Mausotihonine Tindihandapihaare

(Matiyuhu 26:69-75; Rukiho 22:56-62; Joniho 18:15-18, 25-27)

⁶⁶ Isihyaami maipihaiwaapi nandapa tihwi Autaahaatihoai dipumanihohiyihyaami pirihiyaami awaisiho mitiho pirihihomi

^z 14:61 Piwiha Ipiruhaara Mesaiyahoe tawaatopo. Sandami tanyaaha satiwi Komi Isihyai Japihi Numwaitandi Autaahaatiho Namihainjihore tawaatopo.

aŋaŋami masapipihi yatih Pitaaho bindataise. Bimihi ko piriŋsiho awaisiho mitihomi otipipatihaati waati nasataise. ⁶⁷Nasati Pitaahoai usonata ko taati sisihaini tihwimihi kaati biyati koai mwitipisa iwinjatataise. Iwinjatataati Pitaahoai saundataase. “Kinyo, gimaawi yapipati Garirihandaahapihonjisi ami aunahipati Nasaretihandaahapihoi nuwipinjohiyihyaami woŋe,” undataase. ⁶⁸Aihi ko Pitaaho kaati owe undati sata kaundataase. “Nini utaaho soaisati windi dahomaindihonine. Kinyi piwima kima kandingimaapi windi gimaanunyaatati ami windi ningi namaanesipainje,” undataase. Saundamapi ko Pitaaho matambipaami onepataapihi naihihura koho otipwisipaati sapiho waati gandaase. ⁶⁹Aihi apopaati kaati jihara Pitaahoai usonataati kapihi isihya bitohohiyihyai sata kaundataase. “Kimo utaamo isihya Jisaasihomihyaamihore,” undataase.

⁷⁰Sata kaundihihandi kandi Pitaaho owetati satati kaundataase “Nini Jisaasihoisati maasi windi apipaahi dahomaindihonine,” undataase. Aihi otihitihi kapihi isihya bitohoyihya Pitaahoai japihi saundawaatopo. “Akite, kinyi Jisaasihomihyaamihonje. Kinyi titihi Garirihandaahapihonje,” undawaatopo. ⁷¹Aihi Pitaaho watipita anditita sata kaundataase. “Utaaho so nini windi mausotihopi sahi katawaatopo. Isi nini titihi apipaahi akitinihi kandaatoni nini jaipindi katisanaahi Autaahaatiho nisi jaipindi katotihandapi yaasati naaŋihandi naninyane,” undataase. ⁷²Sata taati kaundihi keti kuraanihi otipwisipaati kasinihaati gandaase. Aihi Pitaaho Jisaasihomi piwiha jihi sata kaundisihaapi gwinyaataise. “Otipwisipaati yataira sangi gaatonih kinyi mairimaara nisapi koai windi mausotihonine unditaise,” undati Jisaasiho jihi kaundisihaapi gwinyapenataati namati waati gotaise.

Jisaasiho awaisiho Pairotihome Ndiheti Bitositihandapihaare
(*Matiyuhō 27:1-2, 27:11-14; Rukiho 23:1-5; Joniho 18:28-38*)

15 ¹Aihi isihya piriŋsihya isihyaami maipihaiwaapi nandapa tihwihi Autaahaatihoai dipumanihohiyihyaami awaisawihyaatihi ami isihya usa winihapipa katiwunjuhohiyihyaatihi ami isihya usa gwinyaahyaatihi ami isihya usa awaisawihya nahatiyaatihi asisihaatihi kohokoaisawi kapihi ahoyanawaayopo. Ahoyaniwi Jisaasihopi piwiha wa katiwi wisasawaayopo. Awi Jisaasihoai kiya wirihiri wiri watipihiri ipipatamatyahira wisasiwi numwaasi nuwi awaisiho gapinaaho Pairotihoapihimawaayopo. ²Aihi Pairotiho Jisaasihoai sata nunjenataise. “Kinyi Judaahiyai winjaapi bimingihonji awaisihonji kinjihonjo?” unda nunjenataise. Aihi Jisaasihomiha wihoaaŋiha koai saundataase. “Ye, saahi kinyi kiwaahonji katapaase,” undataase. ³Aihi piriŋsihya isihya isihyaami maipihaiwaapi nandapa tihwihi Autaahaatihoai dipumanihohiyihyaami awaisawihya piwiha kiha kiha

Jisaasihopi satahoe, siyahoe tiwi awaisiho Pairotihoai kaundawaatopo. ⁴Satiwi Pairotihoai kaundauhi Pairotiho ami jihara Jisaasihoi saunda nunjenataise. “Isimiya kimiya kinyi atinihi piwiha taahiwaiwa kihaiwa kihaiwa kinyapi katawaatowi kinyi kaapi wihoanjiha nyangi napaapi kamaanyatise?” undataase. ⁵Aihi Jisaasihoi wihoanjiha kiyai windi kamundihi awaisiho Pairotiho kandapi waati pihititi gwinyapenataise.

**Kima Piwima Jisaasihoi Tiwitaano Undauhi Pairotiho Gaasi Tipi
Nimaapise Undindihandapihaare.**

(Matiyuhu 27:15-26; Rukiho 23:13-25; Joniho 18:39–19:16)

⁶Kinaungwiha nahateweti asisiha sa awaisiha Pasopaahandi noaipasihura isihiya titihi kiyaisunyaapi utaaho wopi ambihitiwi utaaho soai nupusoase tiwi Gapinaaho Pairotihoai kaundauhaahi kiyaami ambihitiwi katotihoai titihi nuwausoasahore. ⁷Isi sura utaaho wo komi ambipati Barapaasiho napwitati bindataise. So Barapaasiso Romihandaahapihiyaami gamaniho Judaahiyai iwinjaati bimitandihandapi poundihi isihiya Judaahiya usaisi maatimaatiwi isihiya usa dopi tiwauhi tunnawaawi kiyaami usaisi ko tiwihi napwauhi kandapi koai nepi napuhauhore. ⁸Aihi isihiya taahiyihiya wirisandihandi napiwi Pairotihoai namasawi nunjenawaayopo. “Kinyi asisiha awaisiha kimiyaha noaipasihura napwitohiyihiyai nupusoasapihonjisi wani ami kati kaimbi nupusoase,” undiwi nunjenawaayopo. ⁹Aihi awaisiho Pairotiho kiyai sata nunjenataise. “Judaahiyaami awaisihoai bipi nehi nuta nini nandusaasano?” undati nunjenataise. ¹⁰Sandi sata kaundindimandi siyati usona gwinyaataate. Isihiya pirihiya isihiyaami maipihaiwaapi nandapa maahoapati tihwi Autaahaatihoai dipumanihohiyihiyaami awaisawihya nyangi isihiya nahatiya namaanyipinjawi Jisaasihoi niwipinjowo tiwi Jisaasihopi apowih, “Nyahi gamanihomi awaisawihyaanamihetimawaayowo,” tati gwinyaataate. ¹¹Kiyataahandi kandi pirihiyaami awaisawihya mitihiya aimi jhi timaniwi isihiyai saundiwi nusepaawaayopo. “Jisaasihopi wihoanjiho Barapaasihoi nupusoase undiwise,” undiwi awaisawihya nusepaipapi kaundawaatopo. ¹²Aihi Pairotiho japihi kiyai saundataase. “Kimo utaamopi Judaahiyaami awaisiho kiyai iwinja bimisihoe tohimoai nini napitiwitande?” undataase. ¹³Aihi kiya japihi waapihitiwi satawaatopo. “Ipi titihi atawihateti tipi nimaape,” tawaatopo. ¹⁴Aihi Pairotiho kiyai saundataase. “Napaape? Ko windi maipihandi kaiho niwipihanditowo?” undataase. Aihi kiya komiha nemapi jihaati waapihitiwi kaahaatiwi satawaatopo. “Jisaasihoi ipi titihi atawihateti tipi nimaape,” tawaatopo. ¹⁵Aihi Pairotiho kiyaami piwiha napaisaati bipi atiwisati isihiya wirisandihandi maaritorihireti Barapaasihoi nuwausoasahi ko kiyenda naihi ami Pairotiho katihi Jisaasihoi ainjihariwi yupawaayopo. Aiwi ipi titihi atawihateti tipi

tipimandaitaatiwi Pairotiho neti Romihiyaami pwisipi yaipa kaiwi tunniwi yahwinohiyihiyaami ikwiraatihimataise. Aihi kiya koai tipi tipimandaitaatiwi numwaasi nowaayopo.

**Kima Piwima Jisaasihoai Pwisipi Yaipa Kiyohiyihiya
Sisipundotihandapihaare**

(Matiyuhu 27:27-31; Joniho 19:2-3)

¹⁶ Aihi Jisaasihoai Romihiyaami pwisipi yaipa kaiwi tunniwi yahwinohiyihiya numwaasi utaaho wo awaisiho gapinaaho Pairotihome matambipoti niyawaayopo. Naiwi ami sasaahoya usa nahatiyai gaatiwi numwaawaayopo. ¹⁷ Gaatiwi numwaahauhi akoyaniwosawi apotihiri wiri nyanyipihiri awaisawihiya kinjihiya niyohohirihiri niwisowaayopo. Aiwi ami wirihiri wiri mwitooipati kaariha nangisawi ningopi tingaatiha kaiwi Jisaasihomi mitihoatihi niwipaawaayopo. ¹⁸ Saiwi niwipaaposawi kiya namasawi isihiya kinjihiya awaisawihiyai kawisohipatamataiwi sisipihundiwi kaiwunjawi saundawaatopo. “Judaahiyaami kinjiho awaisihoji iwinjaapi bimingihonye, ipihirete,” undawaatopo. ¹⁹ Saundiwi Romihiyaami pwisipi yaipa kiyohiyihiya taahiwaiwaara Jisaasihoai mitihoatihi irihira tiwawaayopo. Aiwi koai maahoaipuripwi kiyaami ipihomataiwi iwiwi ami isihiya awaisawihiyai ambipati awaipati nunyawai atotipiwesohirihireti kaiwi koai ambipati awaipati nunyawaahandamataiwi atotipiwesawunjawaayopo. ²⁰ Saiwi sisipihundimbiwi gaatihi apotihiri nyanyipihiri niwisohohirihiri nesipamapi komihiri japihi nepi niwisowaayopo. Niwisopi Pairotihome masaataati namasi Jerusaremihandami matambipaami ipaahaapi noaipapi tipi nimaitaatiwihapihapi numwaasi niyawaayopo.

Jisaasihoai Tipi Nimaahotihandapihaare

(Matiyuhu 27:32-44; Rukiho 23:26-43; Joniho 19:17-27)

²¹ Utaaho wo aunahipati Sairinihandaahapiho komi ambipati Saimoniho Arekisandaayi Rupaasiyaami sapiho nehahaati daaya bitonjati aunahipa Jerusaremihandaahapi taati naihihoaisawi daihira otihapihi nutanawaayopo. Aiwi koai niwimbipupwi, “kinyi Jisaasihomi ipi titihi atawihati nepi tipwite,” undiwi andititiwimapi nepi tipwitiwusosawaayopo.

²² Aiwi Jisaasihoai numwaasi Gorikotaahandaahapi niyawaayopo. Sandi Gorikota tiwi ambihitohitimandami tanyaaha siyate. Mitihomi anditatamatetimbipihho tiwi katawaatopo. ²³ Aiwi kiya wainihandisawi marasiniho wo komi ambipati mirihoaisawi ahoyawi naumbwaihiriwi Jisaasihoai komi ambipati awaindihandi niwinati yaahomaawitandihho nunyauhahandi kandi kahi pohipiyati neti windi namainje. ²⁴ Aihi kiya Jisaasihoai ipi titihi atawihateti tipi nimaawaayopo. Saiwosawi Jisaasihomi apotihirapi ndi nese tiwi jatawa wapa ipipa isiw

jihimatiwi nusatipihaahohiyihiya Jisaasihomi apotihiri kihonji kihonji newaayopo.

²⁵ Sura asisihaatiji ipiho aimi nasa saasihi 9 kirokihura Jisaasihoai tipi nimaawaayopo. ²⁶ Aiwi Jisaasihomi mitihomihini autaaahi piwiha kaundiwi tiwohiha satiwi jipatipaiwi ahiyawaayopo. “KIMO UTAAMO JUDAAHIYAI IWINJAATI BIMISIHO AWAISHORE,” tiwi jipatipaiwi ahiyawaapo. ²⁷ Aiwi ami utaahuri wuri ikopaisahuri Jisaasihomi ikwiri gaatihiraihoaanji wotihi ami ikwiri konaamohiraihoaanji wotihi tipi nimaawaayopo. ²⁸ Aihi Autaahaatihomi piwihaatiji jipatipindisihaami piwiha akaaha noaipataise. Piwiha sa sataha jipatipindise. “Isihiya maipihaiwaisahiyaisati maasi utaaho maipihomataiwi isihiya usonawaayopo,”^a tati jipatipindise.

²⁹ Aihi isihiya nuwi napiwaiwi mitiho nepemahirijiwi bitotawa Jisaasihoai sisipihundiwi saundawaatopo. “Ese. Kimoje, Autaahaatihomi Anji Awaindihandi nini nupwisasiti japihi keti asisiha mairimeti animatiti owemaito tipihone. ³⁰ Isi wani kimura kinyi kinyi ambipatiji anditiwiipe. Aimi ipi titihi atawihati namasi japihi noaatipape,” undawaatopo. ³¹ Aihi ami isihiya pirihiya isihiyaami maipihaiwaapi nandapa tihiji Autaahaatihoi nunyohiyihiyauni ami isihiya usa winihapija katiwunjohiyihiyaisangi kati nepi Jisaasihoai sisipihundawaatopo. Aiwi kiya sawana sanawaatopo. “Kimo utaamo isihiyai titihiwiwati anditiwihahosi ami komi ambipati napaapi titihemaama anditimaawise? ³² Ami kimo akiti titihi Kiraisiho Isiraherihiyai iwinjaati bimisihondaataahi ipi titihi atawihati namasi noaatipane. Noaatipahonihinyahi winjihaawi kopi nyahi giwunyaitaano,” nnawaatopo. Aihi ami kapihi utaahuri yahuri ikonimihuri Jisaasihoaisawi maasi tipi nimaahohururisasi Jisaasihoai mimaipaimi itihundamaase.

Jisaasiho Napwindihandapihaare

(*Matiyuho 27:45-56; Rukiho 23:44-49; Joniho 19:28-30*)

³³ Aihi ipiho aimi saniya otihasinini 12 kirokihanditiji nahataapihi asahatindihandi namaasati asahatamataise. Asahatimi noti ipiho aimi noti yaataatisura 3 kirokihuraatiji japihi taati saasinataise. ³⁴ Iyati taati kura saasina bowihi Jisaasiho waati kaahaata sandaase. “**Eroi, Eroi Rama Sapakitani?**” ndaase. Sandi sata katindimandi sandaase. “Nisi Autaahaatihone, Nisi Autaahaatihone, kinyi ningisi napaapi nanimahise?” ndaase. ³⁵ Aihi isihiya kapihi deti bitohohiyihiya sa piwa atisawaawi sanawaatopo. “Atiwise! Kimo utaamo Eraijaahopi gandaaso!” nnawaatopo. ³⁶ Aihi utaaho wo nihiti noti wainihandi ikonahandaatiji siponjihandi windi dihaamatiyahandaahi timandaati boyati neti asatipatami otasaahaasini mwitiwati isisi niyataise. Niyati deti bitonda

^a 15:28 Aisaiyaaho 53:12 handi mmome.

kandi Jisaasiho nandota nunyataati kiyai saundataase. “Nyahi nehi jatitihaa wo Eraijaaho ambihitisiho noaatipati japihi napihausoasonihi yapipateti timihaiso e owetisotaato!” undataase. ³⁷Aihi Jisaasiho waapihita gaatamapi konihi napomataise.

³⁸Siyati Jisaasiho napwihi keti kuraanihi apotihiri wiri awairihiri mwipihiri watipihiri Anji Awaindihandaatihi Autaahaatiho nasati komi ndimaahomwaanji ahiyati bimitandiroti neti nimbipuwati nahoesandirihiri mihaatapi mihaapi kirinihi otutaati napwirinataise.

³⁹Aihi siyati Jisaasiho napwihi utaaho wo tiworisa tunniwi yahwinohiyihyaami awaisiho Jisaasihomi deti utatototi bitonjahosi komi ndiheti napwihi usonataati ko sandaase. “Kimo utaamo titihi akitinihi Autaahaatihomi Mwaaho akohore!” ndaase.

⁴⁰Aihi ami asihya usaisangi onih wonji bitotawa Jisaasihoai winjatawaayopo. Kiyaaami otihatihapi waati aunahipa Makitaraahandaahapahaati Mariyaahaate. Aihi ami waati Mariyaahaati waate. Kaati Jemisihomuni Josisihomuni sanaate. Aihi ami waati Saaromihaate. ⁴¹Siya asiya jihi Jisaasiho otipipati kiya Garirihanda daihi kiya kaiwusepaapi maasi niwipinjawi daayohiyihyaatihi ami usa Jerusaremihandaahapi Jisaasihoaisawi maasi niyohiyihyai maawi kapihi bitotawa iwinjatawaapo.

**Kima Piwima Jisaasihoai Nawiha Isihya Soariwi
Akohaahaiwahaatihi Ahiyotihandapihaare
(Matiyuhu 27:57-61; Rukiho 23:50-55; Joniho 19:38-42)**

⁴²⁻⁴³Aihi utaaho wo komi ambipati Josepiho aunahipati Arimatiyaahandaahapihomuni sapihi bindataise. So utaaso kaunjorihomuni awaisihomuni wandihaisahore. Iyataati ami koaisangi Autaahaatiho komi isihyai iwinjaati bimitandihandapi jaati bindataahore. Isi ko mmona gwinyapenata bosonihi kiya Judaahiyaami asisiha ikindaatiwiha Sapaatihandititaihi otipipati wapa windi kamaitihaawi wani kimura kahapaamapipa timanindaatiwihuraatihi gwinyapenata ipihomuni aimi namaatipaitandaihi namati ko yamaayati awaisihomuni Pairotihoapihi notaise. Noti noaipati awaisihomuni Pairotihoai Jisaasihomuni ambipati ipi titihi atawihatetapi napihati naitandi nunjenataise. ⁴⁴Aihi ko awaisihomuni Jisaasihomuni aimi keti napwihindindiho tati waati gwinyapeninja tiworisa tunniwi yahwinohiyihyaami awaisihomuni gaata numwaataise. Gaata numwaati koai saundati, “Jisaasiho aimi napwiso e sangi napwiso?” undati nunjenataise. ⁴⁵Aihi awaisihomuni Pairotiho nunjesihomuni, aimi napwise undihomuni Josepihoai saundataase. “Gaasi, kinyi Jisaasihomuni ambipati napihapesi numwe,” undataase. ⁴⁶Sata ko aye undihomuni Josepiho apotihiri wiri kihopihiri nawiho nunya nesihya Jisaasihoai napihati kiraapihi ahiya napapihataise. Napapihati isisi niyati nawiha wa isihya soariwi akohaahaiwihomuni ahiyataise. Ahiyatosati nawiha taapwiniha naanjiha awaisihomuni neti nepehaasa maahomwaanji anitisati awaahati napuwataise. ⁴⁷Siyati

Josepiho Jisaasihoai ahiyati anitisati napusihi aunahipa Makitaraahandaahapi Maariyaahaatitihimi ami Mariyaahaati waati Josesihomi sanaatitihimi iwinjatimbimi ami Jisaasihoai ahaimbipihimi mmonimapi nomaise.

Jisaasiho Japihi Nepasitihandapihaare

(Matiyuhu 28:1-8; Rukiho 24:1-12; Joniho 20:1-10)

16 ¹Judaahiyaami asisiha Sapaatihandi aimi owetihi asahataahura asihiya aunahipa Makitaraahandaahapi Mariyaahaatitihimi ami Saromihaatitihimi ami Mariyaahaati waati Jemisihomi sanaatitihimi sinya nuwi atipati witi biya waamainjotihati Jisaasihomi ambipateti nesaiwi nurihapi winjaitaatiwi nawiho nunyawawi newaayopo. ²Saiwi atipati waamainjotahati nunyawawi nepi timaniwi nanopawi bowihi asisiha jiheti, Sandehura asisihaatihimi kohokoaisawi ipiho aimi yahutaasihi kati atipati isisi Jisaasihomi ambipateti jaitaatiwi koai ahiyohipipihimi nawihaami animwaaahipataapihapi niyawaayopo. ³Niyawaawi daihira otihapihimi sawinya sanawaatopo. “Ese! Jisaasihoai ahiyotihandami maasomwaaŋi mipateti nawiha aungwohanda nepehaasawi anitiwi napuhowi ndi neti nepehaasa nuwatinyositande,” nnawaatopo. ⁴Saniwosawi naingaapi jawa wa nawihandi windi maasomwaaŋi mipateti namaapundihi utaahe wo neti nepehaasa nemasihi nehi maasomwaaŋi nundihi jawaayopo. Iyataati sa nawa apipaahi awaisiha naanijaare. ⁵Siyati maasomwaaŋi nundihi kiya nandaapi mihatihimi jawa utaahe wo waimwaahe apotihiri nehi aminaihiri kihoepihiri utaarihiri nipaatahe ikwiri gaatihiraihoanaŋi bimihimi iwinjawaayopo. Iwinjaposawi waati yaiwipwitawaayopo.

⁶Yaiwimahauhi ko kiyai saundataase. “Sahi windi waati yamaiwise owe. Sahi Nasaretihandaahapi Jisaasihopi daapi nasauhi nini aimi jasoho ipi titihimi atawihateti nimaapi tipimandaahohihopo. Isi ko windi kimbihimi ahimotise owe. Aimi japihi nepasi naise. Koai ahiyohipipihimi kimbihimi sahi sawanaati mmowise. ⁷Isi sahi nuwi komi otipipatihiyai kaundiwise. Aiwi ami Pitaahoai maawi kaundiwise. Kaundawaawi saundiwise. “Jisaasiho aimi jihimi satindihande, ‘Nini napotati japihi nepasi Garirihandaahapi nini jihimi taati naito,’ undindihandisi aimi nepasi ko jihimi Garirihandaahapi naisi kiya koai kapihimi iwinjaita ipoti naita kaundiwise,” undataase.

⁸Aihi kiya asiya noaipasi kapihimi namasi yanihimapi nowaayopo. Nowaawi kiya kiyaami maariho owesoetihimi yaiwi itipi nowaayopo. Nowaawi isihiyai usai windi kamundopo, owe. Sandi kamundotimandi apaapimaahe. Kiya aungwohandi yaiwimawaawe.

Mariyaahaati Makitaraahandaahapihaati Jisaasihoai

Usositihandapihaare

(Matiyuhu 28:9-10; Joniho 20:11-18)

⁹Saraarehirami asisiha jiheti (Sandehura) Jisaasiho asisihaatihimi api kohokoaisa japihi nepataise. Siyati ko aimi nepasihura ipoti Mariyaahaati

aunahipa Makitaraahandaahapihahaataapihi jihi noaipataise. Saati itapaati jihura Jisaasiho itipihohi maipihapa ikwiri naasairitihhi wihinirami yahuritahapai nemwasaamaate. ¹⁰ Isihiya Jisaasihoai niwipinjawi koaisawi maasi daayohiyihhiya Jisaasihopi maariho tundihi taawi gwiji bimauhi kaati Jisaasihoai usositihandapi noti kiyai kaundataase. ¹¹ Kiyaisi Jisaasiho japihi asohoematati nepasitihandapuni ami kaati sawihaami koai usositihandapuni kiyai kaundihi kiya kaatami piwiha atisawaahandi kandi kaatami piwihaapi akite tiwi windi baiwi atiwi nepi gimunyaahopo, owe.

**Kima Piwima Jisaasihoai Otipipatihuri Yahuri
Daihira Usositihandapihaare
(Rukiho 24:13-35)**

¹² Kaihi otipipatihuri yahuri aunahipa namasi taami daihira naihi Jisaasiho noaipati windi jihamatimetati nehi koai wipetaho kuri iwinjataise. ¹³ Aihhi kuri japihi nepemaitimi numwi otipipatihhiya ami usai, “Yihoaanj Jisaasihoai iwinjaho,” undimi kaundihihandi kandi kiya kurami piwiha kaundisihaapi windi akaahe akite tiwi atiwiwi gimaawunyaahopo. Owetise.

**Kima Piwima Jisaasiho Komi Otipipatihhiya Komi Piwiha
Awusaitaatiwi Natausaasindihandapihaare
(Matiyuhoh 28:16-20; Rukiho 24:36-49; Jonihoh 20:19-23)**

¹⁴ Aihhi ipotinihi Jisaasiho sawaho komi otipipatihhiya ikwimaindimwitihhi auhirami naasohitahhiya 11 kaiwihhiya bindawa taawi nandapa nanihauhi noaipati nunjaanati iwinjataise. Noaipati iwinjati itihundataase. Sandi itihundindimandi apaapimaahhe, isihhiya usihhiya asihhiya ko aihhi nepasihhi usonihohiyihhiya Jisaasihopi aihhi japihi nepase undiwi kaundauhihandi kandi kiya daahi kiyaami maariho nimbiputiwi windi kopi akite tiwi gimunyaahauhi kandapi itihundataase. ¹⁵ Iyati kiyai piwiha sata kaundataase. “Sahi yapipati nahatewaaara gaamapi nuwi isihhiya nahatiyai nisi Piwiha Gaaha Waniha anusaapi kaundiwise. ¹⁶ Piwiha Gaaha Waniha kandi kiyohiwaiwaapi ausaasaihi utaaho itapaati wo waati atisati piwiha kaapuni nisapuni ginunyaasihoh ginunyaasaamaati waapohora baawusisaihi Autaahaatiho soai saati japihi numwaitaise. O utaaho itapaati wo waati nisapuni ami nisi piwihaapuni nepi nimbipwitiwi windi gimaanunyaasihoh gimaanunyaasaamaati ipotihura kinyi maipihohje, maipihahaje undati komiheti kaatamiheti Autaahaatiho piwiha neti yawutoati yaawihandi nunyati nemaitaise. ¹⁷ Autaahaatiho isihhiya nisapi baiwi ginunyaahohiyihhiyaisatitonihhi kiya nisi ambipataahi watipihaiwa kaitaapo. Nisi ambipataahi Bwaasirihirami itipihoh maipihapa isihhiyaamiheti omanjititihhi bimihaiwai nepumaitaapo.

Aiwi ami piwiha wa kiya windi piwaamaatiwiha waniha wanihandi Autaahaatihomi Itipiho Gaaho neti kiyai giwunyaahonihi kiya piwaatitaapo. ¹⁸ Aiwi ami akwiraniho tataapwinihoai iwisaihi ko windi ikomaawitaise. Aiwi ami onaapipa wapa nanawaawi kiya windi kapa onaapipaapi namwaapwitaapo. Aiwi ami kiya timbipaisahiyai ikwiri kiyaamiheti ahiwisaihi kiyaami timbipa keti owesuetitaise,” undataase.

**Kima Piwima Jisaasihoai Autaahaatiho Numwaasi
Yamihapataatihapi Naindihandapihaare
(Rukiho 24:50-53; Aposerihiya 1:9-11)**

¹⁹ Awaisiho Jisaasiho piwiha saiwa kaunda owetihi Autaahaatiho koai yamihapataatihapi numwaasi naihi niyati yamihapataatihi Autaahaatihomi ikwiri gaatihiraihoanji bindataise. ²⁰ Aihi komi otipipatihiya yapihahi nahatewaara nuwi gaamapi Autaahaatihomi piwiha gaaha waniha Jisaasihopitaha awusoawaayopo. Siyauhi Awaisiho kiyai anditiwiwa kiyaisatitihahi kiya watipihaiwa kaiwa kaiwa kiyauhi isihiya mmonawaawi Autaahaatihomi piwiha akitiha akaahaare tawaatopo.^b

^b **16:20** Isihiya amitihaisahiya taahiyihiya kima piwima (16:9-20 ma) Maakiho sawaho jipatimaise ami utaaho wo ipoti jipatipiyataise tiwi gwinyaawaayopo.